

Kuyantika 1

Kuyantika 2

Kuyantika 3

Kuyantika 4

Kuyantika 5

Kubasika-Levi

Kutanga-Kulonga


Yozue

Bazuzi-Ruti

1 Samuele, Bankunga

K16

Yobi



MIKANDA *ya* 1 Samuele ti Bankunga

(Baleso 26 sambu na bana ti bajeune)

Musoniki: *Mama Lorella Rouster. MCE*

Edition 2024



Le Projet MWINDA—Ministères pour Chaque Enfant
Merci à www.freebibleimages.com/SweetPublishing sambu na dessein.

ecmafrica@ecmafrica.org

Mikanda ya 1 Samuele & Bankunga**Baleso ya kele na Mukanda Yai**

	Page
Leso 1 Nzambi waka lombilu ya Ana ti pesaka yandi mwana. 1 Samuele 1—2 :11.....	3
Leso 2 Bana ya Eli salaka buzoba. 1 Samuele 2:12-36.....	7
Leso 3 Nzambi bingaka Samuele. 1 Samuele 3:1-21, 4 :1.....	11
Leso 4 Mambu ya mpasi ti ya nsoni salamaka na mvita. 1 Samuele 4 :1-22.....	15
Leso 5 Kiteki Dagoni bwaka luse na ntoto na ntwala ya Sanduku ya Kuwakana ya Nzambi. 1 Samuele 5 :1-12.....	19
Leso 6 Sanduku ya Nzambi vutukaka, ti bantu ya Israele yambaka yo na kiese. 1 Samuele 6 :1-18.....	23
Leso 7 Samuele twadisaka Israele kubalula ntima, ti Yandi sambisaka Israele. 1 Samuele 7 :3-17.....	27
Leso 8 Israele sosaka ntotila, Samuele songaka bo bampasi ya ntotila ta nata. 1 Samuele 8 :1-22.....	31
Leso 9 Israele bakaka ntotila ya ntete. 1 Samuele 9 :1-27, 10 :1-27.....	35
Leso 10 Saule bedisaka bantu ya Ammoni, ebuna bantu yonso ndimaka yandi bonso ntotila. 1 Samuele 11 :1-15.....	39
Leso 11 Samuele pesaka message ya nsuka. 1 Samuele 12 :1-25.....	43
Leso 12 Saule pesaka nkailu ya Nzambi me pesa yandi kiyeka ve ya kupesa. 1 Samuele 13 :1-23.....	47
Leso 13 Nzambi buyaka Saule sambu yandi lemfukaka ve diaka. 1 Samuele 15 :1-28.....	51
Leso 14 Samuele tulaka Davidi ntotila ya Israele. 1 Samuele 16 :1-13.....	55
Leso 15 Davidi sadilaka Saule na misiki, sonikaka bankunga. 1 Samuele 16 :14-23, Mukanda ya Bankunga.....	59
Leso 16 Davidi vandaka na kikesa na kunwana na Goliati. 1 Samuele 17 :1-53.....	63
Leso 17 Davidi salaka kinduku na Yonatani. 1 Samuele 17 :58--18 :5.....	67
Leso 18 Saule zolaka kufwa Davidi na kimpala. 1 Samuele 18 :6—30.....	71
Leso 19 Yonatani sadisaka nduku na yandi Davidi. 1 Samuele 19 :1-24, 20 :1-42.....	75
Leso 20 Davidi wilaka Saule mawa. 1 Samuele 21-23 somere, 24.....	79
Leso 21 Davidi sonikaka bankunga kusonga mpila yandi sosaka Nzambi na ntangu ya mpasi. Bankunga 18.....	83
Leso 22 Abigail sosaka ngemba ti Davidi. 1 Samuele 25 :3-35.....	87
Leso 23 Davidi tinaka makasi ya Saule ti wilaka yandi mawa diaka. 1 Samuele 26 :1-25, 27 :1-12.....	91
Leso 24 Nzambi buyaka Saule sambu yandi sosaka nganga-ngombo. 1 Samuele 28.....	95
Leso 25 Saule fwaka na mvita. 1 Samuele 31.....	99

Leso 26 Revisio ya 1 Samuele ti Bankunga.....	102
Kulonga Mikanda ya Bible.....	104
Kutwadisa Mwana na Yesu.....	104

Matondo sambu na bafoto : www.freebibleimages.org/Sweet Publishing, /Jack Foster/MrBibleHead.blogspot.com, /Lambsongs, ti www.biblestoriesonline.com

Leso 1. Nzambi waka lombilu ya Ana, pesaka yandi mwana-bakala.

Leso na nkufi : Ana vandaka na nsoni ti na mawa sambu yandi vandaka kubuta ve. Yandi lombaka Nzambi mwana ti silaka kuvutula mwana yina na Yandi. Nzambi waka lombilu na yandi. Ebuna yandi butaka mwana ya bakala, Samuele.

Leso ke monika na : 1 Samuele 1—2:11

I. Preparasio ya Moniteur—

🎯 Kikuma ya lesu :

Beto samba Nzambi na bampasi yonso ya luzingu.

♥ Verse ya bubu yai :

(Ana sambaka nde :
“Mfumu Nzambi ke kebaka/ luzingu ya bantu/ yina ke zitisaka Yandi./...Muntu... lenda kuka ve/ na ngolo na yandi mosi.”/ 1 Samuele 2 :9

👁️ Nkunga ya kwenda nzila mosi ti lesu :

Nzambi Kuwa na Suka

Nzambi na mono ta kuwa
 Konso ntangu mono samba
 Ata n’ suka, Ata mpimpa,
 Nzambi ata kuwa !

Nzambi kuwa na-a su-uka
 Nzambi kuwa na mi-idi
 Nzambi kuwa na nkokila
 Konso ntangu beto samba !

II. Revisio—

○ Kuyindula diaka baleso me luta :

Beto me longuka dezia mukanda ya Bazuzi. Beto me mona nde muntu bonso ntotila vandaka kuyala ve, kansi Nzambi pesaka bo bazuzi kutwadisa bo ntangu bo bondilaka Yandi. Na ntangu yina, bambeni vandaka kuyangisaka bo ngolo. Yo salamaka sambu bantu ya Israele kulaka bo ve mutindu Nzambi tubaka, kansi bo bikisaka bampani yai kuzinga na kati na bo. Na ntangu yina, kisakasaka mingi, ntangu ya bantu yonso salaka na mabanza na bo mosi.

Na mukanda ya Ruti, beto monaka nde ata na bilumbu ya mbi yina, ndambu bafami vandaka kulanda Nzambi mpi kuzitisa Yandi. Nzambi mpi vandaka kusala kuyidika ntangu nde Yandi ta tinda Mesia, Mvulusi. Ee, Bozi ti Ruti zabaka ve, kansi mwana na bo Obedi kumaka mbuta ya Mesia Yesu Kristo.

III. Kulonga Leso Yai—

⇒ Kuyantika :

Beto me mona bazuzi mingi. Keti beno lenda bambuka ndambu na bo ? [*Moniteur, pesa ntangu sambu na bana kutuba ndambu na bo.*]

(Samsoni, Gedeoni, Debora, bo vandaka bazuzi ya gulusaka bantu ya Israele na bambeni na bo.) Bubuyai beto ta mona zuzi ya nsuka. Beto ta mona nki ? [*Bantu vutula : Zuzi ya nsuka.*] Yandi butukaka sambu mama na yandi sambaka Nzambi na kati ya bampasi ya luzingu na yandi. Kuwa mbote sambu nge kuwa zina na zuzi yina.

🌟 **Developpement (Malongi ya nene ya lesu yai na banti ya malongi 4) :**

1.1 Ana vandaka na mpasi mingi na ntima sambu yandi vandaka kubuta ve.

📖 Tangila bana : 1 Samuele 1 :1-7

1-2 *Kuvandaka na muntu mosi, zina na yandi Elkana...(ya) kwelaka bankento zole, Ana ti Penina. Penina vandaka kubuta, kansi Ana ve.*

3 *Konso mvula, Elkana vandaka kwenda... sambu na kusamba Mfumu Nzambi ...ti kupesa Yandi makabu...*

5 *....Yandi vandaka kuzola yandi mingi, ata Mfumu Nzambi pesaka yandi bana ve.*


6-7 *Kansi... Penina vandaka kuseka yandi mingi nde yandi ke butaka ve (ti)...kupesa Ana mpasi mingi ti kuna Ana yantikaka kudila, yandi mpi vandaka kumona mpila ya kudia ve.*

? Yula bana bakestio.

🏠 Bana sala bageste.

👤 Bana yimba ti kina.

1.2 Ana sambaka Nzambi ngolo nde yandi buta mwana ya bakala. Yandi silaka kuvutula mwana yina na Nzambi.

 **Tangila bana :** 1 Samuele 1 :9-18

9 Kilumbu mosi...Ana... kwendaka na munoko ya Nzo-Nzambi, kisika vandaka nganga-Nzambi Eli.

10 Ana vandaka na mawa mingi na ntima. Yandi sambaka Mfumu Nzambi ti kudila nde :

11 "Mfumu Nzambi, Nzambi-Mpungu... wila mono mawa. Pardo, pesa mono mwana. Mono me sila nde mono mono ta pesa yandi na maboko na Nge na luzingu na yandi yonso...."

13-14 Ana vandaka kusamba na nsi ya ntima, kaka munoko vandaka kunikana. Eli vandaka kuwa ata kima ve. Yo yina, yandi yindulaka nde yandi me lauka malafu, ebuna yandi ...nde : "Katula malafu na nge awa!"

15 Ana tubaka nde : "Ve mfumu, mono me lauka malafu ve...Mono me kwisa awa kusonga Mfumu Nzambi bampasi na mono...."


17 Eli nde : "...Nzambi ya Israele kupesa nge kima ya nge me lombaka Yandi."....

? Yula bana bakestio.

🏠 Bana sala bageste.

👤 Bana yimba ti kina.

1.3 Nzambi waka lombilu ya Ana, ebuna Yandi pesaka Ana mwana ya bakala zina ya Samuele.

 **Tangila bana :** 1 Samuele 1 :19-20

19-20 Kilumbu landaka, Elkana ti fami na yandi ...kwendaka kusamba Mfumu Nzambi. Ebuna na nima, bo vutukaka na bwala na bo... Kuna, Mfumu Nzambi ndimaka bisambu ya Ana. Ana bakaka divumu ya bakala na yandi Elkana, ebuna yandi butukaka mwana ya bakala. Yandi pesaka yandi zina Samuele, sambu yandi tubaka

nde : "Mono lombaka yandi na Mfumu Nzambi."

? Yula bana bakestio.

🏠 Bana sala bageste.

👤 Bana yimba ti kina.

1.4 Ana lungisaka nsilulu na yandi, ti yandi pesaka Nzambi lukumu. 1 Samuele 1 :24-28, 2 :1-11

 **Tangila bana :**

24-25 Ntangu mwana me bikisa kunwa mabele, Ana natakaSamuele na Nzo-Nzambi....bo nataka mwana na nganga-Nzambi Eli.

26-28 Ana tubilaka Eli nde...Mono lombaka (Nzambi) mwana, ebuna Yandi me pesa mono mwana yango. Yandi yai. Yo yina, mono ke pesa yandi na Mfumu Nzambi...

2 :1 Ntangu yai, Ana sambaka Nzambi nde : "Mfumu Nzambi me pesa mono kiese mingi na ntima !

Ntangu yai mono lenda tedimisa ntu na mono kukonda nsoni...

Mono ke sepela sambu Nzambi me sadisa mono.

9 Mfumu Nzambi ke kebaka luzingu ya bantu yina ke zitisaka Yandi, Kansi bayina ke buyaka Yandi, bo ta fwa na kati ya mpimpa ; Muntu yandi mosi lenda kuka ve na ngolo na yandi mosi.

11 ...mwana yango Samuele bikalaka kuna... Yandi kumaka kusadila Mfumu Nzambi na maboko ya nganga-Nzambi Eli.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa leso :

Ana vandaka na mpasi ya kubuta mwana. Nki mambu ya nkaka ya luzingu lenda pesa beto mpasi ? [Moniteur, kuwa mabanza ya bana.] Ee, mpasi ya madia, mpasi ya maladi, mpasi ya

nzo-nkanda, mpasi ya mvita, mpasi ya kufinga ya bantu, mpasi ya mutindu na mutindu. Mbote kana bonso Ana, beto samba Nzambi na kati ya bampasi ya luzingu. Yandi muntu lenda sadisa beto. Nzambi pesaka Ana mwana Samuele, ti Samuele kumaka zuzi ya nene, zuzi ya nsuka ya Israele.

♥ Verse ya bubu yai :

(Ana sambaka nde :)

“Mfumu Nzambi ke kebaka/ luzingu ya bantu yina/ ke zitisaka Yandi./...Muntu yandi mosi lenda kuka ve/ na ngolo na yandi mosi.”/ 1 Samuele 2 :9

👂 Bankunga ya kwenda nzila mosi ti lesu :

Yimba Nzambi Kuwa na Suka to nkunga ya nkaka ya kwenda nzila mosi ti lesu yai.

👋 Devoir sambu na bakristo :

Devoir mono ke pesa beno bakristo sambu na mposo yai, yo yai : kusamba Nzambi ngolo na konso mpasi ya luzingu, na kivuvu nde Yandi ta sadisa nge.

✝ Kubinga bavidi na Yesu :

Kansi kana nge kele mukristo ntete ve, zaba nde Nzambi kele ya salaka bima yonso. Beto bantu, beto me kota na makambu ti Yandi, sambu beto me lemfuka na Yandi ve. Beto me sala ve yina ya Yandi songaka beto kusala, ti beto me sala yina ya Yandi songaka beto kusala ve. Beto me vila nzila. Beto me sala masumu.

Masumu lenda kota na zulu ve. Kansi Nzambi zolaka beto mingi, yo yina Yandi yidikaka nzila ya beto bantu ya mbi lenda kota na zulu. Yandi tubaka nde lufutu ya masumu kele lufwa, kansi Yandi tindaka Mwana na Yandi Yesu Kristo kukota nsi ntoto yai, kusala mambu ya mbote, kansi na nsuka, Yandi kufwa na sika na beto. Yandi fwaka, kansi Yandi nungaka lufwa. Yandi telamaka na lufwa, ti ntangu yai, Yandi ke zinga mvu ya mvu.

Ntangu yai, kana nge mona mawa sambu na masumu na nge, nge lenda kaka tula Yandi

ntima.

Ntangu yina, Yandi ta sukula ntima na nge. Kieleka, Yandi ta pesa nge ntima ya mpa ya zola kulanda nzila ya Nzambi. Yandi ta lolula masumu na nge yonso. Yandi ta kitula nge mwana na Yandi. O, keti nge me tula Yandi ntima ? Kana ve, beto zola mingi kusadisa nge sambu nge mpi kuma mwana ya Nzambi. Kaka bikala na nima ya ecodim. To, kwisa kusolula ti beto konso ntangu nge zola. Yesu ke vingila nge.

📖 Kana ntangu lunga--

Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 1



Ana dilaka na meso ya Nzambi sambu Yandi pesa yandi mwana ya bakala. Nganga-Nzambi Eli waka mpila Ana vandaka kudila.

Leso 1

***“Mfumu
Nzambi
ke
kebaka
luzingu
ya bantu***

yina ke zitisaka Yandi...

***Muntu yandi mosi lenda kuka
ve na ngolo na yandi mosi.”***

1 Samuele 2 :9

Leso 2 Bana ya Eli salaka buzoba.

Leso na nkufi :

Muntu mosi ya Nzambi songaka Eli nde Nzambi me buya dikanda na yandi kulanda na kinganga, sambu bana na yandi me sala mbi mingi. Kansi lumbu mosi, Nzambi ta tinda Nganga ya Kwikama, Mesia.

Leso ke monika na 1 Samuele 1 :3b ,2 :12-36

I. Preparasio ya Moniteur—

🎯 Kikuma ya lesu :

Bana ta sakana ve na mambu ya Nzambi. Bo ta sadila Nzambi sambu na kupesa Yandi lukumu, kansi bo ta sosa ve program na bo mosi.

♥ Verse ya bubu yai :

Bandinga ya Nzambi :

..."Mono ta zitisaka/ muntu yina ke zitisaka Mono./ Mono ta pesaka nsoni/ na muntu yina ke pesaka Mono nsoni." / 1 Samuele 2 :30b

🗣️ Bankunga ya kwenda nzila mosi ti lesu :

Baka Lukumu

Na luzingu na mono,
Baka lukumu, baka lukumu,
Na luzingu na mono,
Baka lukumu bubu !

Ee, Mfumu, Ee

Ee, Mfumu, Ee,
Na yonso ya Nge tuba
Ee, Mfumu, ee
Mono zola lemfuka
Bu mo' tanga Bibila
Mono kaka ta ndima
Ye mono ta tuba ee, Mfumu, ee !

II. Revisio—

- **Kuyindula diaka baleso me luta :**
 - Nani lombaka Nzambi kupesa yandi mwana ?
(Mama Ana)
 - Ana silaka kusala nki na mwana yina ?

(Kuvutula yandi na Nzambi sambu yandi sadisa nganga na nzo-Nzambi)

- Nzambi pesaka yandi mwana-bakala zina ya nani ?
(Samuele)
- Samuele kumaka zuzi. Bazuzi ikwa ya nkaka kwisaka na nima na yandi ?
(Zero. Yandi zuzi ya nsuka.)

III. Kulonga Leso Yai—

➡ Kuyantika :

Na kati ya bwala to paroisse, kana bantwadisi ya dibundu ke sala mbote, kiese mingi na bantu yonso.

Kansi kana bantwadisi ke sala mbi, mawa mingi na bantu yonso. Na ntangu ya mwana Samuele, ntwadisi na kati ya nzo-Nzambi vandaka Eli. Yandi vandaka nganga-Nzambi. Na ntwala ya Yesu, bantu ya Israele vandaka na banganga-Nzambi yina pesaka bamakabu ya bambisi na Nzambi. Eli yandi mosi salaka mbote, kansi yandi twadisaka ve bana na yandi na mpila ya mbote. Bana na yandi vandaka mbi na meso ya Nzambi. O, mawa !

🏠 **Developpement (Malongi ya nene ya lesu yai na banti ya malongi 4) :**

2.1 Bana ya Eli, Ofni ti Pinasi, vandaka banganga-Nzambi mpi. Bo vandaka bantu ya mpamba ya zabaka Nzambi ve.

📖 **Tangila bana :** 1 Samuele 1 :3b, 2 :12

1 :3b ...Bana yai zole ya Eli, Ofni ti Pinasi, vandaka banganga-Nzambi...


2 :12 Bana ya Eli vandaka bana ya mpamba. Bo vandaka kuyindula Mfumu Nzambi ve...

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

2.2 Konso ntangu, Eli vandaka kuwa mambu ya mbi ya bana na yandi vandaka kusala. Yandi nganinaka bo, kansi bo waka ve.

 **Tangila bana :** 1 Samuele 2 :13-18, 22-24

13-16 bo vandaka kulanda mpi ve bansiku ya kinganga-Nzambi. (Bo sosaka bampila na kuyiba bantu bamakabu ya bo nataka kupesa na Nzambi.)

16 Kana muntu (ndimaka ve bo yiba makabu na bo, bo songaka yandi :) "Kele ve, pesa mono yo sesepi yai. Kana ve mono ta baka yo na ngolo."

17 Mutindu yo yina, bana ya Eli vandaka kusala mubulu na meso ya Mfumu Nzambi, bo vandaka kuzitisa ve makabu ya bantu vandaka kwisa kunatila Yandi.

22 Ntangu nganga-Nzambi Eli vandaka me nuna mpenza, yandi vandaka kuwa mambu yonso ya bana na yandi vandaka kusala na bantu ya Israele... (mpila bo vandaka kusala mbi ti bankento ya kwisaka kusamba.)


23-24 Yo yina, yandi yulaka bo nde : « Sambu na nki beno ke sala mambu ya mutindu yai ? » ... beno bikisa mambu yina. ...yo kele mbote ve ata fioti.

? Yula bana bakestio.

🏠 Bana sala bageste.

👤 Bana yimba ti kina.

2.3 Mutubi ya Nzambi songaka Eli nde Nzambi me tuba fami ta vanda banganga diaka ve sambu na mbi ya bana na yandi. Bana na yandi yonso zole ta fwa kaka na lumbu mosi.

 **Tangila bana :** 1 Samuele 2 :27-34

27-28 Profete mosi kwisaka kusonga Eli mambu yai ya Mfumu Nzambi tubaka, nde : « ...Mono solaka fami (ya beno) na kuvanda banganga-Nzambi na Mono... Mono pesaka bo mpi nswa ya kubaka ndambu ya makabu ya bantu ya Israele ke pesaka Mono.

29 Ebuna sambu na nki beno ke bebisaka makabu ya Mono Mfumu Nzambi tubaka na kunata na nzo na Mono ?

30 « Yo yina Mono Mfumu Nzambi...ke tuba nde : « Mono tubaka katuka ntama nde fami na nge ti dikanda na nge ta sadilaka Mono tii kuna. Kansi ntangu yai, Mono me buya. Mono ta zitisaka muntu yina ke zitisaka Mono, Mono ta pesaka nsoni na muntu yina ke pesaka Mono nsoni.


32-34 Nge ta vandaka diaka na nzo na Mono ve....« Nge ta zaba nde mambu ya Mono me tuba ta bwa mpidina ntangu bana na nge... bo zole ta fwa na kilumbu mosi.

? Yula bana bakestio.

🏠 Bana sala bageste.

👤 Bana yimba ti kina.

2.4 Profete tubaka nde lumbu mosi, Nzambi ta tedimisa Nganga ya Kwikama. Nganga yai ta vanda Mesia.

 **Tangila bana :** 1 Samuele 2 :35

35 Na nima, Mono ta sola Nganga-Nzambi yina ta wilaka Mono ti kusala mambu yonso ya Mono ta songaka Yandi...

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Bana ya Eli vandaka banganga-Nzambi, kansi ya kwikama ve. Bo vandaka ve kupesa Nzambi lukumu. Bo vandaka kusakana na mambu ya Nzambi sambu na kusosa mambote na bo mosi. Nzambi pesaka bo ndola ya ngolo.

Nzambi silaka nde lumbu mosi, Yandi ta tinda Mesia yina ta vanda Nganga-Nzambi ya kwikama. Na ntangu ya kulunga, Yesu Mesia kwisaka. Yandi pesaka Nzambi kiese na mambu yonso. Yandi kudipesaka menga na Yandi bonso makabu na Nzambi. Menga yina lenda katula masumu ya konso muntu yina tula ntima na Yandi Yesu.

Beto vanda ve bonso bana ya Eli, kusakana na mambu ya Nzambi. Beto pesa Yandi lukumu

ya kieleka na ntima na beto, na bisambu na beto, mpi na luzingu na beto. Amen.

♥ **Verse ya bubu yai :**

Bandinga ya Nzambi :

..."*Mono ta zitisaka/ muntu yina ke zitisaka Mono./ Mono ta pesaka nsoni/ na muntu yina ke pesaka Mono nsoni.*" / 1 Samuele 2 :30b

👂 **Bankunga ya kwenda nzila mosi ti lesu :**

Twadisa bana kuyimba 'Baka Lukumu', 'Ee, Mfumu, Ee', to nkunga ya nkaka ya kwenda nzila mosi ti lesu yai.

👐 **Devoir sambu na bakristo :**

Bana bakristo, devoir mono ke pesa beno mposo yai yo yai : kutula ngolo kupesa Nzambi lukumu na yonso ya nge sala. Kusosa ve mambote ya nge mosi, kansi sosa kupesa Yandi lukumu kaka.

✝ **Kubinga bavidi na Yesu :**

Bana, beto me mona bana ya Eli-- Ofni ti Pinasi. Bo vandaka banganga-Nzambi. Kisalu na bo na kati ya nzo-Nzambi. Kansi Bible ke tuba nde bo zabaka Nzambi ve. Muntu lenda vanda longi, pasteur, diakre, choriste, kansi yandi zaba Nzambi mpenza ve. Ebuna nge, nge keke na kati ya ecodim, kansi keti nge zaba Nzambi ? Keti nge me balula ntima, me yamba Yesu Kristo bonso Mvulusi ti Mfumu na nge ?

Ndola ya bantu ya zaba Nzambi ve ikele terrible. Yo keke lufwa mvu ya mvu. Bantu yina ta kuma na bwala ya Nzambi ve.

Kana nge ke na mfunu ya lusadisu kuyamba Yesu, kwisa solula ti beto na nima ya ecodim. Kiese mingi kana beto lenda sadisa nge.

📖 **Kana ntangu lunga, longa mikanda ya Bible :**

(Bangindu keke na nsuka ya mukanda yai.)

==NSUKA YA LESO 2

Leso 2



Bana ya Eli vandaka banganga-Nzambi, kansi bo vandaka bantu ya mbi ya zabaka Nzambi ve. Yo yina, Nzambi katulaka kinganga na bo.

...”Mono ta zitisaka muntu yina ke zitisaka Mono.

Mono ta pesaka nsoni na muntu yina ke pesaka Mono nsoni.”

1 Samuele 2 :30b

Leso 3 Nzambi bingaka Samuele.

Leso na Nkufi : Nzambi bingaka Samuele na mpimpa, kansi ntete yandi yindulaka nde Eli muntu vandaka kubinga. Na nsuka, yandi ndimaka ti waka ndinga ya Nzambi.

1 Samuele 3 :1-21, 4 :1

I. Preparasio ya Moniteur—

🎯 Kikuma ya lesa :

Yonso Nzambi me tuba, beto vanda nswalu kundima.

♥ Verse ya bubu yai :

“Tuba ka Nge./ Mono muntu na Nge/ ke wa.”/ 1 Samuele 3:10b

👤 Bankunga ya kwenda nzila mosi ti lesa :

Ee, Mfumu, Ee

Ee, Mfumu, ee
Na yonso ya Nge tuba
Ee, Mfumu, ee
Mono zola lemfuka

Bu mo' tanga Bibila
Mono kaka ta ndima
Ye mono ta tuba ee,
Mfumu, ee!

Kuwa Bible

Kuwa Bible
Tanga Bible
'Buna nge
ta mona
Nzila mbote mingi
Nzila mbote mingi
Ye ngangu I
Ye ngangu !

II. Revisio—

○ Kuyindula diaka baleso me luta:

[Moniteur, nge tanga, ti bana tuba bandinga ya ke konda.]
Eli ti bana na yandi vandaka (nki)

_____, kosalu na bo
kusadila Nzambi na kati ya
_____. Kansi,

bana ya Eli vandaka bantu ya (nki mutindu ?)
_____. Bo vandaka kaka kusakana na
mambu ya (nani ?) _____. Yo yina,
Nzambi tindaka (nani ?) _____ mosi na
kusonga Eli nde fami na yandi yonso ta baka
(nki ?) _____ ya nene.

Na kati na yo, bana na yandi yonso zole ta fwa
na lumbu _____.

[Moniteur, bamvutu yo yai : banganga-Nzambi, nzo-Nzambi, Nzambi, profeti, ndola, mosi.]

III. Kulonga Leso Yai—

➡ Kuyantika :

Beto me mona bantu zole ya nene na bakapu yai ya luyantiku ya 1 Samuele. Beto me mona nganga-Nzambi zina ya ? (Eli) Ti beto me mona mwana zina ya ? (Samuele) Beto me mona nde Nzambi pesaka mwana Samuele sambu Mama Ana bondilaka Yandi kupesa yandi mwana. Beto me mona nde Mama Ana nataka Samuele kubika yandi wapi ? (Na nzo-Nzambi) Kisalu ya Samuele na kileki na yandi kusadisa nani ? (Nganga-Nzambi Eli)

🏠 **Developpement (Malongi ya nene ya lesa yai na banti 4) :**

3.1 Ata Nzambi vandaka kutuba na bantu mingi ve ntangu yina, bbala tatu Yandi bingaka mwana Samuele. Kansi Samuele yindulaka nde Eli muntu ya vandaka kubinga.

📖 **Tangila bana :** 1 Samuele 3 :1-8a

1 Leki Samuele vandaka kusadila Mfumu Nzambi na maboko ya Eli. Na bilumbu yango yina, Mfumu Nzambi vandaka kutuba mingi ve na bantu ya Israele...

2-3 Kilumbu mosi na mpimpa, Eli vandaka me lala na shambre na yandi ...Samuele mpi vandaka me lala na Nzo-Nzambi...

4 Ntangu yai, Mfumu Nzambi bingaka Samuele nde : « Samuele ! » Samuele vutulaka nde : « E, mfumu »,

5 ebuna yandi kwendaka ntinu na Eli ti kutuba nde, « Nge bingaka mono. Mono yandi yai. : Kansi Eli tubaka nde : « Kele ve, mono me

*binga nge ve. Vutuka, kwenda kulala. »
Samuele mpi vutukaka na kulala.*


*6 Mfumu Nzambi bingaka diaka nde :
« Samuele ! » Samuele telamaka, yandi
kwisaka diaka na Eli nde : « Nge me binga
mono. Mono yandi yai. » Eli nde : « Kele ve,
mono me binga nge ve. Kwenda kulala.”*

*7 Samuele vandaka kuzaba Mfumu Nzambi
ntete ve, sambu tii ntangu yina, Mfumu
Nzambi vandaka me tubisa yandi ntete ve.*

*8a Mfumu Nzambi bingaka Samuele diaka
nde : « Samuele ! » Samuele telamaka, yandi
kwisaka diaka na Eli ti kutuba nde : « Nge me
binga mono. Mono yandi yai. »*

- ? Yula bana bakestio.**
- 🏠 Bana sala bageste.**
- 👤 Bana yimba ti kina.**

3.2 Bu Samuele kwisaka mbala ya tatu, Eli bakisaka nde Nzambi vandaka kubinga. Yo yina, yandi pesaka Samuele conseye kundima ti kuwa Yandi.

 **Tangila bana :** 1 Samuele 3 :8b-9

*8b Ntangu yai, Eli kwisaka kuzaba nde
Mfumu Nzambi muntu ke binga Samuele.*

*9 Yo yina, yandi tubaka na yandi nde :
“Kwenda kulala. Kana muntu kubinga nge
diaka, tuba nde : “Mfumu, tuba ka nge.
Mono muntu na Nge ke wa.” Ebuna Samuele
vutukaka na kulala.*

- ? Yula bana bakestio.**
- 🏠 Bana sala bageste.**
- 👤 Bana yimba ti kina.**

3.3 Samuele ndimaka ti waka ndinga ya Nzambi. 1 Samuele 3 :10-14

 **Tangila bana :**


*10 Mfumu Nzambi ...bingaka Samuele
mutindu Yandi vandaka kubinga yandi ntete
nde : “Samuele ! Samuele !” Samuele nde :
“Tuba ka Nge. Mono muntu na Nge ke wa.”*

*11-12 Mfumu Nzambi tubilaka Samuele nde :
« Mono ke sala ...na fami ya Eli...*

*13 Mono me songaka yandi nde Mono ke
pesa fami na yandi ndola...sambu bana na
yandi me finginga Mono. Yandi Eli vandaka
kuzaba nde bo ke sala mambu ya mbi, kansi
yandi vandaka kunganina bo ve.....*

- ? Yula bana bakestio.**
- 🏠 Bana sala bageste.**
- 👤 Bana yimba ti kina.**

3.4 Samuele zolaka ve kusonga Eli, kansi Eli bondilaka Samuele. Yo yina yandi songaka ndola ya Nzambi ta pesa fami na yandi. Ebuna Nzambi yantikaka kusala na Samuele bonso profete na Yandi.

 **Tangila bana :** 1 Samuele 3 :15-21

*15 Samuele lalaka kaka tii na suka...kansi
yandi waka boma na kwenda kusonga Eli...*

*16 Eli bingaka yandi nde : « Mwana na mono
Samuele !” Samuele nde : “E, Papa.”*

*17 Eli yulaka yandi nde : “Nki mambu Mfumu
Nzambi me songa nge? Kubumbila mono
kima ve....”*

*18 Yo yina, Samuele telaka Eli mambu
yonso....Eli tubaka nde : « Yandi kele Mfumu
Nzambi. Yandi sala mambu ya Yandi ke
mona mbote. »*

*19 Samuele yelaka. Mfumu Nzambi vandaka
ti yandi. Yandi lungisaka mambu yonso ya
Samuele tubaka na zina na Yandi.*

*20 Mpidina bantu yonso ya Israele...bo
zabaka nde ya kieleka, Samuele kele profete
ya Mfumu Nzambi.*

*4 :1 Ntangu Samuele vandaka kutuba, bantu
yonso ya Israele vandaka kuwa.*

- ? Yula bana bakestio.**
- 🏠 Bana sala bageste.**
- 👤 Bana yimba ti kina.**

>|< Kumanisa :

Ntangu Nzambi bingaka Samuele, yandi waka ndinga na Yandi. Na bilumbu yina, Nzambi tubaka na bantu na baprofete. Bubuyai, malongi ya baprofete yina, bo me sonika yo na kati ya Bible. Yo yina, kutanga Bible kele mpila ya ntete ya beto kuwa Ndinga ya Nzambi. Keti beto ke tanga yo mingi ? Beno ya ke tanga ntete ve, keti beno lomba mbuta ya fami kutangila nge ?

Ntangu beto kuwa malongi ya Bible, keti beto tuba na ntima na beto nde, “Ee, mono zola kulemfuka. Mono zola kusala yina ya ta pesa Nge Nzambi kiese” ?

♥ Verse ya bubu yai :

“Tuba ka Nge./ Mono muntu na Nge/ ke wa.”/
1 Samuele 3 :10b

(Bandinga ya Samuele tubaka ntangu Nzambi bingaka yandi)

Bana tuba ya ndambu-ndambu mbala tatu. Na nima, mwana mosi ya kele ngolo kusala bankunga, yandi tula yo na nkunga ti twadisa bana ya nkaka kuyimba yo. Tula bageste ti kina yo.

🧠 Bankunga ya kwenda nzila mosi ti leso :

Bana yimba ‘Ee, Mfumu, Ee’ to nkunga ya nkaka ya ke kwenda nzila mosi ti leso yai.

👐 Devoir sambu na bakristo :

Devoir mono ke pesa beno bakristo, yo yai :
Konso lumbu na mposo ke kwisa, tanga ndambu ya Bible. Ebuna, kudyula : Keti awa mono ke mona nsiku, to nti ya dilongi ya mono fweti lemfuka ? Nki yo ? Ebuna, tula ngolo kulemfuka na yo to kusala yo. Tuba “Ee” na Nzambi.

✝ Kubinga bavidi na Yesu :

Mbala ya nkaka nge me yamba ntete ve Yesu Kristo Mwana ya Nzambi bonso Mvulusi na nge. Kulemfuka ya ntete-ntete ya Nzambi ke sosa na nge, kaka kuyamba Yesu, kutula ntima na Yandi. Kana nge zola beto kutendula mambu yai kuluta, to kusamba ti nge, bikala na nima ya ecodim bubuyai, ti beto ta sadisa nge.


Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 3

Leso 3



“Tuba ka Nge. Mono muntu na Nge ke wa.”

1 Samuele 3 :10b

Leso 4 Mambu ya mpasi ti ya nsoni salamaka na mvita.

Leso na nkufi : Bantu ya Filistia bedisaka bantu ya Israele na mvita. Ebuna bantu ya Israele salaka kifu ya nene kunata Sanduku ya Nzambi na mvita, ti bantu ya Filistia bakaka yo.

1 Samuele 4 :1-22

I. Preparasio ya Moniteur—

🎯 Kikuma ya lesu :

Beto sadila ve bima ya Nzambi na mpila ya magie, kansi beto sosa Yandi mosi, Yandi ya kieleka.

♥ Verse ya bubu yai :

Ntangu beno ta kota na mpasi,/ ntangu bamambu yai yonso ta bwila beno,/ pana beno ta zaba/ kusosa Mfumu Nzambi,/ ti kuwila Yandi./ Kulonga 4 :30

🗨️ Nkunga ya kwenda nzila mosi ti lesu :

Sosa Ntete

II. Revisio—

○ Kuyindula diaka baleso me luta :

Na mposo me luta, beto monaka nde Nzambi tubaka na mwana Samuele. Nzambi tubaka nde Yandi ta pesa ndola na fami ya Eli sambu bana na yandi vandaka kusala mbi mingi. Yandi tubaka mpi nde bana na yandi yonso zole ta fwa kaka na lumbu mosi.

Nsangu ya mawa mingi sambu na fami ya Eli !

III. Kulonga Leso Yai—

⇒ Kuyantika :

Na ntwala bana ya Israele kotaka nsi ya Nzambi pesaka bo, Moize songaka bo nde, « Ntangu beno ta kota na mpasi, ntangu bamambu yai yonso ta bwila beno, pana beno ta zaba kusosa Mfumu Nzambi, ti kuwila Yandi (Kulonga 4 :30). Ee, bantangu ya mpasi fweti kwisa, ebuna ntangu yina, bo fweti sala nki ? [Moniteur, bana pesa mvutu : Kusosa Nzambi ti kuwila Yandi.]

Bambuka nde Nzambi songaka bo kukula bantu yonso ya vandaka kuzinga ntete na nsi yina, kansi bantu ya Israele salaka yo kaka ndambu. Ebuna bantu yina kumaka bambeni ya vandaka kupesa bo mpasi konso ntangu.

🏠 **Developpement (Malongi ya nene ya lesu yai na banti ya malongi 4) :**

4.1 Bantu ya Filistia bedisaka bantu ya Israele na mvita. Yo yina Israele nataka Sanduku ya Nzambi bonso kima ya magie ya lenda gulusa bo.

📖 **Tangila bana :** 1 Samuele 4 :1-5

1 Na ntangu yina, bantu ya Israele kwendaka kunwana bitumba na bantu ya Filistia.

2 Bantu ya Filistia ... bedisaka bantu ya Israele...

3 ...bambuta ya Israele tubaka nde : “Sambu na nki Mfumu Nzambi me bika bantu ya Filistia kubedisa beto...? Beto kwendeno kubaka Sanduku ya Kuwakana... mpidina Mfumu Nzambi ta kwenda na beto ti kugulusa beto na maboko ya bambeni na beto.”

4 Yo yina, bo tindaka bantu ...na kubaka Sanduku ya Kuwakana ya Mfumu Nzambi... Bana zole ya Eli...bo kwisaka nzila mosi ti yo.

5 Ntangu Sanduku ya Kuwakana kwisaka kukuma na kati ya camp, bantu ya Israele monaka kiese mingi. Bo tulaka makelele mingi...

❓ **Yula bana bakestio.**

🏠 **Bana sala bageste.**

🗨️ **Bana yimba ti kina.**

4.2 Mbeni vandaka na boma, kansi bo nungaka diaka, bo bakaka mpi Sanduku ya Nzambi, ti bo fwaka bana ya Eli. Nsoni ti mawa !

📖 **Tangila bana :** 1 Samuele 4 :6-11

6-7 Bantu ya Filistia waka makelele yina...Ntangu bo zabisaka bo nde bo me kwisa kunata Sanduku ya Kuwakana ya

Mfumu Nzambi na camp ya bantu ya Israele, boma simbaka bo....

10 Bantu ya Filistia nwanaka ngolo, bantu ya Israele belaka, ebuna bo tinaka na babwala na bo. ...

11 Bantu ya Filistia botulaka Sanduku ya Kuwakana ya Mfumu Nzambi. Bana ya Eli, bo zole... bo fwaka mpi.

? Yula bana bakestio.

🏠 Bana sala bageste.

👤 Bana yimba ti kina.

4.3 Mawa diaka. Ntangu Eli waka nsangu yina, yandi mpi fwaka.

📖 Tangila bana : 1 Samuele 4 :12-18

12-13 Na kilumbu yo yina, muntu mosi...tinaka bitumba. Yandi kwisaka ... bilele ya kupasuka-pasuka, ti ntoto na ntu sambu na kusonga mawa na yandi...ntangu yandi kotaka na bwala na kuzabisa bantu nsangu yina, bantu yonso yantikaka kutula milolo.

14 Eli waka makelele yango, yandi yulaka nde : "Makelele ya nki bantu ke tula?" Nswalu muntu yango yina kwisaka kuzabisa Eli mambu yonso....

16 Muntu yango tubaka nde : "Mono me katuka na bitumba bubu yai. Mono me kwisa kutina." Eli yulaka yandi nde: "Ebwe mwana na mono, nki me bwa ?"

17 Muntu yina nde : "Bantu ya Israele me tina bantu ya Filistia, beto me bela mpenza. Ata bana na nge (zole), bo me fwa bo. Sanduku ya Nzambi mpi, bo me botula yo."

18 Ntangu muntu yango tangaka zina ya Sanduku ya Kuwakana, Eli katukaka na zulu ya kiti... yandi bwaka ... Yandi bukanaka nkingu. Yandi fwaka, sambu yandi vandaka mbuta me nuna mingi ti kilo mingi mpi....

? Yula bana bakestio.

🏠 Bana sala bageste.

👤 Bana yimba ti kina.

4.4 Nsoni diaka. Nkento ya Pinasi butaka mwana-bakala ti pesaka yandi zina Ikabodi, disongidila nde, « Lukumu ya Nzambi me katuka na Israele ». Ebuna yandi mpi fwaka.

📖 Tangila bana : 1 Samuele 4 :19-22

19 Bukilo ya Eli...vandaka na divumu... Ntangu yandi bakaka nsangu nde Sanduku ya Nzambi bo me botula yo, bukilo na yandi ti bakala na yandi bo me fwa, po pana misongo simbaka yandi, yandi vandaka na ntoto, yandi butaka mwana....

21-22 ...Yandi tubaka nde : "Lukumu ya Nzambi me katuka na Israele ! Sanduku ya Nzambi bo me botula !" Yo yina, yandi pesaka mwana na yandi zina Ikabodi (disongidila nde lukumu me katuka.)

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Bana, Sanduku ya Nzambi vandaka kima ya mbote. Nzambi Yandi mosi songaka bo mpila kutunga yo. Lukumu na Yandi monikaka na zulu na yo. Kansi yo vandaka Nzambi ve nde bo sosa yo kusadisa bo. Mbote bo sosaka lusadisu ya Nzambi Yandi mosi. Yandi zola kusadisa.

Beto yindula ve nde kana beto tula Bible na nzo na beto, Nzambi fweti sakumuna beto sambu na kima yina. Beto yindula ve nde kana beto tula ekipe na beto ya futbol zina « Bana ya Nzambi » nde Nzambi fweti nungisa beto kaka. Beto yindula ve nde kana beto baka kitini ya nsuki ya pasteur ti bumba yo, nde beto fweti nunga na examen. Yai yonso kele bonso kusala magie, ata beto sala yo na bima ya mbote bonso Bible. Beto sosa lusadisu kaka na Nzambi Yandi mosi. Yandi mosi lunga kusadisa beto!

♥ Verse ya bubu yai :

Ntanqu beno ta kota na mpasi,/ ntangu bamambu yai yonso ta bwila beno,/ pana beno

*ta zaba/ kusosa Mfumu Nzambi,/ ti kuwila
Yandi./ Kulonga 4 :30*

 **Bankunga ya kwenda
nzila mosi ti leso :**

Yimba « Sosa Ntete to nkunga ya nkaka ya ke
kwenda nzila mosi ti leso.

 **Devoir sambu na bakristo :**

Beno ya zaba Yesu Kristo na luzingu ya beno,
devoir mono ke pesa beno mposo yai kele
kusosa lusadisú ya Nzambi Yandi mosi na
konso mambu beno ke na yo mfunu.

 **Kubinga bavidí na Yesu :**

Kana Nzambi kele kusonga nge nde nge zaba
Yandi ntete ve, kwisa na Yandi bubuyai. Balula

ntima ti tula ntima na Yandi. Yandi Mwana-
Nzambi kele kuinga nge. Yandi fwaka sambu
na mbi na nge. Yandi telamaka na lufwa.
Yandi ke na ngolo kugulusa nge kana nge ta
binga zina na Yandi. Yandi lenda kitula nge
mulandi na Yandi.

Beto kele awa konso mposo na nima ya
ecodim kana nge ke sosa lusadisú na mambu
yina.

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 4



Leso 4

***Ntangu
beno ta
kota na
mpasi,
ntangu***

Bo nataka Sanduku ya Nzambi na mvita bonso kima ya magie. Kansi Nzambi buyaka kusadisa bo. Bo belaka ngolo ti bambeni simaka Sanduku ya Nzambi.

***bamambu yai yonso ta
bwila beno,
pana beno ta zaba kusosa
Mfumumu Nzambi, ti kuwila
Yandi.***

Kulonga 4 :30

Leso 5 Kiteki Dagoni bwaka luse na ntoto na ntwala ya Sanduku ya Kuwakana ya Nzambi.

1 Samuele 5 :1-12

I. Preparasio ya Moniteur—

🎯 Kikuma ya lesa :

Bana ta buya bampeve ya mbi. Bo zaba nde beto bakristo lenda nunga bo, sambu Mpeve ya Nzambi ke na kati na beto.

❤ Verse ya bubu yai :

Beno me nungaka bapofete yina ya luvunu, sambu Mpeve yina kele na ntima na beno (bakristo), Yandi kele ngolo, kuluta bampeve yina kele na bantu ya nkaka awa na nsi-ntoto.
1 Yoane 4 :4

🗨 Bankunga ya kwenda nzila mosi ti lesa :

Kuwa Bible, verse yai :

Kuwa Bible, Tanga Bible

‘Buna nge ta baka

Ngolo ya Mpeve, Ngolo ya Mpeve
ya Nzambi ! ya Nzambi !

Banzambi ya Nkaka

- Banzaaa-mbi ya nkaka, Bantu me sala yo
Nge kaka ke NzambiYa salaka beto !

II. Revisio—

- Beno ta bambuka nde na ntangu ya Moize, Nzambi songaka bo nki mutindu kusala kima mosi ya bo bingaka “Sanduku ya Kuwakana” to “Sanduku ya Nzambi.” Nzambi vandaka kukuta banganga-Nzambi na bo kuna. Yandi vandaka kusonga lukumu na Yandi kuna. Yandi pesaka bo bansiku nki mutindu kusala na Sanduku yina, sambu yo vandaka Santu, kima ya Nzambi.

Kansi bo tulaka ngolo ve kulanda bansiku yina. Bo yantikaka kuyindula Sanduku yina bonso kima mosi ya mazi—fetishi.

Bo vandaka kubela na bitumba ya bo vandaka kunwana na bantu ya Filistia. Mbote bo kwendaka na Nzambi kulomba lusadisya na Yandi, kansi bo salaka yo ve. Bo kwendaka kusimba Sanduku ya Nzambi, kunata yo na kati ya mvita bonso yo mosi lenda sadisa bo—bonso fetishi.

Nani bambuka mambu ya mawa ya salamaka? Ee, bo belaka diaka na mvita, mbeni fwaka bana ya Eli, Nganga ya Nzambi, ti mbeni simbaka Sanduku ya Nzambi ti kwendaka na yo !

III. Kulonga Leso Yai—

➡ Kuyantika :

Bubuyai, beto ta mona nki salamaka na Sanduku yina. Yo me kuma ntangu yai na maboko ya bantu ya Filistia, bantu ya sambaka biteki ti zolaka Nzambi ve.

🏠 Developpement (Malongi ya nene ya lesa yai na banti ya malongi 4) :

5.1 Bantu ya Filistia tulaka Sanduku ya

📖 **Tangila bana : Nzambi na kati ya nzo ya kiteki na bo.** 1 Samuele 5 :1-2

1 Ntangu bantu ya Filistia me botula Sanduku ya Nzambi imene...

2 Bo kotisaka yo na nzo ya nzambi na bo Dagoni. Bo tedimisaka yo na lweka ya kiteki ya Dagoni.

NB : Niveau secondaire : Bampani mingi vandaka na kiteki ya vandaka muntu na zulu parti ya nitu, mbisi ya masa na nsi. Bo sambaka mpeve ya mbi ya monikaka mpila yina. Bantu ya Filistia bingaka mpeve yina ‘Dagoni’. Bantu ya Congo binga mpeve yina ‘MamiWata.’ Keti nge me wa mambu ya mpeve yai ?



? Yula bana bakestio.

🕊️ Bana sala bageste.

👁️ Bana yimba ti kina.

5.2 Mbala zole, kiteki Dagoni kubwaka luse na ntoto, na ntwala ya Sanduku ya Nzambi. Nzambi mpi bwilaka bantu ya Filistia na bamaladi.

📖 **Tangila bana :** 1 Samuele 5 :3-6

3 Na suka suka, bantu... kwisaka kumona nde kiteki ya Dagoni me bwa ilungi na ntoto, na ntwala ya Sanduku ya Nzambi. Bo bakaka kiteki yina, bo vutulaka yo na sika na yo.

4 Kilumbu landaka, na suka-suka, bo kwisaka kumona nde, kiteki me bwa diaka na ntwala ya Sanduku ya Mfumu Nzambi. Ntu na yo ti maboko na yo me katuka...

6 Mfumu Nzambi pesaka bantu ya bwala ... ndola ya nene mpenza ti boma. Bivimbu basika-basikaka bo yonso...

? Yula bana bakestio.

🕊️ Bana sala bageste.

👁️ Bana yimba ti kina.

5.3 Yo yina, bo katulaka Sanduku ya Nzambi. Bo tindaka yo na bwala ya nkaka, kansi ntangu yo kotaka bwala, Nzambi bwilaka bantu kuna na bamaladi. 1 Samuele 5 :7-9

📖 **Tangila bana :**

7 Ntangu bo monaka mambu yina me bwila bo, bo tubaka nde, "Nzambi ya Israele me pesa beto ndola.... Mbote Sanduku ya Kuwakana kuvanda diaka ve na kati na beto."

8 ...bamfumu ...ya Filistia... nde : "...nata yo na bwala (ya nkaka)." Ebuna bo nataka yo...

9 Kansi ntangu Sanduku kumaka na bwala... Mfumu Nzambi pesaka bwala yina ndola, Yandi kumisaka yo kisakasaka. Yandi tindilaka bantu maladi ya bivimbu....

? Yula bana bakestio.

🕊️ Bana sala bageste.

👁️ Bana yimba ti kina.

5.4 Bo katulaka Sanduku ya Nzambi diaka, ebuna bo tindaka yo na bwala ya tatu. Kansi ntangu yo kotaka bwala, Nzambi bwilaka bo mpi na bamaladi.

📖 **Tangila bana :** 1 Samuele 5: 10-12

10 Yo yina, bo tindaka Sanduku (ya Nzambi) na bwala ya tatu. Ntangu yo kumaka kuna, bantu tulaka milolo nde : « Bo me kwisa kunata Sanduku ya Kuwakana ya Nzambi ya Israele awa sambu na kufwa beto yonso ! »

11 Bo bingaka diaka bamfumu yonso ya Filistia, bo tubilaka bo nde: "Beno vutula Sanduku...ya bantu ya Israele na kisika ya yo vandaka, mpidina yo fwa beto ve ti bantu na beto." Sambu maladi vandaka me kota ntete na bwala, boma ya lufwa me simba bantu.

12 Ata bantu kufwaka ve, kansi bo monaka mpasi na bivimbu...

? Yula bana bakestio.

🕊️ Bana sala bageste.

👁️ Bana yimba ti kina.

>|< **Kumanisa :**

Bana, kiteki Dagoni kubwaka na luse na ntwala ya Sanduku ya Nzambi sambu mpeve yina ya mbi, yo zabaka nde Nzambi me luta nene. Mpeve ya Nzambi ya kele na kati ya bantu na Yandi, ngolo ya Mpeve yina me luta bampeve yonso ya mbi. Yo yina, beto bakristo, beto kele na boma ve sambu na bampeve ya mbi. Beto ke landa mpi makambu na bo ve, sambu Nzambi na beto me luta nene, me luta nene, me luta nene !

♥ **Verse ya bubu yai :**

Beno (bakristo) me nungaka bapofete yina ya luvunu,/ sambu Mpeve yina kele na ntima na beno,/ Yandi kele ngolo,/ kuluta bampeve yina /kele na bantu ya nkaka awa na nsi-ntoto./
1 Yoane 4 :4

[Moniteur, bana tuba yo na nima ya nge fraze par fraze. Bo tuba yo mbala tatu. Na nima, bo yika bageste ti bo tuba yo mbala tatu diaka.]

 **Bankunga ya kwenda nzila mosi ti lesu :**

Kuwa Bible, verse yai
Banzambi ya Nkaka

 **Devoir sambu na bakristo :**

Bana, keti bampeve ya mbi kele kuyangisa nge ?
Keti ke ke wa boma nde bo ta sala nge mbi ? Kaka
lomba Nzambi kusadisa nge. Yandi kele na ngolo
kuluta bampeve yonso ya mbi. Yandi kele Nzambi
Mpungu, ya ngolo yonso. Sosa lusadisu na Yandi.

 **Kubinga bavidu na Yesu :**

Kansi bakisa mambu yai : Kana nge me balula ntima
ntete ve kulanda Yesu Kristo, bampeve kele kuyala
nge. Nge kele na Mpeve ya Nzambi ntete ve na
kati ya luzingu na nge.

Nzambi pesaka Mwana na Yandi ya luzolo sambu
na nge, na mpila nde nge lenda vanda na moyo, na
mpila nge bampeve ya nkaka kuyala nge diaka ve
na mbi na bo, kansi Yesu Kristo kuyala nge na
mambote na Yandi. Kana nge kwikila nde Yandi
kwisaka, Yandi kufwaka sambu na nge, kana nge
me yilama kubalula ntima sambu nge landa Yandi
bonso Mfumu na nge, kaka binga zina na Yandi.
Yandi ta vanda na kiese kugulusa nge.

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 5

Leso 5



Kiteki Dagoni
bwaka luse
na ntoto na
ntwala ya
Sanduku ya
Nzambi. Ntu
ti diboko na
yandi mpi
zenganaka.
Yandi
vandaka na
ngolo ve na
ntwala ya
Nzambi.

***Beno (bakristo) me nungaka
baprofete yina ya luvunu,
sambu Mpeve yina kele na
ntima na beno,
Yandi kele ngolo, kuluta
bampeve yina kele na bantu ya
nkaka awa na nsi-ntoto.***

1 Yoane 4 :4

Leso 6 Sanduku ya Nzambi vutukaka, ti bantu ya Israele yambaka yo na kiese.

1 Samuele 6 :1-18

I. Preparasio ya Moniteur—

🎯 Kikuma ya lesa :

Bana ta yangalala na mambu yonso ya mbote ya Nzambi me sala bo.

♥ Verse ya bubu yai :

Mbote bo pesa Mfumu Nzambi mersi/ sambu na kuzola ya Yandi ke zolaka bo,/ sambu na mambu ya kuyituka/ ya Yandi sadilaka bo./ Bankunga 107 :8

🗣️ Bankunga ya kwenda nzila mosi ti lesa :

Kumisa Nzambi

Kumisa Nzambi na kiese (3x)

Aleluya ! Na kiese !

Bandeke Kele Yimba

Bandeke kele yimba na Yandi

Bawanzio kumisa zina n'Yandi

Bintuntu kele songa kitoko na bo

'Buna beto bana na Yandi

Kumisa Yandi mpi !

II. Revisio—

- † Na mposo me luta, Sanduku ya Nzambi vandaka wapi ?
(Na kati ya nzo ya kiteki ya bantu ya Filistia)
- † Nki mutindu yo kumaka kuna ?
(Bantu ya Israele tulaka yo na kati ya bitumba na mabanza nde yo sadisa bo, kansi bantu ya Filistia simbaka yo.)
- † Sanduku yina vandaka nki ?
(Bwate tres speciale, sika lukumu ya Nzambi vandaka kumonika)
- † Wapi sika Nzambi songaka bo kutula yo ?
(Na sika ya kuluta nsiku na nzo ya bisambu na bo ya ntenta.)

III. Kulonga Leso Yai—

⇒ Kuyantika :

Mambu ya mawa me salama na bantu ya Israele. Bambeni na bo, bantu ya zolaka Nzambi ve, bantu ya Filistia, bo me simba Sanduku ya Nzambi. Kansi Nzambi vandaka na kiese na yo ve, yo yina, bivimbu basikaka na bantu sika yonso yo kwendaka. Na nsuka, bo tulaka yo na nseke sika bantu vandaka ve. Ata kuna, Nzambi basisaka bampuku mingi na ntoto, bo kudiaka madia na bilanga ya bantu ya Filistia. Yai salamaka sambu bo me yiba kima ya santu mingi, Sanduku ya Nzambi.

🔮 Developpement (Malongi ya nene ya lesa yai na banti ya malongi 4) :

6.1 Na nima ya bangonda 7, banganga-ngombo ya Filistia zengaka nde bo fweti vutula Sanduku ya Nzambi, ti tinda bamakabu kulomba pardo.

📖 Tangila bana : 1 Samuele 6 :1-6

1 Sanduku ya Kuwakana ya Mfumu Nzambi vandaka bangonda nsambwadi na maboko ya bantu ya Filistia.

2 Ebuna bo bingaka... banganga-ngombo, bo yulaka bo nde : « ...Sanduku ya...Nzambi ...Beno songa beto nki mutindu beto fweti vutula yo na kisika na yo. »

3 Bo tubaka nde : « beno vutula yo ve ya mpamba ...kansi beno fweti tindila Yandi mpi makabu sambu na mbi na beno....»

4 ...Beno tindila Yandi biteki ...ya wolo, mosi...sambu na konso mfumu ya bantu ya Filistia....

5 ...beno pesa lukumu na Nzambi ya Israele. Mbala ya nkaka Yandi ta pesa beno diaka ndola ve....

❓ Yula bana bakestio.

🏠 Bana sala bageste.

🗣️ Bana yimba ti kina.

6.2 Bantu ya Filistia zikisaka nde bamaladi ya me bwila bo vandaka kieleka diboko ya Nzambi, kaka shanse ve.

1 Samuele 6 :7-9

Tangila bana :

7 Mpidina beno yidika pusupusu ya mpa, beno baka bangombe zole ke pesa mabele na bana na bo, me salaka mpi ntete kimalu ve. Beno kangisa yo na pusupusu, ebuna beno vutula bana na yo na nzo ya bangombe.

8 Beno baka Sanduku ya Kuwakana ya Mfumu Nzambi, beno tula yo na zulu ya pusupusu. Ebuna biteki ya wolo ya beno ke tindila Nzambi ya Israele, makabu sambu na mbi na beno, beno tula yo na sanduku ya nkaka penepene... Ntangu yai, beno pusa yo na ntwala, yo kwenda.

9 ...kana yo kwenda na ndambu ya bwala (na Israele), yo ke songa nde Nzambi ya bantu ya Israele Muntu me tinda beto mpasi yai ya ngolo. Kana yo kwenda na ndambu ya nkaka, mpidina beto ta zaba nde Yandi ve Muntu me tinda beto bampasi yina, kansi yo kwisilaka beto kaka mpidina. »

? Yula bana bakestio.

🕯 Bana sala bageste.

👁 Bana yimba ti kina.

6.3 Nzambi salaka kimpa nde yo vutuka na Israele.

Tangila bana : 1 Samuele 6 :10-12

10-12 Bo salaka mpidina... Bangombe yantikaka kwenda na (bwala ya Israele) yo kwendaka kaka tii kuna na bwala ke dila, yo landaka nzila ya nkaka ve. Bamfumu yina tanu ya Filistia vandaka kulanda yo tii kuna na ndilulu ya (bwala penepene ya Israele).

? Yula bana bakestio.

🕯 Bana sala bageste.

👁 Bana yimba ti kina.

6.4 Bantu ya Israele vutulaka matondo na Nzambi sambu Sanduku me vutuka na kati na bo.

Tangila bana : 1 Samuele 6 :13-18

13 Bantu ya (bwala ya Israele)ke mona Sanduku ya Kuwakana ke kwisa. Kiese simbaka bo na kumona yo.

14 Pusupusu kwisaka tii na kilanga ya...muntu ya (bwala ya Israele). Yo telamaka penepene na ditadi ya nene. Bantu (pesaka) makabu na Mfumu Nzambi.

15 Bantu ya dikanda ya Levi katulaka Sanduku ya Kuwakana ti basanduku yina vandaka na biteki ya wolo, ebuna bo tulaka yo na zulu ya ditadi yina ya nene....

16-18 Bamfumu yina tanu ya Filistia vandaka kutala bo, ebuna kilumbu yo yina, bo vutukaka na bwala (na bo)....

? Yula bana bakestio.

🕯 Bana sala bageste.

👁 Bana yimba ti kina.

>|< Kumanisa :

Nzambi me sala bantu ya Israele mambu mosi ya mbote nde Sanduku ya Nzambi me vutuka na kati na bo. Lukumu na Yandi lenda monika diaka na kati na bo. Yo yina, bo monaka kiese ti bo vutulaka Yandi matondo.

Nki mambu ya mbote Nzambi me sala na nge ? Keti Yandi me pesa nge moyo bubu ? Fami ? Madia ti masa ti mupepe ? Keti Yandi me lolula mambi na nge ? Mbote nge kumisa zina na Yandi na yonso ya mbote Yandi me sala nge.

♥ Verse ya bubu yai :

Mbote bo pesa Mfumu Nzambi mersi/ sambu na kuzola ya Yandi ke zolaka bo,/ sambu na mambu ya kuyituka/ ya Yandi sadilaka bo./ Bankunga 107 :8

[Moniteur, bana lenda tuba ndambu-ndambu, fraze na fraze, na nima ya nge. Bo tuba yo mbala tatu ti ekspresio mingi. Na nima, kabisa bo na bandambu iya. Pesa konso ndambu ya bana fraze mosi. Bo yonso tuba adresse. Sala mutindu yina mbala 3 to 4 diaka.]

 **Bankunga ya kwenda**

nzila mosi ti leso :

Bana yimba mosi ya bankunga ya ke kwenda
nzila mosi ti leso.

 **Devoir sambu na bakristo :**

Beno ya zaba Yesu Kristo bonso Mvulusi ti
Mfumu na beno, devoir mono ke pesa beno
mposo yai kele kumisa Nzambi konso lumbu na
mambu ya mbote Yandi me sala nge.

 **Kubinga bavidi na Yesu :**

Kana nge zaba Yesu Kristo ntete ve na luzingu
na beno, nki ke kanga nge nzila kubinga zina na
Yandi, kubalula ntima na nge, kuyantika
kulanda Yandi ? Raiso Yandi bikisaka nzo na
Yandi na zulu, kulumukaka na nsi-ntoto, sambu
na kugulusa nge. Raiso Yandi monaka mpasi ti
fwaka na zulu ya kulunsi, sambu na kubaka
kizitu ya masumu na nge. Raiso Yandi
telamaka na lufwa, sambu nge lenda baka
moyo.

Kukuma mukristo, nge fweti mona mpasi
sambu na masumu na nge, ebuna balula
ntima. Tula ntima na Yandi. Yandi ta pesa nge
ntima ya mpa, ti nge ta kuma longuki na Yandi.

Kana muntu ke sosa lusadisu na mambu yina,
mono ta vanda na kiese mingi kusadisa nge.
na nima ya ecodim.

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 6

Leso 6

***Mbote bo
pesa
Mfumu
Nzambi
mersi***



***sambu na kuzola ya Yandi ke
zolaka bo,***

***sambu na mambu ya kuyituka
ya Yandi sadilaka bo.***

Bankunga 107 :8

Leso 7 Samuele twadisaka Israele kubalula ntima, ti Yandi sambisaka Israele.

1 Samuele 7 :3-17

I. Preparasio ya Moniteur—

🎯 Kikuma ya lesa :

Bana ta landa banzambi to bampeve ya nkaka ve, kansi Mfumu Nzambi kaka.

♥ Verse ya bubu yai :

... « Kana beno zola/ kwisa kuvutuka na Mfumu Nzambi/ na ntima na beno yonso,/ beno fweti katula banzambi yonso/ ya nzenza ti biteki/...Beno kudipesa mvimba na Mfumu Nzambi./ Beno samba kaka Yandi,/ ebuna Yandi ta gulusa beno... » 1 Samuel 7 :3

🗣 Bankunga ya kwenda nzila mosi ti lesa :

Banzambi ya Nkaka

Banzaaa-mbi ya nkaka, Bantu me sala yo Nge kaka ke Nzambi--Ya salaka beto !

Vutuka, Afrika ! Vutuka !

Vutuka ! Afrika, vutuka !

Vutuka na Nzambi nge me vila

Beto bika bampeve yonso, biteki yonso,

Beto vutuka n'andi ya salaka beto !

Beto vutuka n'andi ya salaka beto !

II. Revisio –

↑ Na bamposo me luta, beto vandaka kulanda Sanduku ya Nzambi. Yai vandaka kima ya vandaka ntete na nzo ya bisambu ya bantu ya Israele. Yo songaka nde Nzambi vandaka na kati na bo. Lukumu na Yandi monikaka na zulu na yo. Bo nataka yo na kati ya bitumba sambu na nki ?

(Bo yindulaka nde yo ta sadisa bo kubedisa bambeni, bantu ya Filistia.)

↑ Nki mambu ya mbi salamaka na yo ? (Bambeni simbaka yo ti kwendaka na yo.)

↑ Yo bikalaka na kati ya bantu ya Filistia bangonda 7. Na ntangu yina, bantu yina

monaka nki ?

(Kaka bampasi, ndola ya Nzambi. Nzambi basisaka bo bivumbu, ti bampuku kudiaka madia na bo na bilanga.)

↑ Na nsuka, bo salaka nki ti Sanduku yina ? (Bo vutulaka yo na bantu ya Israele, ti makabu kulomba pardo.)

III. Kulonga Leso Yai—

🎯 Kuyantika :

Ntangu yai, Sanduku ya Nzambi me vutuka na Israele. Bo vandaka na kiese mingi na yo. Bo tulaka yo na zulu ya ditadi ya nene na kati ya kilanga na nseke. Kansi, bo waka boma kuvutula yo ve na nzo ya bisambu.

🏠 Developpement (Malongi ya nene ya lesa yai na banti ya malongi 5) :

7.1 Sanduku ya Nzambi lalaka na zulu ya ditadi na nseke bamvula 20. Bantu ya Israele vandaka kaka kudidila Nzambi kugulusa bo na bambeni.

📖 **Tangila bana :** 1 Samuele 7 :2

2 Sanduku ya...Nzambi bikalaka bilumbu mingi kiteso ya bamvula makumi zole (20). Na ntangu yina...bantu ya Israele vandaka kudidila Mfumu Nzambi sambu Yandi sadisa bo.

? Yula bana bakestio.

🏠 Bana sala bageste.

🗣 Bana yimba ti kina.

7.2 Samuele bingaka bo kukatula biteki na bo ti vutuka na Nzambi na ntima na bo yonso. Bo salaka mpidina, ti Samuele sambilaka bo Nzambi.

📖 **Tangila bana :** 1 Samuele 7 :3-6

3 Samuele tubaka na bantu ya Israele nde : « Kana beno zola kwisa kuvutuka na Mfumu Nzambi na ntima na beno yonso, beno fweti katula banzambi yonso ya nzenza ti biteki.... Beno kudipesa mvimba na Mfumu Nzambi. Beno samba kaka Yandi, ebuna Yandi ta gulusa beno na maboko ya bantu ya Filistia.

4 Yo yina, bantu ya Israele katulaka biteki..., bo sambaka kaka Yandi Mfumu Nzambi.

5 Ntangu yai, Samuele bingaka bantu ya Israele yonso nde : « Beno kwisa kisika mosi...mono ta samba Mfumu Nzambi sambu na beno kuna. »


6 Bo yonso kwisaka kukutana.... bo buyaka kudia kilumbu yina ya mvimba, bo tubaka nde : « Beto me sala masumu na meso ya Mfumu Nzambi. »

? Yula bana bakestio.

🏠 Bana sala bageste.

👤 Bana yimba ti kina.

7.3 Bantu ya Filistia kwisaka kunwanina bo, kansi bo landaka kaka kusamba Nzambi.

 **Tangila bana :** 1 Samuele 7 :7-10a

7 Ntangu bantu ya Filistia waka nde bantu ya Israele me kutana..., bamfumu na bo tanu yilamaka ti bantu na bo sambu na kwenda kunwanisa bo. Bantu ya Israele waka mambu yina, ebuna boma simbaka bo.

8 Bo songaka Samuele nde, « Samba kaka Mfumu Nzambi...kulemba ve, sambu Yandi gulusa beto... »

9 Samuele ...sambaka Mfumu Nzambi sambu Yandi sadisa Israele, Mfumu Nzambi mpi ndimaka bisambu na bo.


10a Ntangu Samuele vandaka kupesa makabu na Mfumu Nzambi, bantu ya Filistia kwisaka kunwanisa bantu ya Israele.

? Yula bana bakestio.

🏠 Bana sala bageste.

👤 Bana yimba ti kina.

7.4 Nzambi tindilaka basoda ya Filistia makelele bonso nzasi. Ebuna bo kumaka kisakasaka, bo tinaka. Israele bedisaka bo.

 **Tangila bana :** 1 Samuele 7 :10b-14

10b Kansi na ntangu yo yina kaka, Mfumu Nzambi tindilaka bo makelele ya ngolo bonso

ya nzasi. Bo yonso kumaka kisakasaka, bo tina-tinaka.

11 Bantu ya Israele... kulaka bo Bo fwaka-fwaka bantu ya Filistia na nzila.

12 Samuele bakaka ditadi, yandi tedimisaka yo.... Yandi pesaka yo zina Ebeni-Ezere, sambu yandi tubaka nde : « Mfumu Nzambi me sadisa beto tii bubu. »

13 Mpidina...bantu ya Filistia...Mfumu Nzambi bikaka diaka ve bo kota na ntoto ya Israele na luzingu ya Samuele.

14 Babwala yonso ya bantu ya Filistia botulaka...yo kumaka diaka ya bantu ya Israele. Mpidina, bantu ya Israele bakaka diaka ntoto na bo yonso. Ngemba vandaka na kati ya bantu ya Israele ti bantu ya Kanana.

? Yula bana bakestio.

🏠 Bana sala bageste.

👤 Bana yimba ti kina.

7.5 Samuele landaka kuzuze Israele luzingu na yandi yonso. 1 Samuele 7 :15-17

 **Tangila bana :**

15 Samuele vandaka zuzi ya bantu ya Israele na luzingu na yandi yonso.

16 Konso mvula, yandi vandaka kwenda kutala babwala (tatu) sambu na kusambisa makambu.

17 Ebuna na nima, yandi vandaka kwisa kuvutuka na bwala na yandi Rama sambu na kusambisa makambu. Ko kuna na Rama, yandi tungaka mesa-kimenga sambu na kusamba Mfumu Nzambi.

? Yula bana bakestio.

🏠 Bana sala bageste.

👤 Bana yimba ti kina.

➤|< Kumanisa :

Bantu ya Israele vandaka bantu ya Nzambi solaka kunata Mwana na Yandi na ntoto yai.

Kansi bo me vila nzila ya Nzambi. Yo me samba biteki.

Samuele songaka bo nde kana bo zolaka kuvutuka kieleka na ntima na bo yonso, bo fweti katula biteki yina. Bo fweti vutuka kusamba Nzambi kaka. Bo salaka mpidina, ye Nzambi waka bisambu na bo. Yandi sadisaka bo kubedisa bambeni na bo.

Na beto mpi, Nzambi ta sadisa ve bantu ya zola kusakana na biteki to na banzambi ya nkaka ya fioti-fioti. Kansi kana beto bika biteki na beto, beto vutuka na Nzambi na ntima na beto yonso, Yandi ta sadisa beto.

♥ Verse ya bubu yai :

... « *Kana beno zola/ kwisa kuvutuka na Mfumu Nzambi/ na ntima na beno yonso,/ beno fweti katula banzambi yonso/ ya nzenza ti biteki/...Beno kudipesa mvimba na Mfumu Nzambi./ Beno samba kaka Yandi,/ ebuna Yandi ta gulusa beno...* » 1 Samuel 7 :3

👂 Bankunga ya kwenda nzila mosi ti lesu :

Bana yimba mosi ya bankunga ya kwenda nzila mosi ti lesu yai.

👋 Devoir sambu na bakristo :

Mbala ya nkaka nge kele mukristo, nge banza nde nge kele kulanda banzambi ya nkaka ve. Kansi mbala mingi, bana ya nzo-nkanda kwenda kusosa amulet to nkisi sambu na kusadisa bo na ntangu ya examen. Mambu yai kele ya Nzambi, to ya banzambi ya nkaka ? (Banzambi ya nkaka.)

Mbala mingi, kana muntu ke bela ti yandi beluka nswalu ve, bo kwenda kusosa nganga-ngombo. Keti yai kele ya Nzambi, to ya banzambi ya nkaka ? (Banzambi ya nkaka.)

Mbala ya nkaka beto kwenda ve na banzambi ya nkaka, kansi beto mpi sosa Nzambi ve. Beto sala bonso nde, na ngolo ya beto mosi, beto ta nunga. Bana bakristo, devoir mono ke pesa beno kele nde na mposo ke kwisa, beno sosa Nzambi na mambu yonso, ti sosa Yandi kaka.

✝ Kubinga bavidu na Yesu :

Kana nge me balula ntima na Yesu ntete ve, nge ke na mfunu ya Yandi kugulusa nge. Sosa kuguluka ve na muntu ya nkaka, to na nzila ya nkaka, to na ngolo ya nge mosi. Kaka Yesu, Mwana ya Nzambi, lenda gulusa nge. Bible ke tuba nde, “Bantu lenda guluka kaka na Yandi [Yesu]” (Bisalu 4:12). Tula Yandi ntima, ebuna nge ta guluka.

Konso mposo, beto kele awa na nima ya ecodim sambu na kusadisa konso muntu ya zola balula ntima, bika nzila ya masumu, tula Yesu ntima. Kwisa solula ti beto. Nge lenda kuma longuki ya Yesu bubuyai.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 7

Leso 7



Samuele tulaka ditadi ya Ebeni-Ezere sambu na kubambukisa bo mpila Nzambi me sadisa bo.

**... « Kana
beno zola
kwisa
kuvutuka
na
Mfumu
Nzambi**

**na ntima na beno yonso,
beno fweti katula banzambi yonso
ya nzenza ti biteki...**

**Beno kudipesa mvimba na Mfumu
Nzambi.**

**Beno samba kaka Yandi, ebuna
Yandi ta gulusa beno... »**

1 Samuel 7 :3

Leso 8 Israele sosaka ntotila, Samuele songaka bo bampasi ya ntotila ta nata.

1 Samuele 8 :1-22

I. Preparasio ya Moniteur—

🎯 Kikuma ya lesu :

Bana ta landa nzila ya Nzambi, sambu nzila na beto mosi ke natila beto mpasi.

♥ Verse ya bubu yai :

Mfumu Nzambi,/ mono zaba nde/ ke na muntu ve/ lenda sola nzila/ na yandi mosi.../ Yerima 10 :23a

👤 Bankunga ya kwenda nzila mosi ti lesu :

Mfumu Zaba Nzila Na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

II. Revisio—

↑ Kuyindula diaka baleso me luta :

Na lesu me luta, beto monaka mpila Samuele twadisaka bantu ya Israele kubika biteki na bo, kuvutuka na Nzambi na ntima na bo yonso. Beto monaka mpila Samuele vandaka zuzi ya vandaka kuzenga makambu bwala na bwala luzingu na yandi yonso. Ntangu yai, Samuele me nuna. Yandi me kuma penepene na nsuka ya moyo na yandi.

III. Kulonga Leso Yai—

⇒ Kuyantika :

Keti nge me mona mwana ya zola kima mosi mingi ? Yandi ke bondila mama to papa kupesa yandi yo, kansi kima yina kele kima ya ta pesa yandi mpasi ?

Fami ya mwana mosi zina ya Pepe, bo vandaka na probleme ya bampuku na nzo. Bampuku vandaka kudia madia na bo mingi. Yo yina, mama sumbaka nkisi sambu na kufwa bampuku. Karto na yo vandaka kitoko—kulere ya mbwaki. Pepe zolaka yo sambu na kitoko ya karto. Mama bumbaka yo ti songaka Pepe nde yandi kusimba yo ve. Kansi yandi vandaka kuyuma ntima mingi sambu na yo.

Lumbu mosi mama vandaka kulala mpongi fioti. Ebuna Pepe simbaka ndikila yina. Pwaso. Yandi kudiaka ndambu na yo na ntwala mama telamaka. Yo pesaka yandi maladi mingi. Moyo na yandi zolaka kumana. Kima ya yandi monaka kitoko, yo sadisaka yandi ve. Na lesu yai, beto ta mona nde bantu ya Israele mpi, bo zolaka kima mosi, ata Nzambi songaka bo nde yo ta sadisa bo ve.

🏠 **Developpement (Malongi ya nene ya lesu yai na banti ya malongi 4) :**

8.1 Bantu bondilaka Samuele kupesa bo ntotila bonso bantu ya bansi ya nkaka. Yandi vandaka na kiese ve na yo, kansi yandi tulaka yo na bisambu.

📖 **Tangila bana :** 1 Samuele 8 :1-6

1 Ntangu Samuele me nuna...

4-5 ... bambuta ya Israele kutanaka kisika mosi, ebuna bo kwendaka na Samuele... kusonga yandi nde : « Tala, nge me kuma mbuta, bana na nge mpi ke landa mbandu na nge ve. Yo yina, ntangu yai, tudila beto ntotila yina ta yalaka beto mutindu kele bantu ya bansi ya nkaka. »


6 Samuele monaka kiese ve sambu bantu ya Israele lombaka mfumu. Yo yina, yandi sambaka Mfumu Nzambi.

❓ **Yula bana bakestio.**

🏠 **Bana sala bageste.**

👤 **Bana yimba ti kina.**

8.2 Nzambi songaka Samuele kusala yina ya bo tubaka, kansi kusonga bo mpi nki mutindu ntotila ta sala bo.

 **Tangila bana** : 1 Samuele 8 :7-9

7 Ebuna Mfumu Nzambi tubaka nde : « Landa ndinga ya bantu. Nge ve muntu ya bo ke buya, kansi bo ke buya Mono, nde Mono vanda Mfumu na bo ve... »


9 Mpidina wila bo, kansi pesa bo malongi, songa bo mutindu ntotila yina ta yalaka bo. »

? Yula bana bakestio.

🕯️ Bana sala bageste.

👂 Bana yimba ti kina.

8.3 Samuele songaka bo mutindu Nzambi tubaka, kansi bo landaka kaka kulomba ntotila.

 **Tangila bana** : 1 Samuele 8 :10-20

10 Samuele telaka bantu mambu yonso ya Mfumu Nzambi songaka yandi.

11 Yandi tubaka nde : « Tala mutindu ntotila na beno ta yalaka beno : Bana na beno ya babakala, yandi ta kumisa bo basoda... »

13 Bana ya beno ya bankento ta sadilaka yandi mananasi. Bo ta lambilaka yandi ti kusadilaka yandi mampa.

14 Yandi ta baka-baka bilanga na beno... »

16-17 Yandi ta baka bantu na beno ya kisalu, ti bangombe na beno, ti bampunda na beno ya kuluta kitoko, sambu na kusadilaka yandi...Beno ta kuma bampika na yandi.


18 Na ntangu yango yina, beno ya beno ta dila ngolo sambu na ntotila na beno ya beno mosi me sola, kansi Mfumu Nzambi ta wila beno ve. »

? Yula bana bakestio.

🕯️ Bana sala bageste.

👂 Bana yimba ti kina.

8.4 Bo zolaka kulanda nzila ya bo mosi. Yo yina, Nzambi songaka Samuele kusala mpila bantu zolaka--kupesa bo ntotila.

 **Tangila bana** : 1 Samuele 8 :19-22

19 Bantu ya Israele ndimaka ve...Bo tubaka nde : « Kele ve, tudila beto kaka ntotila. »

20 Mpidina, beto ta vanda bonso bantu ya nkaka ti ntotila na beto mosi na kuyalaka beto ti kunataka beto na bitumba. »

21 Samuele ...kwendaka kutuba yo na Mfumu Nzambi.

22 Mfumu Nzambi vutulaka nde : « Sala mambu ya bo me lomba, pesa bo ntotila. »... »

? Yula bana bakestio.

🕯️ Bana sala bageste.

👂 Bana yimba ti kina.

>|< Kumanisa :

Bana ya Israele me lomba ntotila sambu bo zolaka kuvanda bonso bantu ya bampani. Nzambi me meka kusonga bo nde ntotila yina ta pesa bo mpasi, kansi bo zolaka kuwa ve. Ntangu yai, Nzambi me kangula nzila, bo sala kaka mabanza na bo. Bo ta zwa ntotila na bo, kansi yandi ta pesa bo kiese ve na mpila ya bo ke yindula.

♥ Verse ya bubu yai :

Mfumu Nzambi,/ mono zaba nde/ ke na muntu ve/ lenda sola nzila/ na yandi mosi.../ Yerima 10 :23a

[Bana yonso tuba verse fraze na fraze na nima ya moniteur mbala 3. Na nima, kabisa bana na bandambu 4, ti pesa konso ndambu fraze mosi. Ntangu moniteur songa bo na diboko, bo telama ti tuba fraze na bo. Tuba yo mbala 3 diaka mpila yina.]

👂 Bankunga ya kwenda nzila mosi ti leso :

Yimba mosi ya bankunga ya kwenda nzila mosi ti leso yai.

👋 Devoir sambu na bakristo :

Beno bana bakristo, yindula mbote. Ata nge ke tula ngolo kulanda Yesu, keti na mambu ya nkaka, nge me buya nzila ya Nzambi, me sosa nzila ya nge mosi ? Kana mpidina, balula bubu ti ndima nzila ya Nzambi na mambu yonso.

✝ Kubinga bavidu na Yesu :

Mbala ya nkaka, nge zaba ve nde nge kele mukristo. Nge me wa malongi ya Yesu, kansi nge me bikala na masumu na nge, sambu nge


me pindula mabanza ntete ve. Nge me ndima ve nde Yandi kele Mwana Nzambi ya fwaka na kulunsi sambu na masumu na nge, ti telamaka na lufwa.

Nge ke landa nzila na nge mosi. Kansi nzila yina, nsuka na yo kele lufwa mvu ya mvu. Kana Mpeve ya Nzambi ke bula na ntima na nge, nde nge ke na mfunu ya Yesu, binga zina na Yandi. Tula Yandi ntima bubuyai. Beto kele awa na nima ya ecodim kusadisa nge.

 **Kana ntangu lunga,
Longa mikanda ya Bible.**

==NSUKA YA LESO 8

Leso 8



***Mfumu Nzambi, mono
zaba nde ke na muntu ve
lenda sola nzila na yandi
mosi...***

Yeremia 10 :23a

Leso 9 Israele baka ntotila ya ntete

1 Samuele 9 :1-27, 10 :1-27

I. Preparasio ya Moniteur—

🎯 Kikuma ya lesa :

Bana ta longuka kudipusa mabanza na bo mosi ve, kansi bo tula ntima na Nzambi kutwadisa luzingu na bo.

♥ Verse ya bubu yai :

5 Tula ntima na nge yonso na Mfumu Nzambi, / kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 2 :5-6

👤 Bankunga ya kwenda nzila mosi ti lesa :

Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

Mono Me Sila Kulanda Yesu

Mono me sila kulanda Yesu (3X)
Kuvutuka, yo lunga ve.

Yesu na ntwala, mono na nima (3x)
Kuvutuka, yo lunga ve.

Sadisa mono kulanda Yesu (3x)
Kuvutuka, yo lunga ve.

II. Revisio—

↑ Kuyindula diaka baleso me luta:

Beto me mona nde Nzambi zolaka ve Israele kuvanda na ntotila. Yandi mosi zolaka kuvanda Ntotila kuyala bo. Kansi bo buyaka. Nani bambuka raiso bo zolaka kaka kuvanda na ntotila ? (Ee, sambu bo kuvanda bonso bantu ya bansi ya nkaka.)

Nzambi songaka Samuele nde yandi fweti songa bo nki mutindu luzingu na bo na kuma kana Yandi pesa bo ntotila, kansi bo zolaka kaka nde bo vanda na ntotila. Bo zolaka kuvanda bonso bansi ya nkaka. Yo yina, Nzambi ndimaka.

III. Kulonga Leso Yai—

⇒ Kuyantika :

Ntangu yai, ntangu me lunga nde Nzambi kupesa bo ntotila ya bo lombaka.

🏠 Developpement (Malongi ya nene ya lesa yai na banti ya malongi 5) :

9.1 Nzambi solaka Saule, ebuna Yandi twadisaka yandi na profeti Samuele.

📖 Tangila bana : I Samuele 9 :1-20a

1,3 Kuvandaka na muntu mosi ...zina na yandi Kishi.....Kilumbu mosi, bampunda ya Kishi vilaka, ebuna yandi tubaka na mwana na yandi Saule nde : «...kwenda kusosa bampunda. »

...6 Muntu ya kisalu tubaka na Saule nde : « Na bwala yai, ke na muntu mosi ya Nzambi.... Beto kwenda na yandi, mbala ya nkaka yandi ta songa beto wapi beto lenda mona bampunda....

11-15 Bo kwendaka... ..bo ke mona Samuele ke kwisa....Ntangu Saule vandaka me kuma ntete ve... Mfumu Nzambi tubaka na Samuele nde :

*16 « Mbasi na ntangu yo yai, Mono ta tinda nge muntu ... **Nge tula yandi ntotila ya bantu ya Mono Israele.»***

*17 Ntangu Samuele monaka Saule, Mfumu Nzambi tubilaka Samuele nde : « **Muntu ya Mono tubilaka nge, yandi yai. Yandi muntu ta yalaka bantu na Mono. »***

18-20a Saule kwendaka na Samuele.... Samuele tubaka nde : « ...Sambu na bampunda yina me vila bilumbu tatu me luta, kumona ka nge mpasi ve. Yo me monana. »

? Yula bana bakestio.

🏠 Bana sala bageste.

🗣️ Bana yimba ti kina.

9.2 Samuele songaka Saule lukanu ya Nzambi sambu na yandi.

📖 Tangila bana : 1 Samuele 9 :20b-26

20b Kansi mbote nge zaba ntangu yai nde bantu yonso ya Israele ke vingila kaka nge.... »

21 Saule vutulaka nde : « Nki mutindu ? Mono kele muntu ya ...dikanda ya kuluta fioti na makanda yonso ya Israele. Fami na mono mpi kele mfunu mingi ve...Nki mutindu nge lenda songa mono mambu ya mutindu yai ? »

...26 Kilumbu landaka...Samuele bingaka Saule ... nde : « Beto kwenda. Mono ke fidisa nge... » Ebuna Saule kwendaka nzila mosi ti Samuele.

9.4 Nzambi salaka bidimbu sambu Saule kwikila nde kieleka Yandi me sola yandi kuvanda ntotila.

📖 Tangila bana : 1 Samuele 10 :2-16

2 Awa ya nge ke kwenda, nge ta kuta bantu zole ...bo ta tubila nge nde : « Bampunda ya nge vandaka kusosa, yo me monana...

5 Na nima, nge ta kwenda na bwala Gibe... Na munoko ya bwala, nge ta mona ndonga ya bapofete ...ke bula misiki... Bo ke kina ti kutuba mambu ya Nzambi na ndinga ya ngolo.

6 Mpeve ya Nzambi ta simba nge. Nge ta kuma bonso bo...

7 Kana mambu yai yonso me bwa imene, zaba nde Nzambi kele ti nge. Sala konso kima mutindu nge ta mona yo.

9 Ntangu Saule bikaka Samuele na kuvutuka, Nzambi kumisaka Saule mutindu ya nkaka. Mambu yonso ya Samuele songaka yandi, yo mpi kubwaka kilumbu yo yina.

10 Mpidina...Saule...ndonga ya bapofete kwisaka kukutana na bo. Mpeve ya Nzambi simbaka Saule. Yandi mpi yantikaka kukina ti kutuba mambu ya Nzambi na ndinga ya ngolo bonso bo....

? Yula bana bakestio.

🏠 Bana sala bageste.

🗣️ Bana yimba ti kina.

9.5 Samuele songaka bantu yonso nde Nzambi me tula Saule kuvanda ntotila.

📖 Tangila bana : 1 Samuele 10 :17-27

17 Samuele bingaka bantu yonso ya Israele na kwisa na Nzo-Nzambi...

18-19 Yandi tubaka na bo nde : « Mfumu Nzambi ...ke tuba nde : « Mono....kele Nzambi na beno. ...kansi ntangu yai, beno me buya Mono, beno me zola nde Mono pesa beno ntotila... Beno kwisa na ntwala na Mono beno yonso, konso bantu na dikanda na bo ti fami na bo. »

20-21 Samuele songaka konso dikanda na kuluta na ntwala. Bo bulaka zeke.Yo bwilaka Saule.... Bo sosaka yandi, kansi bo kukaka ve kumona yandi.

22 Bo yulaka Mfumu Nzambi diaka nde : « Keti muntu ya nkaka kele fweti kwisa awa ? » Mfumu Nzambi nde : « Saule yandi yina me bumbana na kati ya bima. »

23 Bantu kwendaka ntinu...Bo tedimisaka yandi. Yandi lutaka bantu yonso na nda.

*24 Samuele tubaka na bantu nde : « **Yandi yai muntu ya Mfumu Nzambi me sola ! ... »** Ebuna bantu yonso tubaka na ndinga ya ngolo nde : « Luzingu ya nda na ntotila ! »...*

? Yula bana bakestio.

🏠 Bana sala bageste.

🗣️ Bana yimba ti kina.

➤|< Kumanisa :

Bana, Nzambi me sola Saule kuvanda ntotila, yo yina Yandi twadisaka na mpila nde yo salama. Saule vandaka ve na mfunu kupusa,

kusonga nde, “Mono fweti sala ngolo sambu mono kuma ntotila.” Ikele ve. Lukanu ya Nzambi sambu na moyo na yandi, yo salamaka kukonda yandi kupusa.

Nzambi kele na lukanu ya mbote sambu na beto yonso ya tula Yandi ntima. Beto ke na mfunu ve na kudipusa. Beto kaka tula ngolo kulanda Nzambi, ebuna yo ta salama.

♥ Verse ya bubu yai :

[Bana tuba verse mbala tatu ndambu-ndambu, fraze na fraze, na nima ya nge moniteur :]

*5 Tula ntima na nge yonso na Mfumu Nzambi./
Kutula ntima ve na mambu/ ya nge mosi ke
yindulaka nde nge zaba./*

*6 Yindula Mfumu Nzambi na mambu yonso/ ya
nge ke salaka. / Yandi ta songa nge nzila ya
mbote. / Bingana 2 :5-6*

[Na nima, bana yika geste. Konso mbala ya bo tuba zina ya Nzambi to ‘Yandi’ ya ke songa Nzambi, bo nangula diboko, kusonga na zulu. Bo tuba yo mbala tatu diaka.]

👁 Bankunga ya kwenda nzila mosi ti leso :

Bana yima mosi ya bankunga ya kwenda nzila mosi ti leso yai.

👋 Devoir sambu na bakristo :

Beno bana ya zaba Yesu dezia, devoir mono ke pesa beno mposo yai, yo yai : beno yantika kulomba Nzambi nde lukanu na Yandi kusalama na luzingu na nge, ata yo vanda nki.

✝ Kubinga bavidi na Yesu :

Kana nge zaba Yesu ntete ve na luzingu na nge, zaba nde Nzambi kele ya santu, ya longo yonso. Yandi lenda ndima ve masumu. Ebuna nge kele na makambu ti Yandi sambu na masumu na nge. Nge lenda ve kutelama na ntwala ya Nzambi ti masumu.

Kaka mpila mosi kele kukatula masumu. Yo lombaka nde Nzambi kutinda Mwana na Yandi ya kitoko, Yesu Kristo, Yandi kufwa na sika ya beto bantu ya masumu. Yandi baka ndola ya Nzambi zolaka kupesa beto. Kansi lufwa lendaka kumanisa Yesu ve. Yandi telamaka na lufwa, ti Yandi kele na moyo bubu ti mvu ya mvu.

Kana nge ta balula ntima ti ndima kulanda Yesu Kristo, Nzambi ta lolula nge. Yandi ta katula masumu yonso ya nge. Yandi ta pesa nge ntima ya mpa, ntima ya zola kupesa Yandi kiese.

Kana nge sosa lusadisu kubalula ntima ti kuyamba Yesu, kwisa tala beto na nima ya ecodim. Beto ta sadisa nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 9

Leso 9



***5 Tula ntima na nge yonso na Mfumu Nzambi.
Kutula ntima ve na mambu ya nge mosi ke
yindulaka nde nge zaba.***

***6 Yindula Mfumu Nzambi na mambu yonso
ya nge ke salaka. Yandi ta songa nge nzila
ya mbote.***

Bingana 2 :5-6

Leso 10 Saule bedisala bantu ya Ammoni, ebuna bantu yonso ndimaka yandi bonso ntotila.

1 Samuele 11 :1-15

I. Preparasio ya Moniteur—

🎯 Kikuma ya lesu :

Bana ta sala ntete mambu ya mbote ya Nzambi ke songa bo sesepiyai, sambu kana bo zola mambu kusalama mbote, bo fweti yantika mbote.

♥ Verse ya bubu yai :

Bana ta landa diaka kulonguka verse ya mposo me luta :

5 Tula ntima na nge yonso na Mfumu Nzambi./ Kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 3 :5-6

🗣️ Bankunga ya kwenda nzila mosi ti lesu :

Bana ta yimba bankunga kiteso mosi bonso na mposo me luta :

Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nz'ila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

Mono Me Sila Kulanda Yesu

Mono me sila kulanda Yesu (3X)
Kuvutuka, yo lunga ve.

Yesu na ntwala, mono na nima (3x)
Kuvutuka, yo lunga ve.

Sadisa mono kulanda Yesu (3x)
Kuvutuka, yo lunga ve.

II. Revisio—

† Kuyindula diaka baleso me luta:

Na bamposo zole me luta, beto me mona nde Nzambi solaka nani kukuma ntotila ya ntete ya Israele ? (Saule)

Nani profete ya Nzambi ya tulaka Saule mafuta na zulu ya ntu sambu na kusonga nde Nzambi me tula yandi ntotila ? (Samuele)

III. Kulonga Leso Yai—

➡ Kuyantika :

Nzambi me pesa Saule kisalu ya kusala. Kuvanda ntotila. Kuyala bantu na Yandi, Israele. Kuvanda ntotila kele kisalu mosi ya nene.

Mambu ya ntete na konso kisalu kele KUYANTIKA. Nki mutindu Saule ta yantika kisalu Nzambi me pesa yandi ? Keti yandi ta yantika mbote ?

🏠 Developpement (Malongi ya nene ya lesu yai na banti 4) :

10.1 Mambu ya mawa bwaka nswalu. Bantu ya Ammoni zolaka kubaka bwala Yabeshi ya Israele. Bo nde : bantu ya Yabeshi zinga kaka kana bo tobula bo disu !

📖 Tangila bana : 1 Samuele 11 :1-4

1 ...Ntotila ya bantu ya Amoni kwisaka kunwanisa bwala Yabeshi.... Basoda na yandi ziungaka bwala. Ebuna bantu ya Yabeshi tubilaka Nahashi nde : « Beto wakana, ebuna beto ta ndima nge na kuvanda ntotila na beto. »

2 Nahashi tubaka nde : « Mono ta wakana na beno KAKA kana beno ndima nde mono tobula konso muntu disu na yandi ya kibakala, mpidina mono ta pesa bantu yonso ya Israele nsoni. »

3 Bambuta ya Yabeshi nde : « Pesa beto bilumbu nsambwadi.... Kana ata muntu mosi kwisa ve na kusadisa beto, beto ta kwisa kudipesa na nge. »

4 Nsangu kumaka na... bwala ya Saule.
Bantu yonso waka yo. Bo yantikaka kudila.

- ? Yula bana bakestio.
- 🏠 Bana sala bageste.
- 👤 Bana yimba ti kina.

10.2 Ntangu Saule waka mambu yina, Mpeve ya Nzambi fulusaka yandi na makasi ya longo. Yo yina, yandi bingaka bantu ya batribu yonso ya Israele kusadisa bantu ya Yabeshi.

📖 **Tangila bana** : 1 Samuele 11 :5-8

5 Na ntangu yo yina, Sauleyulaka nde :
« Nki mambu ? Sambu na nki bantu ke dila-
dila ? Bo zabisaka yandi mambu ya bantu ya
bwala Yabeshi tubaka.

6 Ntangu Saule waka mambu yango, Mpeve
ya Nzambi simbaka yandi, yandi waka
makasi.

7-8 (Somere) Saule bingaka bantu ya
makanda yonso ya Israele kukwisa sadisa bo
na bitumba....Bantu ...300,000.

- ? Yula bana bakestio.
- 🏠 Bana sala bageste.
- 👤 Bana yimba ti kina.

10.3 Bantu ya Israele bedisaka bantu ya Ammoni ya vandaka kuyangisa bo.

📖 **Tangila bana** : 1 Samuele 11 :9-11

9 (Somere : Bampangi tindaka message na
bantu ya Yabeshi nde bo ta kwisa kusadisa
bo.) Bantu ya bwala Yabeshi monaka kiese
mingi ntangu bo bakaka nsangu yai.

10 Bo tubaka na Nahashi... nde : « Mbasi
beto ta kudipesa na beno. Ebuna beno ta
sala beto mutindu beno zola. »

11 Kilumbu landaka na suka-suka, Saule
kabisaka bantu na yandi na ndambu tatu. Bo
kotaka na camp ya bambeni. Bo nwanisaka
bantu ya Amoni....katuka suka tii midu.
Bayina bikalaka na moyo, bo tinaka....

- ? Yula bana bakestio.
- 🏠 Bana sala bageste.
- 👤 Bana yimba ti kina.

10.4 Saule buyaka kufwa bantu ya vandaka kutula ntembe sambu na luyalu na yandi. Ebuna bantu yonso ndimaka yandi kuvanda ntotila na bo.

📖 **Tangila bana** : 1 Samuele 11 :12, 10 :27,
11 :13-15

12 Ntangu yai, bantu ya Israele tubaka na
Samuele nde : « Wapi bantu yina vandaka
kutuba nde Saule ta vanda ntotila na beto
ve ? Pesa beto bo, beto fwa bo yonso. »

(Sambu na ntangu Samuele songaka Saule
bonso ntotila,) 10 :27 ... bantu ya nkaka ya
mpamba vandaka kutuba nde : « Yandi yai,
na nki yandi ta sadisa beto ? » Bo tongaka
yandi, bo natilaka yandi mpi ata kado ve.
Kansi Saule salaka bonso nde yandi me wa yo
ve.

11 :13 Kansi Saule tubaka nde : « Ata muntu
ta fwa ve bubu, sambu bubu kele kilumbu ya
Mfumu Nzambi gulusaka Israele. »

14 Samuele tubaka na bantu ya Israele nde :
« Beto kwendeno ...sambu beto ndima diaka
nde Saule kele ntotila na beto. »

15 Yo yina, bo yonso kwendaka ... ebuna kuna
na ntwala ya Mfumu Nzambi, bo tubaka nde
Saule kele ntotila ya Israele. Bo pesaka
makabu...na Mfumu Nzambi. Ebuna Saule ti
bantu yonso yantikaka kusepela mingi.

- ? Yula bana bakestio.
- 🏠 Bana sala bageste.
- 👤 Bana yimba ti kina.

➤|◀ **Kumanisa** :

Saule yantikaka mbote bonso ntotila ya Israele.
Yandi vandaka na boma ve kunwanisa bambeni
ya zolaka kuyangisa bantu na yandi Israele.
Yandi mpi lolulaka bantu ya ndimaka yandi
nswalu bonso ntotila. Beto ta mona na nima,
kana yandi ta landa kusala mbote tii na nsuka.

Kansi kuyantika, yandi me yantika mbote.

Beto mpi, na konso mambu ya kele na ntwala na beto, na ngolo ya Nzambi beto fweti tula dikulu mosi na ntwala. Beto fweti yantika.

 **Verse ya bubu yai :**

*5 Tula ntima na nge yonso na Mfumu Nzambi./
Kutula ntima ve na mambu/ ya nge mosi ke
yindulaka nde nge zaba./*

*6 Yindula Mfumu Nzambi na mambu yonso/ ya
nge ke salaka. / Yandi ta songa nge nzila ya
mbote. / Bingana 3 :5-6*

Bana tuba yo mbala zole. Na nima, pesa bana nzila kutuba yo mosi-mosi. Mwana mosi yantika, kansi na kati-kati, nge songa kidimbu nde yandi bika. Yandi songa mwana ya nkaka, ya fweti landa verse sika ya yandi me bika.

 **Bankunga ya kwenda nzila mosi ti lesu :**

Bana yimba mosi ya bankunga ya ke kwenda nzila mosi ti lesu yai.

 **Devoir sambu na bakristo :**

Beno bana bakristo, beno ya zaba nde dezia beno me yamba Yesu na luzingu ya beno, devoir mono ke pesa beno, yo yai : Bana mingi me yantika ntete ve kutanga to kuwa ndambu malongi ya Bible konso lumbu. Mono ke lombana na beno na mposo yai kuyantika. Kana Bible kele ve, to kana nge me longuka kutanga ntete ve, sosa mpangi ya lenda tangila nge. Kaka ndambu ya baverse konso lumbu. Ebuna yindula lumbu ya mvimba malongi ya nge me wa. Yantika.

 **Kubinga bavidi na Yesu :**

Kansi mbala ya nkaka nge me zaba ntete ve nde Yesu me gulusa nge. Mwana ya Nzambi Yesu Kristo me bika nzo ya kitoko na Yandi na zulu, me kulumuka awa na nsi-ntoto yai, sambu na kugulusa nge. Yandi salaka yo sambu nge lenda vutuka na kintwadi ti Nzambi. Yandi me sala yonso ya mfunu sambu na nge, ntangu Yandi fwaka na zulu ya kulunsi. Kana ntima ke songa nge nde, nge ke na mfunu na Yandi, yina Mpeve ya Nzambi. Kuwa ndinga

na Yandi. Binga zina ya Yesu. Balula ntima bubuyai.

Kana nge ke na mfunu ya lusadisu na mambu yai, beto kele konso ntangu awa na nima ya ecodim sambu na kusadisa nge.


Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 10

Leso 10 Beto baka Bingana 3 :5-6 diaka.



5 Tula ntima na nge yonso na Mfumu Nzambi. Kutula ntima ve na mambu ya nge mosi ke yindulaka nde nge zaba.

6 Yindula Mfumu Nzambi na mambu yonso ya nge ke salaka. Yandi ta songa nge nzila ya mbote.

Bingana 3 :5-6

Leso 11 Samuele pesaka message ya nsuka.

1 Samuele 12 :1-25

I. Preparasio ya Moniteur—

🎯 Kikuma ya lesu :

Kana mwana zaba nde yandi me vila nzila ya Nzambi ndambu, yandi vutuka nswalu, yandi landa Yandi diaka.

♥ Verse ya bubu yai :

Samuele vutulaka nde :/ « Beno wa boma ve./ Ya kieleka, beno me sala mbi./ Kansi ata mpidina, / beno bikisa Mfumu Nzambi ve./ Beno sadila Yandi/ na ntima na beno yonso. »
1 Samuele 12 :20

🗣️ Bankunga ya kwenda nzila mosi ti lesu :

Mono Me Sila Kulanda Yesu

Mono me sila kulanda Yesu (3X)
Kuvutuka, yo lunga ve.

Ata mono mosi (3X)
Ee, mono ta landa
Kuvutuka, yo lunga ve.

Vutuka, Afrika ! Vutuka !

Vutuka ! Afrika, vutuka !
Vutuka na Nzambi nge me vila

Beto bika bampeve yonso, biteki yonso,
Beto vutuka n'andi ya salaka beto !
Beto vutuka n'andi ya salaka beto !

II. Revisio—

👆 Kuyindula diaka baleso me luta:

Na mposo me luta, beto monaka nde mbeni mosi kwisaka kunwanisa bantu ya Israele ya bwala Yabeshi. Ntangu Ntotila Saule waka yo, yandi bingaka bampangi sambu na kusadisa bo, ti Nzambi sadisaka bo kununga. Yo yina, bantu yonso vandaka na kiese kubinga Saule ntotila na bo. Saule yantikaka kisalu na yandi na mpila mosi ya mbote, to ya mbi ? (Ee, ya mbote.)

III. Kulonga Leso Yai—

➡ Kuyantika :

Nani bambuka zina ya prophete ya tulaka Saule Ntotila ? (Ee, Samuele. Yandi vandaka profeti, mpi nsuka ya bazuzi.)

Sambu na nki Nzambi songaka Samuele kutula Saule ntotila ? (Sambu bantu vandaka kubuya Nzambi bonso mfumu na bo. Bo sosaka kaka kuvanda bonso bansi ya nkaka ya vandaka na ntotila.) Bubuyai, beto me kuma penepene na nsuka ya moyo ya Samuele. Yandi zola pesa malongi na yandi ya nsuka na bantu ya Israele.

🏠 Developpement (Malongi ya nene ya lesu yai na banti 4) :

11.1 Samuele bingaka bantu ya Israele sambu bo kuwa malongi ya nsuka na yandi.

📖 **Tangila bana :** 1 Samuele 12 :1-2

*1 Samuele tubilaka bantu ya Israele nde :
« Mono me sala mambu yonso ya beno zolaka. Mono me pesa beno ntotila ya kuyala beno.*

2 Ntangu yai, beno fweti landa yandi. Mono, mono me kuma mbuta...

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

11.2 Bo ndimaka nde Samuele me sala bo ata mbi mosi ve.

📖 **Tangila bana :** 1 Samuele 12 :3-5

3 Mono yandi yai. Kana mono salaka kima ya mbi, beno songa mono yo ntangu yai na meso ya Mfumu NzambiKeti mono salaka muntu nku, to mono monisaka yandi mpasi ?
....

4 Bantu ya Israele tubaka nde : « Nge salaka beto nku ve. Nge monisaka beto mpasi ve. »

5 Samuele nde : « Mfumu Nzambi ti ntotila ya yandi me tula kele bantemwe na mono bubu yai, beno me mona nde mono me sala


ka mono mbi ve. » Bo nde : « E, yo kele mpidina. »

? Yula bana bakestio.

🏠 Bana sala bageste.

👤 Bana yimba ti kina.

11.3 Samuele bambukisaka bo bampila ya Nzambi me sadisa bo, ti masumu ya bo salaka kusosa ntotila.

 **Tangila bana : 1 Samuele 12 :6-13**

6-7 Samuele tubaka diaka nde :Ntangu yai, atasio ! ... Mono tangila beno na meso ya Mfumu Nzambi mambote yonso ya Yandi salaka na kugulusa beno....

8 Ntangu Yakobi ti fami na yandi kwendaka na nsi ya Ezipte ti kumona mpasi na maboko ya bantu ya Ezipte, bankaka na beno didilaka Mfumu Nzambi... ebuna Yandi tindaka Moize ti Aroni na kubasisa bo na Ezipte ti kwisa kunata bo na ntoto yai.

9 Kansi bo vilaka Mfumu Nzambi... ebuna Yandi tindaka (bambeni na kunwanisa beno).

10 Bo didilaka Mfumu Nzambi diaka na kusadisa bo nde : « Beto me sala masumu, sambu beto me bika nge Mfumu Nzambi, na kwenda kusamba banzambi Baale ti Astarte. Gulusa beto na maboko ya bambeni, ebuna beto ta sambaka Nge. »

11 Ntangu yai, Mfumu Nzambi tindaka (bazuzi)... Bo gulusaka beno na maboko ya bambeni, ebuna beno zingaka na ngemba.

12-13 Ebuna ...beno buyaka Mfumu Nzambi na kuvanda ntotila na beno, beno tubaka na mono nde : ‘Tudila beto ntotila na kuyalaka beto.’ Ntangu yai, ntotila yai ya beno sosaka...


? Yula bana bakestio.

🏠 Bana sala bageste.

👤 Bana yimba ti kina.

11.4 Samuele bondilaka bo kuvutuka kulanda Nzambi. Yandi songaka na kidimbu nene ya masumu na bo ya kulomba ntotila ti bondilaka

bo vutuka na Nzambi. Bo sosa biteki diaka ve.

 **Tangila bana : 1 Samuele 12 :14-25**

14 Kana beno zitisa Mfumu Nzambi, Nzambi na beno, kana beno sadilaka kaka Yandi... kana beno landa Yandi mbote-mbote, beno ti ntotila na beno, mambu yonso ta vanda mbote.

15 Kansi, kana beno lemfuka na Mfumu Nzambi ve...Yandi ta buya beno...

16 Ntangu yai, atasio ! Beno tala mambu ya nene ya Mfumu Nzambi ke sala awa na meso na beno.

17 Yai kele ntangu ya musibu, mpidina ve ? Mono ke samba Mfumu Nzambi, ebuna beno ta mona nki mutindu Yandi ta tinda nzasi ti mvula. Beno ta zaba nde beno salaka mbi mpenza na...Nzambi na kulomba Yandi ntotila.

18-19 Samuele sambaka Mfumu Nzambi, ebuna kilumbu yo yina, Nzambi tindaka nzasi ti mvula. Bantu yonso ...tubaka na Samuele nde : « Pardo, sambila beto Mfumu Nzambi na nge, mpidina beto fwa ve. Sambu beto me yika masumu ya nkaka na kulomba Yandi ntotila. »

20 Samuele vutulaka nde : « Beno wa boma ve...Beno me sala mbi, kansi ata mpidina, beno bikisa Mfumu Nzambi ve. Beno sadila Yandi na ntima na beno yonso. »

[Moniteur, verse yai kele verse ya bana ta longuka bubu. Bo tuba yo mbala mosi fraze na fraze na nima ya nge. Bo ta tuba yo kuluta na nima.]

21 Beno kwenda ve kusamba banzambi ya luvunu. Bo ta kuka ve kusadisa beno to kugulusa beno...Bo kele banzambi ya mpamba.

22 Mfumu Nzambi ta bika beno ve ata fioti, sambu Yandi mosi me zengaka nde Yandi ta kumisa beno bantu na Yandi....

24-25 Beno zitisa Mfumu Nzambi. Beno sadila Yandi na ntima mosi ya mbote. Beno vila ve mambu ya nene ya Yandi salaka sambu na beno. Kansi, kana beno ke landa kaka na kusala mbi, beno ti ntotila na beno, beno ta fwa. »

►|◀ Kumanisa :

Bantu ya Israele monaka nde, kieleka bo me sala mbi. Kansi yina ke songa ve nde bo bika kulanda Nzambi, kansi bo vutuka na Yandi.

Ata beto bakristo ke zola kulanda Nzambi, mbala na mbala beto lenda mona nde, “O, mono me sala mbi ! Yai ya mono me sala, yo me pesa Nzambi kiese ve.” Ntangu yina, beto bika Nzambi ve kimakulu. Beto vutuka na Yandi. Beto vutuka na nzila, ebuna Yandi ta yamba beto diaka.

♥ Verse ya bubu yai :

*Samuele vutulaka nde :/ « Beno wa boma ve./ Ya kieleka, beno me sala mbi./ Kansi ata mpidina, / beno bikisa Mfumu Nzambi ve./ Beno sadila Yandi/ na ntima na beno yonso. »
1 Samuele 12 :20*

[Moniteur, kabisa bana na bandambu zole. Bo tuba fraze na fraze na nima na nge. Ndambu mosi ya bana tuba fraze mosi, ndambu ya zole tuba fraze ya landa.]

🗣️ Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

👉 Devoir sambu na bakristo :

Beno bakristo, devoir mono ke pesa beno bubuyai kele kudyula, Keti mono me vila nzila ya Nzambi, ata ndambu? Kana nge mona mbi mosi ya nge me sala, kwenda nswalu na Nzambi kulomba pardo, mpi kuvutuka na nzila na Yandi.

✝️ Kubinga bavidi na Yesu :


Beno ya me yamba Yesu ntete ve, ntangu yai mono ke tuba na beno. Kana nge mona ndinga ya fioti ke tuba nde, “Nge ke na mfunu ya Yesu,” yai kele Mpeve ya Nzambi ke bula na ntima na nge. Yesu kwisaka, ti Yandi fwaka na sika na nge sambu nge lenda zaba Nzambi. Yandi telamaka na lufwa sambu nge lenda baka moyo ya mvu ya mvu. Kana nge zola kulanda Yandi, binga zina na Yandi. Balula ntima, ti Yand ta yamba nge.

Kana ntangu lunga,

📖 Longa mikanda ya Bible. Bangindu ke monika na nsuka ya mukanda yai.

==NSUKA YA LESO 11

Leso 11



Samuele vutulaka nde :

***« Beno wa boma ve. Ya kieleka,
beno me sala mbi.***

***Kansi ata mpidina, beno bikisa
Mfumu Nzambi ve.***

***Beno sadila Yandi na ntima na
beno yonso. »***

1 Samuele 12 :20

Leso 12 Saule pesaka nkailu ya Nzambi me pesa yandi kiyeka ya kupesa ve.

1 Samuele 13 :1-23

I. Preparasio ya Moniteur—

🎯 Kikuma ya lesa :

Bana ta ndima sika ya Nzambi me tula bo, bo kwenda ve na luzolo na bo mosi kusosa sika ya nkaka.

♥ Verse ya bubu yai :

Samuele tubaka nde :/ « Nge me sala buzoba !/ Nge me lemfuka ve na nsiku/ yina ya Mfumumu Nzambi/ ... pesaka nge.... »

1 Samuele 13 :13a

👂 Bankunga ya kwenda nzila mosi ti lesa :

Ee, Mfumumu, Ee

Ee, Mfumumu, ee
Na yonso ya Nge tuba
Ee, Mfumumu, ee
Mono zola lemfuka

Mvutu :

Bu mo' tanga Bibila
Mono kaka ta ndima
Ye mono ta tuba ee,
Mfumumu, ee !

Mono Ta Mona Kiese

Mono ta mona kiese (3x)
Na yonso Nzambi me pesa

Mo' ta yuma ntima ve (3x)
Na sika ya bantu ya nkaka

Nzambi na mono zaba (3x)
Nki kele mbote na mono.

II. Revisio—

† Kuyindula diaka baleso me luta :

Na mposo me luta, beto monaka nde muntu mosi me kwisa penepene na nsuka ya moyo na yandi.

Muntu yina nani? (Ee, Samuele)

Samuele pesaka Israele conseye nde bo landa kaka nzila ya Nzambi. Nani ta bikala kuyala bo? (Ee, Saule. Samuele me tula yandi ntotila.)

III. Kulonga Leso Yai—

➡ **Kuyantika :** Beto me mona nde Saule me yantika mbote bonso ntotila ya Israele. Keti yandi ta landa conseye Samuele me pesa ? Keti yandi ta landa kaka nzila ya Nzambi ti bansiku ya Yandi me pesa bo ?

🏠 **Developpement (Malongi ya nene ya lesa yai na banti 4) :**

12.1 Bantu ya Filistia vandaka kumonisa bantu ya Israele mpasi. Yo yina, Saule bingaka bantu ya Israele kunwanisa bo.

📖 **Tangila bana :** 1 Samuele 13 : 19-22, na nima, 2-6.

Mpila mbeni Filistia vandaka kumonisa bo mpasi--

19 Na ntangu yina, ... bantu ya Filistia zolaka ve nde...(bantu ya Israele) kusala bambele ya bitumba ti makonga.

20-21 Yo yina, bantu ya Israele vandaka kwenda na babwala ya bantu ya Filistia na kutula bima na bo makasi, bonso bansengo, basoka, ti bambele. Bo vandaka kufuta ...

22 Yo yina, na kilumbu ya bitumba, ata soda mosi ve ya Israele vandaka na mbele to dikonga. Kaka Saule ti mwana na yandi Yonatani.

Mpila Saule bingaka bantu ya Israele--

2 Saule solaka bantu ya Israele 3,000 : 2,000 bikalaka ti yandi na bwala ... 1,000 bikalaka ti mwana na yandi Yonatani... Kansi bayina ya nkaka, yandi vutulaka bo yonso na babwala...

3-4 Yonatani fwaka mfumu ya basoda ya Filistia.... Saule tindaka bantu na kubula mpungu na ntoto ya mvimba sambu na kuzabisa bantu yonso ebuna bantu ya Filistia, me wa makasi mpenza. Yo yina, bantu ya Israele kwendaka kukuta Saule na bwala Gilgale.

5 Bantu ya Filistia kwisaka kunwanisa bantu ya Israele. Bo vandaka na bapusupusu..., bantu ya bampunda..., ti basoda mingi-mingi, mpila ya kutanga bo...ve. Bo kwendaka na bwala Mikmasi... Bo tulaka camp na bo kuna.

6 Bo nwanisaka bantu ya Israele ngolo, ebuna ...bantu ya nkaka kwendaka kubumbana na mabulu ya mutindu na mutindu, ti na nsi ya matadi.

? Yula bana bakestio.

🏠 Bana sala bageste.

👤 Bana yimba ti kina.

12.2 Na nima ya kuinga Samuele bilumbu 7, Saule bakaka sika ya nganga-Nzambi kupesa nkailu yina.

📖 Tangila bana : 1 Samuele 13 :7-9

7 Bankaka sabukaka nzadi ya Yordani. Bo tinaka.... Saule vandaka kaka na bwala Gilgale. Bantu yina vandaka ti yandi yantikaka kutekita na boma.

8 Saule vandaka bilumbu nsambwadi na kuingila Samuele mutindu yandi tubaka, kansi Samuele kwisaka ve.... Bantu yantikaka kutina Saule,

9 yo yina, yandi tubaka na bo nde : « Beno natila mono bambisi sambu na kupesa makabu....

? Yula bana bakestio.

🏠 Bana sala bageste.

👤 Bana yimba ti kina.

12.3 Ntangu yina, Samuele vutukaka. Yandi nde, Nzambi ke na kiese ve sambu Saule me sala na sika ya nganga-Nzambi. Nzambi pesaka yandi sika yina ve.

📖 Tangila bana : 1 Samuel 13 :10-13

10 Yandi na kumanisa mpidiyai, Samuele ...kwisa kukuma....

11 ... Samuele tubaka nde : « Nki nge me sala mpidina ? » Saule vutulaka nde :

« Mono monaka nde bantu me yantika kutina-tina, ntangu mpi ya nge tubaka na kwisa yo me luta. Yo mpi bantu ya Filistia ke kutana na bwala Mikmasi.

12 Mono yindulaka nde : ‘Bantu ya Filistia ke kwisa kunwanisa mono awa ... ebuna mono me samba ntete ve Mfumu Nzambi na kusadisa beto.’ Yo yina, mono me mona nde mono mosi fweti pesa yandi makabu. »

13 Samuele tubaka nde : « Nge me sala buzoba ! » Nge me lemfuka ve na nsiku yina ya Mfumu Nzambi... pesaka nge. Kana nge landaka yo, Yandi zolaka kubika nge ti bana na nge, beno yala Israele tii kuna.

? Yula bana bakestio.

🏠 Bana sala bageste.

👤 Bana yimba ti kina.

12.4 Ndola ya masumu ya Saule yo yai : kimfumu na yandi ta telama ve. Nzambi ta sosa ntotila ya nkaka, yina ta vanda ntima mosi ti Yandi.

📖 Tangila bana : 1 Samuele 13 :14

14 Kansi ntangu yai, kimfumu na nge ke zinga ve. Dezia Mfumu Nzambi me sosa muntu ya nkaka yina ta pesa Yandi kiese. Yandi me tula yandi ntotila ya bantu na Yandi, sambu nge...me lemfukila Yandi ve.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Nzambi pesaka Saule kisika ya mbote— kuvanda ntotila, kuyala bantu. Nzambi me songaka bo ntama nde kaka banganga-Nzambi lenda pesa makabu ya mbisi na Nzambi. Kansi Saule pesaka boma na yandi nzila kuyala yandi. Yandi lemfukaka ve na nsiku Nzambi me pesa bo. Yandi kwendaka kusimba kisalu ya kinganga na kingolo kaka. Nzambi vandaka ve kiese sambu yandi me simba sika ya Yandi me pesa Saule ve. Yo yina, Yandi tubaka nde Yandi ta sukisa luyalu ya Saule ti fami na yandi.

♥ **Verse ya bubu yai :**

*Samuele tubaka nde:/ « Nge me sala buzoba !/
Nge me lemfuka ve na nsiku/ yina ya Mfumu
Nzambi/ ... pesaka nge.... »
1 Samuele 13 :13a*

👂 **Bankunga ya kwenda nzila mosi ti lesu :**

Bana yimba mosi ya bankunga ya kwenda nzila mosi ti lesu yai.

👋 **Devoir sambu na bakristo :**

Beno bakristo, mono ke yula beno mosi-mosi :
Nki sika Nzambi me pesa nge na luzingu na nge sesepiyai ? Keti nge kele mwana ya nzo-nkanda ? Vanda na kiese na yo, ti sala ngolo. Keti nge kele choriste ? Ndimba kimalu yina, ti sala yo mbote. Nge kele mwana na nzo ? Kuyuma ntima ve kuvanda mbuta. Ndimba ti sala na kiese na sika ya Nzambi me pesa nge bubuyai.

Keti nge kele nkento ? Kuyindula ve nde, “A, kana mono vandaka bakala.” Keti nge kele bakala? Vanda na kiese na yo na mpila ya Nzambi salaka nge. Sosa kuvanda nkento to bakala ya ke pesa Nzambi kiese.

✝ **Kubinga bavidi na Yesu :**

Kansi, zaba mbote nde kana nge me balula ntima ti yamba Yesu ve na luzingu na nge, nge lenda ve pesa Nzambi kiese. Masumu yonso ya nge me sala katuka kimwana ya fioti na nge tii bubuyai, yo kele kaka. Yo ke kanga nge nzila kuvanda na kintwadi ti Nzambi. Yo ke kanga nge nzila kukota na bwala na Yandi.

Nzambi me pesa beto nzila mosi kukatula masumu yina. Nzila yina kele Mwana na Yandi Yesu Kristo ya fwaka sambu na beto ti telamaka na lufwa. Kana nge zaba ve mbote-mbote nde nge kele mwana ti mulandi na Yandi, mono ta vanda na kiese kusadisa nge na nima ya ecodim bubuyai.


Kana ntangu lunga,

📖 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 12

Leso 12



Samuele tubaka nde: « Nge me sala buzoba !

Nge me lemfuka ve na nsiku yina ya Mfumu Nzambi ... pesaka nge.... »

1 Samuele 13 :13a

Leso 13 Nzambi buyaka Saule sambu yandi lemfukaka ve diaka.

1 Samuele 15 :1-28

I. Preparasio ya Moniteur—

🎯 Kikuma ya lesu :

Bana ta tula ngolo kulemfuka mbote-mbote na yonso ya Nzambi me songa bo na ndinga na Yandi.

♥ Verse ya bubu yai :

Samuele nde :/ «Nki Mfumu Nzambi ke zola mingi :/ kulemfuka, to kupesa makabu ?/ Zaba nde, kulemfuka na Nzambi/ kuluta kupesa Yandi makabu... / 1 Samuele 15 :22

🗣️ Bankunga ya kwenda nzila mosi ti lesu :

BI-BI-LA !

Bii-bi-la !

Beto ta tanga yo !

Lomba, ebuna **lemfuka** na

Bii-ii-bi-la !

Ee, Mfumu, Ee

Ee, Mfumu, ee

Na yonso ya Nge tuba

Ee, Mfumu, ee

Mono zola lemfuka

Mvutu :

Bu mo' tanga Bibila

Mono kaka ta ndima

Ye mono ta tuba ee,

Mfumu, ee!

II. Revisio—

↑ Kuyindula diaka baleso me luta:

- Nzambi tulaka nani ntotila ya ntete ya Israele?
(Saule)
- Keti Saule yantikaka mbote to mbote ve ?
(Mbote)
- Yandi yantikaka mbote, kansi nswalu yandi me sala disumu mosi ya Nzambi

zolaka ve. Yandi kwendaka kubaka nki kisika ya Nzambi pesaka yandi ve ?
(Sika ya nganga-Nzambi)

III. Kulonga Leso Yai—

➡ Kuyantika :

Na nima Saule kumaka mfumu, yandi ti mwana na yandi Yonatani nwanaka bitumba mingi. Bo fweti sala yo, sambu bambuta na bo lemfukaka ve na ndinga ya Nzambi, nde bo katula bantu yonso ya mbi na ntoto yina. Bo bikisaka bantu yina ndambu-ndambu, ti bantu yina kumaka bambeni ya vandaka kuyangisa bo ngolo. Mosi ya bantu yai vandaka tribu to dikanda ya Amaleki.

🏠 Developpement (Malongi ya nene ya lesu yai na banti ya malongi 4) :

13.1 Nzambi songaka Saule kumanisa bantu ya Amaleki, kubika muntu mosi ve na kati na bo kuzinga. Kaka yandi wila bantu ya Keni mawa.

📖 Tangila bana : 1 Samuele 15 :1-6

1-2 Samuele tubaka na Saule nde : «Kuwa ntangu yai mambu ya Mfumu Nzambi...ke tuba : 'Mono me zenga nde Mono ke pesa bantu ya Amaleki ndola...

3 Mpidina kwenda kunwanisa bo . Nge fwa bo yonso kimakulu ti bima na bo yonso. Kubikisa ata kima ve. Fwa bantu yonso ti bambisi yonso ... ' »

4 Saule bingaka basoda na yandi... Yandi tangaka bo. Bo vandaka (MINGI).

5 Ebuna yandi nataka bo penepene na bwala ya bantu ya Amaleki. Bo bumbanaka na kisika mosi....


6 Yandi tindaka ndinga na bantu ya Keni nde : « Beno katuka pana, beno vanda ve kisika mosi ti bantu ya Amaleki....» Ebuna bantu ya Keni katukaka.

❓ Yula bana bakestio.

🏠 Bana sala bageste.

🗣️ Bana yimba ti kina.

13.2 Saule bedisaka bantu ya Amaleki, kansi yandi salaka yonso ve na mpila ya Nzambi tubaka.

 **Tangila bana :** 1 Samuele 15 :7-9

7-8 Saule bedisaka bantu ya Amaleki... kansi mfumu na bo Agagi, yandi tulaka yandi na boloko.


9 ...Bo fwaka mpi ve bambisi ya kuluta kitoko-bangombe, mameme, bana bangombe ya mafuta, ti bana-mameme, ti konso kima ya mbote, kansi bo fwaka bima yonso ya mpamba ti ya kukonda mfumu.

? Yula bana bakestio.

 **Bana sala bageste.**

 **Bana yimba ti kina.**

13.3 Samuele kwisaka na Saule kusonga yandi nde yandi me sala mbi, kansi Saule monaka bonso yandi me sala mbote.

 **Tangila bana :** 1 Samuele 15 :10-21

10-11 Mfumu Nzambi tubaka na Samuele nde : « Mono ke mona mawa sambu mono solaka Saule na kuvanda ntotila...sambu yandi me landa ve bansiku na Mono. » ...

12-13 ...(Samuel) kwendaka kusosa Saule....Saule pesaka yandi mbote nde : « Mfumu Nzambi kuvanda na nge. Mono me sala mambu ya Mfumu Nzambi tubaka. »

14 Samuele yulaka yandi nde : « Ebuna, makelele yai ya bangombe ti ya mameme ya mono ke wa, yo ke katuka wapi ?

15 Saule nde : « Basoda na mono me botula yo na bantu ya Amaleki. Bo me baka mameme ti bangombe ya kuluta kitoko sambu na kupesa makabu na Mfumu Nzambi... Bima ya nkaka, beto me fwa-fwa yo yonso kimakulu. »

16 Samuele nde : « Bika kutuba. Mono ke songa nge mambu ya Mfumu Nzambi me tubila mono... »...

18 « ...Mfumu Nzambi tindaka nge nde : 'Kwenda, nge fwa bantu ya Ameleki yonso. Bo kele bantu ya mbi...'

19-20 Ebuna, sambu na nki nge me lemfukila Yandi ve ?» Saule nde : « Mono lemfukilaka Mfumu Nzambi, si. Mono kwendaka mutindu Yandi songaka mono....


21 Kansi basoda na mono kufwaka ve mameme ti bangombe ya kuluta kitoko ya bo botulaka....na kupesa makabu na Mfumu Nzambi... »

? Yula bana bakestio.

 **Bana sala bageste.**

 **Bana yimba ti kina.**

13.4 Samuele tendulaka Saule mbi na yandi ti ndola ya Nzambi ta pesa.

 **Tangila bana :** 1 Samuele 15 : 22-28

22 Samuele nde : « Nki Mfumu Nzambi ke zola mingi : kulemfuka to kupesa makabu ? Zaba nde, kulemfuka na Nzambi kuluta kupesa Yandi makabu. Kuwa malongi na Yandi kuluta kupesa Yandi bambisi ya mafuta.

23 ...Yo yina, sambu nge buyaka kulanda nsiku ya Mfumu Nzambi, Yandi mpi me katula nge na kimfumu....

26 Nge buyaka kulanda nsiku ya Mfumu Nzambi. Yandi mpi me buya nge na kuvanda ntotila ya bantu ya Israele. »

27 Ntangu Samuele balukaka na kwenda, Saule simbaka yandi na lele, ebuna lele pasukaka.

28 Samuele tubaka na yandi ndi : « Mutindu yo yai mpi, Mfumu Nzambi me katula nge na kimfumu ya Israele bubu. Yandi me pesa yo na muntu ya nkaka...

? Yula bana bakestio.

 **Bana sala bageste.**

 **Bana yimba ti kina.**

»|« Kumanisa :

Nzambi tubaka nde Yandi ta katula kimfumu na Saule sambu yandi me lemfuka ve na ndinga ya Nzambi. Yandi me tula mabanza na

yandi mosi na sika ya ndinga ya Nzambi. O, bana, beto keba. Ndinga ya Nzambi kele mfunu mingi. Beto kuwa yo, beto lemfuka na yo na kiese yonso.

♥ Verse ya bubu yai :

Samuele nde :/ «Nki Mfumu Nzambi ke zola mingi :/ kulemfuka, to kupesa makabu ?/ Zaba nde, kulemfuka na Nzambi/ kuluta kupesa Yandi makabu... / 1 Samuele 15 :22

[Bana tuba yo fraze na fraze na nima ya nge moniteur mbala zole. Na nima, bo tuba yo diaka mbala zole, ti konso ntangu bo tuba 'kulemfuka,' bo telama ti boka yo ngolo. Na nsuka, bo tuba yo ti bageste mbala zole.]

👂 Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi na lesu yai.

👋 Devoir sambu na bakristo :

Devoir mono ke pesa beno bakristo, yo yai : Mposo yai, tanga to kuwa ndambu ya Ndinga ya Nzambi konso lumbu. Na nima, kudiya, "Nki mutindu mono lenda lemfuka na malongi yai ya mono me tanga ?" Ebuna, sala yo. Lemfuka.

✝ Kubinga bavidi na Yesu :

Kansi kana nge me balula ntima na Yesu ntete ve na luzingu na nge, zaba nde, nge kele na makambu ti Nzambi. Nge me zwa makambu, sambu beto yonso me sala masumu. Beto me lemfuka na Nzambi ve. Beto me sala mambu ya Yandi zolaka ve. Yo yina, kinduku ti Yandi me zengana, me fwaka. Mubulu yai ke kanga beto mpi mpila kukwenda kuzinga na bwala na Yandi.

Kansi Nzambi zola nge mingi. Yandi zola kuvutula kintwadi na kati ya nge ti Yandi. Yo yina, Yandi tindaka Mwana na yandi Yesu Kristo. Yesu zingaka awa na nsi-ntoto kukonda ata disumu mosi. Yandi kitoko kaka. Yandi fwaka na zulu ya kulunsi bonso nkailu, kufuta mfuka ya mambi na beto. Kansi lufwa simbaka Yandi ve tii kuna. Yandi telamaka na lufwa.

Bubuyai, Yandi ke na moyo. Yandi ta wa nge kana nge binga Yandi sambu na kugulusa nge. Bible ke songa beto nde, "Konso muntu yina binga zina na Yandi, yandi ta guluka. (Roma 10:13).

Kana nge ke sosa lusadisu sambu na kuyamba Yesu, kaka bikala na nima ya ecodim. Beto ta kwisa kusadisa nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 13

Leso 13



***Samuele
nde:***

***«Nki
Mfumu
Nzambi
ke zola
mingi :***

kulemfuka, to kupesa makabu ?

Zaba nde, kulemfuka na

Nzambi kuluta kupesa

Yandi makabu...

1 Samuele 15 :22

Leso 14 Samuele tulaka Davidi ntotila ya Israele.

1 Samuele 16 :1-13

I. Preparasio ya Moniteur—

🎯 Kikuma ya lesu :

Bana ta landa ve mabanza na bo mosi, kansi bo ta sosa kulanda mabanza ya Nzambi, sambu bet bakisa nde Yandi ke mona ve bonso beto ke mona.

♥ Verse ya bubu yai :

...Muntu ke talaka/ yina ke monika na meso,/kansi Mfumu Nzambi/ ke talaka ntima./
1 Samuele 16 :7b

🗨️ Bankunga ya kwenda nzila mosi ti lesu :

Ee, Mfumu, Ee
Ee, Mfumu, ee

Na yonso ya Nge tuba
Ee, Mfumu, ee
Mono zola lemfuka

Mvutu :

Bu mo' tanga Bibila
Mono kaka ta ndima
Ye mono ta tuba ee,
Mfumu, ee !

Kuwa Bible

Kuwa Bible, Tanga Bible
'Buna nge ta mona
Nzila mbote mingi
Nzila mbote mingi
Ye ngangu ! Ye ngangu !

Kuwa Bible, Tanga Bible
'Buna nge ta zaba
Mabanza ya Nzambi
Mabanza ya Nzambi
Na beto ! Na beto !

II. Revisio—

📌 Kuyindula diaka baleso me luta :

Na mposo me luta, beto monaka nde Nzambi zengaka nki sambu na Ntotila Saule ?

(Yandi ta katula kimfumu na diboko na yandi, sambu yandi vandaka kulanda bansiku ya Nzambi mbote-mbote ve.)

III. Kulonga Leso Yai—

➡ Kuyantika :

Sami zolaka kusumba bonbo. Yandi vandaka na mbongo kusumba kaka mosi. Yandi talaka babonbo mbote-mbote. Na nsuka, yandi solaka mosi ya vandaka kukanga na papier ya kitoko. Kansi na kati, yandi monaka nde yo vandaka kitoko mingi ve.

Beto bantu kele nswalu kulanda konso mambu ya ke monika kitoko na meso. Na mposo me luta, beto monaka nde Nzambi buyaka nde Saule kuvanda mfumu diaka. Yandi vandaka kitoko na meso, nda kuluta bampangi na yandi. Kansi, yandi lemfukaka na Nzambi ve. Yo yina, Nzambi buyaka yandi.

🏠 Developpement (Malongi ya nene ya lesu yai na banti 4) :

14.1 Nzambi songaka Samuele kukwenda na Papa Yese, muntu ya bwala Betelemi, sambu Yandi me sola ntotila ya mpa na kati ya bana na yandi. Yo yina yando kwendaka na Betelemi ti bingaka fami ya Yese.

📖 Tangila bana : 1 Samuele 16 :1-5

*1 Mfumu Nzambi tubaka na Samuele nde :
« Tii nki ntangu nge ta mona mawa sambu na Saule ? Mono mosi Muntu me katula yandi na kimfumu ya Israele. Baka ndambu ya mafuta. Mono ke tinda nge na bwala Betelemi na nzo ya muntu mosi zina na yandi Yese, sambu Mono me sola mwana na yandi mosi na kuvanda ntotila.*

2-3 Samuele yulaka nde : « ...Saule ta wa yo, ebuna yandi ta fwa mono. » Mfumu Nzambi nde : « ...Mono ta songa nge nki nge ta sala. Muntu yina ya Mono ta songa nge, nge ta tula yandi mafuta na zina na Mono. Yandi yina muntu ta vanda ntotila. »

4-5 Samuele salaka mambu ya Mfumu Nzambi songaka yandi na kusala. Yandi


*kwendaka na Betelemi....Yandi bingaka mpi
Yese ti bana na yandi.*

? Yula bana bakestio.

🏠 Bana sala bageste.

👤 Bana yimba ti kina.

14.2 Kutula ntotila ya mpa, bo bingaka bana ya Yese 7 ya ordre ya kimbuta. Kansi Nzambi ndimaka bo ve.

 **Tangila bana :** 1 Samuele 16 :6-10

6 Ntangu Yese ti bana na yandi kwisaka, Samuele monaka Eliabi, ebuna yandi tubaka yandi mosi nde : « Ya kieleka, yandi yai muntu ya Mfumu Nzambi me sola. »

7 Kansi, Mfumu Nzambi tubaka na yandi nde : « Kutala ve nda yina, ti mutindu yandi kele. Mono me sola yandi ve, sambu Mono ke talaka ve yina ke monika na meso. Muntu ke talaka yina ke monika na meso, kansi Mfumu Nzambi ke talaka ntima. »

8 Ntangu yai, Yese bingaka mwana na yandi Abinadabi. Yandi nataka yandi na Samuele. Kansi Samuele tubaka nde, « Ve, Mfumu Nzambi me sola yandi ve. »

*9 Yese nataka Shama. Samuele nde :
« Yandi mpi ve. »*


10 Mutindu yo yai, Yese vandaka kunata bana na yandi 7 na Samuele. Ebuna Samuele vandaka kutuba nde : « Ve, Mfumu Nzambi me sola ata muntu mosi ve na kati na bo. »

? Yula bana bakestio.

🏠 Bana sala bageste.

👤 Bana yimba ti kina.

14.3 Yo me bikala kaka leki na kati na bo, Davidi. Yandi vandaka kukeba mameme ya fami. Ebuna bo bingaka yandi.

 **Tangila bana :** 1 Samuele 16 :11-12a

11 Na nima, Samuele yulaka Yese nde : « Keti bana yonso, bo yai ? » Yese nde : « Mwana

ya nkaka kele, kansi yandi me kwenda kukeba mameme. » Samuele nde : « Tinda bantu, bo kwenda kusosa yandi....»


12 Yo yina, Yese tindaka bantu na kwenda kusosa Davidi. Yandi vandaka mbwaki, meso ya mbote, ti ilungi ya kitoko.

? Yula bana bakestio.

🏠 Bana sala bageste.

👤 Bana yimba ti kina.

14.4 Nzambi ndimaka Davidi, yo yina Samuele tulaka yandi mafutu kusonga nde Nzambi me sola yandi kuvanda mfumu. Ebuna Mpeve ya Nzambi simbaka Davidi.

 **Tangila bana :** 1 Samuele 16 :12b-13

12b Mfumu Nzambi tubaka na Samuele nde : « Yandi yai. Tula yandi mafuta. »

13 Samuele bakaka mafuta ya olive. Yandi tulaka yo na zulu ya ntu ya Davidi na meso ya bampangi na yandi. Na mbala mosi, Mpeve ya Mfumu Nzambi simbaka Davidi...

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Na kutula ntotila to mfumu ya mpa, Samuele landaka ve mabanza na yandi mosi, kansi ndinga ya Nzambi. Samuele monaka mbuta Eliabi mbote, kansi Nzambi songaka yandi nde Yandi me sola Davidi, leki ya fami. Mabanza ya Nzambi konso ntangu kele mbote kuluta mabanza na beto bantu.

Bubuyai, beto ke mona mabanza ya Nzambi na Bible, Ndinga na Yandi. Nzambi mpi ke twadisa beto ntangu beto samba Yandi.

♥ Verse ya bubu yai :

...Muntu ke talaka/ yina ke monika na meso,/kansi Mfumu Nzambi/ ke talaka ntima./ 1 Samuele 16 :7b

[Bana tuba verse mbala zole na nima ya nge, ndambu-

ndambu. Na nima, bo tula yo ton ti ritima, ebuna, bo yimba yo ti kina yo mbala 4.]

Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

Devoir sambu na bakristo :


Beno bana bakristo, keti beno ke sosa kulanda mabanza ya Nzambi na luzingu na beno ?

Devoir mono ke pesa beno mposo yai, yo yai :
Konso lumbu, tanga to kuwa ndambu ya Bible,
Ndinga ya Nzambi. Kudiyula, nki Nzambi ke songa mono kusala na baverse yai ?

Kubinga bavidi na Yesu :

Kansi mbala ya nkaka, nge me zaba Yesu ntete ve. Zaba nde Mwana ya Nzambi mvu ya mvu, Yandi bikisaka zulu ti kwisaka awa na nsi-ntoto sambu na kugulusa nge. Nzambi zolaka makabu ya menga na kufuta mfuka ya masumu ya beto bantu. Makabu yina fweti vanda parfait—kukonda kifufu. Kaka Yesu vandaka kukonda kifufu. Yandi pesaka menga na Yandi na zulu ya kulunsi. Yandi monaka mpasi sambu na nge.

Kansi Yandi bikalaka ve na lufwa. Yandi telamaka, kele na moyo bubuyai. Kana nge binga zina na Yandi na kieleka yonso, Yandi ta kuwa nge. Kana nge zola bika nzila ya masumu, kulanda Yesu yantika bubuyai, kaka binga zina na Yandi. Kana nge ke na mfunu ya lusadis, beto kele awa na nima ya ecodim sambu na kusadisa nge.

 Kana ntangu lunga, longa mikanda ya Bible. (Bangindu kele na nsuka ya mukanda yai.)

==NSUKA YA LESO 14

Leso 14



***...Muntu ke talaka yina ke
monika na meso,
kansi Mfumu Nzambi ke
talaka ntima.***

1 Samuele 16 :7b

Leso 15 Davidi sadilaka Saule na misiki, sonikaka bankunga.

1 Samuele 16 :14-23, Mukanda ya Bankunga (somere)

I. Preparasio ya Moniteur—

🎯 Kikuma ya lesa :

Bana ta kumisa Nzambi na misiki ti bankunga, sambu Yandi me lunga kubaka lukumu.

❤ Verse ya bubu yai :

Beno kumisa Nzambi./

Beno yimbila Yandi bankunga !/

Beno kumisa Ntotila na beto./

Beno budila Yandi miziki !/ Bankunga 47 :7

🗣 Bankunga ya kwenda nzila mosi ti lesa :

Aleluya !

Alelu, Alelu, Alelu, Aleluya !

Kumisa Nzambi !

Alelu, Alelu, Alelu, Aleluya !

Kumisa Nzambi !

Kumisa Nzambi ! Aleluya !

Kumisa Nzambi ! Aleluya!

Kumisa Nzambi ! Aleluya !

KUMISA NZAMBI !

Bandeke kele yimba

Bandeke kele yimba na Yandi

Bawanzio kumisa zina n'Yandi

Bintuntu kele songa kitoko na bo

'Buna beto bana na Yandi Kumisa Yandi mpi!

(To konso nkunga ya ke kumisa Nzambi)

II. Revisio—

📌 Kuyindula diaka baleso me luta:

Na mposo me luta, beto monaka nde Nzambi songaka Samuele kutula Davidi mafuta na zulu ya ntu sambu na kusonga nde yandi ta kuma ntotila ya mpa. Kansi, yandi monikaka ntete ve bonso ntotila na meso ya bantu. Saule me bikala ntotila, ti Davidi me vutuka na kukeba mameme ya tata na yandi, Yese.

III. Kulonga Leso Yai—

➡ Kuyantika :

Muntu ya vandaka kukeba bambisi vandaka na ntangu mingi. Yandi vandaka kulanda bambisi na yandi. Kana bo me kuma na sika ya kudia matiti, yandi vandaka kaka kuvanda, kutala bo. Davidi zolaka mingi kusadila ntangu na yandi kubula misiki ti kuyimba bankunga.

🌟 Developpement (Malongi ya nene ya lesa yai na banti ya malongi 4) :

15.1 Davidi sonikaka bankunga mingi na kumisa Nzambi. Yo me kuma mukanda ya Bankunga na Bible na beto.

📖 Tangila bana somere yai ya mukanda ya Bankunga :

Davidi sonikaka bankunga mingi kusadila na bisambu. Ntangu yandi vandaka kutala mameme, yandi vandaka kusamba Nzambi ti kumisa Nzambi na nzila ya bankunga.

Yandi sonikaka bankunga mingi na experience na yandi. Mosi ya kitoko ya bantu mingi zaba kele Bankunga 23.

1 Mfumu Nzambi, Nge kele Ngungudi na mono. Mono lenda konda kima ve.

2 Nge ke bikaka mono, mono pema na kisika ya mbote yina ke na matiti ya mubisu. Nge ke nataka mono na lweka ya mwa-masa yina kele pima ti madidi.

3 Nge ke pesaka mono ngolo na ntima. Nge ke nataka mono na nzila ya mbote sambu na zina na Nge mosi Mfumu Nzambi.

4 Mfumu, mono lenda wa boma ve, ata mono kwenda na nzila ya mpimpa mingi bonso lufwa, sambu Nge ke nataka mono ti nti na Nge, Nge ke taninaka mono. Yo ke pesaka mono kikesa.

5 Nge ke sadilaka mono fete na meso ya bambeni na mono. Nge ke yambaka mono bonso muntu ya lukumu.

Nge ke fulusaka dikopa na mono meke.

*6 Ee, na luzingu na mono yonso
mono ta monaka kaka mambote na Nge.
Nge ta zolaka mono tii kuna.
Mono ta vandaka kaka ntangu yonso na nzo
na nge, Mfumu Nzambi.*

Davidi vandaka kukeba mameme ya tata mbote. Yandi bakisaka nde Tata Nzambi vandaka kukeba yandi mpi, bonso dimeme na Yandi. Yo yina, yandi yimbaka sambu na kumisa Ngungudi na yandi.

Mono yimbila Nge. Mono yimbila Nge !

? Yula bana bakestio.

🕯️ Bana sala bageste.

🔊 Bana yimba ti kina.

15.2 Ntotila Saule waka mpasi sambu mpeve ya mbi vandaka kuyangisa yandi. Yo yina, bo sosaka muntu kubudila yandi misiki, sambu yandi kuma nie.

📖 Tangila bana : 1 Samuele 16 :14-17

14 Mpeve ya Nzambi katukaka na Saule, ebuna mpeve ya mbi ...kwisaka kuyangisa yandi.

15 Bantu na yandi ya kisalu kwisaka kutubila yandi nde : « Beto zaba nde...mpeve ya mbi ke yangisa nge.

16 Mpidina mfumu, kana nge zola, pesa beto nzila beto sosila nge muntu ya kubula miziki. Kana mpeve ya mbi kusimba nge, muntu yina fweti bula miziki, mpidina ntima na nge kulembama.»

17 Saule tubaka nde : « Mambu ve, beno kwenda kususila mono muntu mosi kuzaba kubula miziki mbote. Beno kwisa ti yandi. »

? Yula bana bakestio.

🕯️ Bana sala bageste.

🔊 Bana yimba ti kina.

15.3 Davidi me zabana bonso mizisien ya ngolo. Yo yina, bo bingaka yandi kubudila

misiki sambu na Ntotila Saule.

📖 Tangila bana : 1 Samuele 16 :18-22

18 Muntu ...mosi tubaka nde : « Mono zaba mwana-bakala mosi...Yandi zaba kubula miziki mbote. Yandi kele muntu ya kikesa, soda ya ngolo. Yandi zaba kutuba mbote. Yandi kele mpi kitoko. Mfumu Nzambi mpi kele ti yandi. »

*19 Ebuna Saule tindaka bantu ...nde :
« Tinda mono mwana na nge Davidi yina ke kebaka mameme. »....*

21 Davidi kwisaka na nzo ya Saule, yandi yantikaka kusadila yandi. Saule zolaka yandi mingi....

*22 Yandi tindaka ndinga na Yese nde :
« Mono ke zola nde Davidi kubikala ti mono, sambu mono ke mona yandi mbote. »*

? Yula bana bakestio.

🕯️ Bana sala bageste.

🔊 Bana yimba ti kina.

15.4 Misika ya Davidi pimisaka ntima ya Saule mingi.

📖 Tangila bana : 1 Samuele 16 : 23

23 Konso ntangu, kana mpeve ya mbi kusimba Saule, Davidi fweti bula gitare na yandi, ebuna ntima ya Saule kulembana, yandi kukuma pima, mpeve ya mbi kukatuka na yandi.

? Yula bana bakestio.

🕯️ Bana sala bageste.

🔊 Bana yimba ti kina.

➤|◀ Kumanisa :

Miziki kele ngolo. Kana beto sadila yo sambu na kumisa Nzambi, yo lenda belula ntima ya bantu, yo lenda pesa kikesa ti enkuragama. Yo lenda basisa ata bampeve ya mbi, sambu bo zola ve kuwa bantu kumisa Nzambi. Beto yonso lenda yimba sambu na kupesa Nzambi lukumu.

♥ **Verse ya bubu yai :**

Mosi ya bankunga Davidi sonikaka kele yai:

Beno kumisa Nzambi./

Beno yimbila Yandi bankunga !/

Beno kumisa Ntotila na beto./

Beno budila Yandi miziki ! / Bankunga 47 :7

[Moniteur, bana yonso tuba yo fraze na fraze na nima na nge mbala zole. Na nima, pesa fraze mosi na konso ndambu ya bana. Sala mpidina mbala iya.]

👤 **Bankunga ya kwenda nzila mosi ti lesu :**

Bana yimba mosi ya bankunga ya kele kukwenda nzila mosi ti lesu yai.

👋 **Devoir sambu na bakristo :**

Beno bakristo, devoir mono ke pesa beno mposo yai kele zole. Ntete, tula ngolo kusambila Nzambi na bankunga, ata nge ke tambula, ke sala ksalu, to nki. Ya zole, tala mukanda ya Bankunga na kati-kati ya Bible. Tanga ndambu na yo, ti mona bampila mingi ya Davidi vandaka kumisa Nzambi.

✝ **Kubinga bavidu na Yesu :**

Bana, konso mposo beto ke bambukisa beno nde, kana beno me balula ntima ntete ve na Yesu, beno balula ntima kaka. Beto binga beno konso mposo sambu kuyamba Yesu kele mfunu mingi. Kimbeni na nge ti Nzambi ta mana na lumbu ya nge ndima Yesu, Mwana na Yandi. Keti nge zola bubuyai kuyantika lulanda Yesu ? Binga zina na Yandi ti songa Yandi. Kana nge balula ntima bubuyai, beto ta vanda na kiese kuzaba yo. Kwisa na nima ya ecodim kusonga beto nde nge me yamba Yandi, to kwisa kusosa lusadisu na mambu yina.

Kana ntangu lunga,

📖 **Longa mikanda ya Bible :** (Bangindu ke monika na nsuka ya mukanda yai.)

==NSUKA YA LESO 15

Leso 15



***Beno kumisa Nzambi.
Beno yimbila Yandi bankunga !
Beno kumisa Ntotila na beto.
Beno budila Yandi miziki !
Bankunga 47 :7***

Leso 16 Davidi vandaka na kikesa na kunwana na Goliati.

1 Samuele 17 :1-53

I. Preparasio ya Moniteur—

🎯 Kikuma ya lesu :

Bana ta wa boma ve na konso mpasi, kansi bo ta tula ntima na Mfumu Nzambi nde Yandi ta twadisa ti nungisa bo.

♥ Verse ya bubu yai :

1 Samuele 17 :45 (bandinga ya Davidi na Goliati)
« ...mono ke kwisa na zina ya Mfumu Nzambi,/ Nzambi-Mpungu,/ Nzambi ya basoda ya Israele,/ ya nge me finga. »

🗣️ Bankunga ya kwenda nzila mosi ti lesu :

Bu Yesu Kele Na Mono

Bu Yesu kele na mono
Ngemba kele ! Ngemba kele !
Ngemba kele !

Bu Yesu kele na mono
Ngemba kele, na ntima na mono !
Ngemba, Ngemba ! Ngemba, Ngemba !

Bu Yesu kele na mono,
Ngemba kele
Na ntima na mono !

Landa, Mo' Ta Landa Nge, Mfumu

Landa, mo' ta landa Nge, Mfumu
Landa lumbu na lumbu
Mbasi na mono, nge zaba yonso
Nge ta twadisa mono.

II. Revisio—

👆 Kuyindula diaka baleso me luta :

Na lesu me luta, Ntotila Saule bingaka nani kubudila yand misiki ? (Ee, Davidi)

Nki mambu ya mbote salamaka na misiki ya Davidi ?

(Mpeve ya mbi basikaka ti monaka ve mpila kuyangisa Saule.)

III. Kulonga Leso Yai—

➡ Kuyantika :

Bubuyai beto ta mona nde bantu mingi waka boma—ata basoda ya ngolo. Nki ke pesa nge boma ? [Moniteur, pesa bana mpila kupesa mvutu ya fioti.]

🌟 Developpement (Malongi ya nene ya lesu yai na banti ya malongi 6) :

[**ATASIO, Moniteur** : Leso yai kele nda, bitini 6. Yo yina, beto ta tanga kaka ndambu ya baverse, ti bana ta sala partisipasio kaka ndambu-ndambu, mpila beto me sonika.)

16.1 Saule ti basoda na yandi vandaka na boma sambu soda mosi ya NENE ya Filistia vandaka kuyangisaka bo bilumbu mingi, kansi basoda yonso vandaka na boma kunwanina yandi.

📖 **Tangila bana baverse yai** : 1 Samuele 17 :4-16

4 Muntu mosi ya ngolo basikaka na camp ya basoda ya Filistia, zina na yandi Goliati...yandi vandaka nda mingi...

8 Goliati telamaka. Yandi tubaka na bantu ya Israele na ndinga ya ngolo nde : « ...Beno sola muntu mosi, yandi kwisa kunwana ti mono.

9 Kana yandi bedisa mono..., beto ta kuma bambika na beno, kansi, kana mono bedisa yandi ..., beno ta kuma bampika na beto. »

11 Ntangu Saule ti basoda na yandi waka mambu yango, boma simbaka bo ti matekita.

16 Goliati vandaka kwisa konso ntangu na ntwala ya bantu ya Israele, ke finga bo bilumbu makumi iya, mpimpa ti mwini.

🗨️ **Bana sala bageste.**

16.2 Ntangu Davidi kwisaka na madia sambu na bambuta na yandi, yandi waka mpila Goliati vandaka kufinga basoda ya Nzambi.

📖 **Tangila bana** : 1 Samuele 17 :23-26

23 Ntangu yandi vandaka kusolula ti bo, Goliati basikaka diaka na kufinga bantu ya Israele... Davidi waka yandi.

24 Ntangu basoda ya Israele monaka Goliati ke kwisa, bo yonso vutukaka kinima-nima na boma yonso.

25 Bo tubanaka bo na bo nde : « tala yandi ke kwisa ! Wa yandi ke finga ! Muntu yina ta fwa yandi, ntotila ta pesa yandi kimvwama mingi...

26 Davidi yulaka basoda ...nde...Ebuna mumpani yai, yandi kele nani na kufinga basoda ya Nzambi ya moyo ? »

🔊 Bana yimba ti kina.

16.3 Mfumu Saule solulaka ti Davidi kana yandi lenda kwenda kunwanisa Goliati.

📖 Tangila bana : 1 Samuele 17 :31-37

31 Mambu ya Davidi vandaka kutuba, yo kumaka tii na ntotila Saule, ebuna Saule bingaka yandi.

36 Mono me fwaka bantambu ti bambisi ya nkaka ya makasi, mono ta sala mutindu mosi na mumpani yai ke finga-finga basoda ya Nzambi ya moyo.

37 Mfumu Nzambi me gulusaka mono na maboko ya bantambu ti bambisi ya nkaka. Yandi ta gulusa mono mpi na diboko ya mu-Filistia yai. »

? Yula bana bakestio.

16.4 Saule zolaka kusadisa Davidi na binwaninu na yandi, kansi yandi buyaka yo sambu na ya kilo. Yandi kwendaka kunwana Goliati kaka mpidina. (Somere ya 17 : 38-39.)

? Yula bana bakestio.

16.5 Davidi bakaka kaka matadi 5 ya fioti ti lanse na yandi.

📖 Tangila bana : 1 Samuele 17 :40-41

40 Yandi bakaka nti na yandi, ebuna yandi kwendaka kulokuta tumatadi tanu ya butesi na lweka ya masa. Yandi tulaka yo na kamwa-saki na yandi. Ebuna yandi bakaka lanse na yandi na maboko, yandi kwendaka kukutana ti Goliati.

🔊 Bana sala bageste.

🔊 Bana yimba ti kina.

16 :6 Ntangu Goliati monaka Davidi kaka leki, yandi fingaka yandi. Kansi Davidi na kikesa songaka Goliati nde yandi me kwisa na zina ya Nzambi Mpungu ya yandi me finga.

📖 Tangila bana : 1 Samuele 17 :42-47

42-43 Ntangu Goliati kumaka penepene, yandi talaka Davidi. Yandi monaka nde yandi... leki mpenza...

Yandi yantikaka kufinga yandi nde « Keti nge ke mona mono mbwa ? » Ebuna yandi singaka Davidi na zina ya banzambi na yandi.

44 Yandi tubaka diaka na Davidi nde : « Kwisa awa, nitu na nge mono ke pesa yo na bandeke ti bambisi, bo dia ! »

45 Davidi tubaka nde : « Nge ke kwisa na mono ti mbele, ti dikonga ya nene ti ya fioti, kansi mono, mono ke kwisa na zina ya Mfumu Nzambi, Nzambi-Mpungu, Nzambi ya basoda ya Israele, ya nge me finga.

46 Bubu yai kaka, Mfumu Nzambi ke pesa nge na maboko na mono...

🔊 Bana sala bageste.

🔊 Bana yimba ti kina.

16 :7 Davidi fwaka Goliati na ditadi mosi, ebuna basoda ya nkaka ya Filistia tinaka.

📖 Tangila bana : 1 Samuele 17 :48-53

49Yandi basisaka kaditadi mosi, yandi tulaka yo na lanse, yandi losaka yo Goliati. Ditadi simbaka Goliati na ilungi. Yo kotaka na kati ya ntu, ebuna yandi bwaka, ilungi na ntoto.

51....Ntangu bantu ya Filistia monaka nde soda na bo ya ngolo me fwa, bo tinaka.

? Yula bana bakestio.

🏠 Bana sala bageste.

🗣️ Bana yimba ti kina.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 16

➤|◀ Kumanisa :

Bana, bantu ya Israele vandaka na ntangu ya kingonsa sambu na Goliati, kansi Nzambi nungisaka bo na diboko ya mwana, Davidi, sambu Davidi tulaka ntima na Nzambi.

Beto bakristo, beto mpi mona mambu mingi ya kingonsa na luzingu na beto. Kana beto tula ntima na Nzambi, Yandi ta nungisa beto.

♥ Verse ya bubu yai :

1 Samuele 17 :45 (bandinga ya Davidi na Goliati) « ...mono ke kwisa na zina ya Mfumu Nzambi,/ Nzambi-Mpungu,/ Nzambi ya basoda ya Israele,/ ya nge me finga. »

Bana tula ton ti ritima na verse. Bo yimba yo mbala 6 ti bageste.

🗣️ Bankunga ya kwenda nzila mosi ti lesu :

Bana yimba nkunga mosi ya nkaka ya ke kwenda nzila mosi ti lesu.

👏 Devoir sambu na bakristo :

Devoir mono ke pesa beno bakristo na mposo yai kele kutula ntima konso lumbu na Nzambi, ata na ntangu ya boma.

✝ Kubinga bavidu na Yesu :

Kansi, kana nge me balula ntima na Yesu, me tula ntima na Yandi ntete ve, mbote nge vanda na boma. Nge kele na makambu ti Nzambi sambu nge me salaka masumu ya me fwaka kinduku na nge ti Yandi. Nzila kuvutuka na kinduku ti Nzambi kele kaka Yesu Kristo. Yandi fwaka ti telamaka na lufwa sambu na nge. Keti nge ta yamba Yandi bubuyai na maboko zole? Kana nge zola kusamba ti beto sambu nge yamba Yesu, kaka bikala na nima ya ecodim. Beto ta sadisa nge.

Leso 16



**1 Samuele
17 :45
(bandinga
ya Davidi
na Goliati)**

**« ...mono ke kwisa na
zina ya Mfumu Nzambi,
Nzambi-Mpungu,
Nzambi ya basoda ya
Israele,
ya nge me finga. »**

Leso 17 Davidi salaka kinduku na Yonatani.

1 Samuele 17 :58--18 :5

I. Preparasio ya Moniteur—

🎯 Kikuma ya lesa :

(Leso 17 ti 18) Bana ta vanda mbote ti bantu. Bo ta ndima ve kimpala to kuyuma ntima kusimba ntima na bo, sambu bo ta bakisa nde, kimpala ke lunga na beto bantu ve.

♥ Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17

[Moniteur, tala nde yai kele nsiku 10 na kati ya Bansiku 10 ya nene ya Nzambi.]

🗣️ Bankunga ya kwenda nzila mosi ti lesa :

O Keba Maboko (Ntima)

O Keba ntima nki nge zola (Kimpala ve !)
O Keba ntima nki nge zola (Kimpala ve !)
Sambu Tata na zulu
Yandi kele zaba yo
O Keba ntima nki nge zola (Kimpala ve !)

O Luvunu Yambula (O Kimpala)

O Kimpala (O Kimpala)
O Kimpala, Yambula ! (O Kimpala) (repete)

Bansiku Kumi ya Kulanda

Ya kumi, yuma ntima ve
Na bima ya mpangi (3x)
Nsiku ya kumi kulanda !

II. Revisio—

👆 Kuyindula diaka baleso me luta:

Beto baka mwa-ntangu fioti kusala nsaka sambu na Davidi. Bana vanda bandambu zole. Konso ndambu tuba mambu mosi bo zaba sambu na Davidi. Konso mambu ya kele kieleka, bo baka 100 points. Kana ndambu mosi lenda tuba kima diaka ve, nsaka me mana ti ndambu ya kele na bapoint ya kuluta kele champion. Kima

mosi ya mfunu kuzaba kele nde profete Samuele me songa dezia nde Davidi ta kuma mfumu to ntotila.

III. Kulonga Leso Yai—

➡ Kuyantika :

Mbala mingi, kana ntotila to mfumu kufwa, nani ta landa yandi na kimfumu ? (Mbala mingi mwana na yandi ya bakala. Kimfumu ta landa kaka na dikanda ya mfumu.) Keti nge banza nde mfumu ta zola kimfumu kulanda na dikanda na yandi ? (Ee, yandi ta zola yo mingi.)

Kansi profete ya Nzambi me songa nde Nzambi vandaka na kiese ve na Ntotila Saule. Yandi lemfukilaka Nzambi ve. Yo yina, yandi me songa Saule nde kimfumu na yandi ta suka. Dezia, yandi me tula mafuta na ntu ya muntu yina ya Nzambi tubaka ta kuma ntotila ya mpa. Zina ya muntu yina, Davidi. Na mposo me luta, beto monaka mpila nde Davidi fwaka muntu ya nene ti makasi Goliati, ntangu basoda yonso ya armee ya mvimba vandaka na boma kunwana ti yandi. Ntangu yai, Davidi me kuzabana mingi na Israele.

🏠 Developpement (Malongi ya nene ya lesa yai na banti ya malongi 4) :

17.1 Saule vandaka na kiese na Davidi ti lombaka yandi kukwisa zinga na nzo na yandi.

📖 Tangila bana : 1 Samuele 17 :58, 18 :1.

17 :58 Saule yulaka nde : « Nge kele mwana ya nani ? » Davidi nde : « Mfumu, mono kele mwana ya muntu na nge Yese na bwala Betelemi. »

18 :1 Ntangu Saule me manisa kusolula na Davidi imene, kilumbu yo yina yandi songaka yandi na kubikala na nzo na yandi. Yandi zolaka ve nde Davidi kuvutuka na nzo ya tata na yandi.

❓ Yula bana bakestio.

🏠 Bana sala bageste.

🗣️ Bana yimba ti kina.

17.2 Yonatani yantikaka kuzola Davidi mingi na kinduku ya ngolo. 1 Samuele 18 :2

 **Tangila bana :**


2 Yonatani mwana ya Saule yantikaka kuzola Davidi mingi. Ntima na yandi kangamaka na Davidi. Yandi zolaka yandi mosi yandi mosi.

? Yula bana bakestio.

✎ Bana sala bageste.

🗣️ Bana yimba ti kina.

17.3 Davidi salaka kuwakana ya ngolo ya kinduku ti Yonatani. Yandi pesaka Davidi makabu bonso kidimbu ya kuwakana yina.

 **Tangila bana :** 1 Samuele 18 :3-4

3 Yonatani zengaka nde yandi fweti vanda kaka nduku ya Davidi tii kuna, sambu yandi vandaka kuzola yandi mingi mpenza.

4 Yandi katulaka kazaka ya yandi lwataka, yandi pesaka yo Davidi. Yandi pesaka yandi mpi bilele na yandi ya bitumba, ti mbele, ti bunduki ya toloto, ti mukaba.

? Yula bana bakestio.

✎ Bana sala bageste.

🗣️ Bana yimba ti kina.

17.4 David pesaka bantu yonso kiese ti bakaka kiyeka. Ata Yonatani vandaka mwana ya mfumu, yandi wilaka Davidi kimpala ve. Yonatani ti Davidi vandaka kaka mbote bo na bo.

 **Tangila bana :** 1 Samuele 18 :5

5 Bisika yonso ya Saule vandaka kutinda Davidi, Davidi vandaka kusala mambu yonso mbote. Ebuna Saule tulaka yandi mfumu ya basoda na yandi. Bantu yonso ya Saule monaka yo kiese, ata basoda na yandi.

? Yula bana bakestio.

✎ Bana sala bageste.

🗣️ Bana yimba ti kina.

►|◀ Kumanisa :

Na histoire yai, beto mona mambu ya yituka. Na kimuntu Yonatani fweti vanda kimpala mingi sambu na Davidi. Na kimuntu, yandi fweti yuma ntima sambu na kiyeka ya kimfumu ya Davidi fweti baka. Na kimuntu yandi fweti mona nde kimfumu kele ya yandi, ya Davidi ve. Na kimuntu yandi fweti menga Davidi.

Kansi Yonatani yumaka ntima ve. Yandi vandaka na ntima mosi ya mbote, ya kinzambi. Yandi bakaka Davidi ve na kimbeni, kansi yandi zolaka Davidi mingi. Bo kumaka banduku ya ngolo bilumbu na bo yonso tii kuna.

O, kiese mingi kana kimpala kuyala beto ve !

♥ Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.]

Yula bana :

Kimpala ke nata nki mambu ya mbi ?
(Nku, kufwa bantu)

🗣️ Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu yai.

👏 Devoir sambu na bakristo :

Devoir mono ke pesa beno bakristo, yo yai : beno bikisa kimpala yonso. Beno lombamba Nzambi lusadisusu na mambu yina. [Moniteur, twadisa bana na lombilu nde bo bakristo vanda na ngolo kubikisa mambu yonso ya kimpala, kuvanda mbote ti bantu yonso.]

✝ Kubinga bavidu na Yesu :

Yonatani ti Davidi vandaka na kinduku ya ngolo. Kiese mingi. Kansi, kana nge me tula ntima na Yesu ve, zaba nde, nge ke konda kinduku mosi ya nene. Nge ke konda kinduku ti Nzambi. Kinduku na beto ti yandi, yo me zengana sambu na masumu, sambu na mambu ya mbi ya beto me sala ya me pesa Yandi kiese ve. Kansi Nzambi zola beto bantu ya masumu.

Yandi tindaka Mwana na Yandi Yesu Kristo sambu na kuvutula kinduku na beto ti Yandi.

Yesu monaka mpasi, Yandi fwaka na zulu ya kulunsi bonso makabu ya menga, sambu na kukatula masumu na beto. Na ntangu ya beto balula ntima, beto zenga kubika masumu, kundima yina ya Yandi salaka sambu na beto, na minute yina, beto kuma balandi ya Yesu. Yandi vutula beto na kinduku na Yandi.

Yesu fwaka, kansi Yandi mpi telamaka na lufwa. Yandi kele na moyo bubuyai. Yo yina, Yandi lenda kuwa ntangu nge binga zina na Yandi. Yandi ta gulusa nge bubuyai kana nge tula ntima na Yandi. Kana nge zola binga Yandi bubuyai, bikala na nima ya ecodim na sika yai awa [*moniteur, songa wapi*], sambu beto sadisa nge.



Kana ntangu lunga,

longa mikanda ya Bible :

(Bangindu kele na nsuka ya mukanda yai.)

==NSUKA YA LESO 17

Leso 17



**Kuyuma ntima ve na nzo
ya ngani.**

**Kuyuma ntima ve
na...konso kima ya ngani.**

Kubasika 20 : 17

Leso 18 Saule zolaka kufwa Davidi na kimpala.

1 Samuele 18 :6—30

I. Preparasio ya Moniteur—

🎯 Kikuma ya lesa :

Bana ta yuma ntima ve sambu na mambu ya mbote ya bantu ya nkaka ke sala. Bo ta vanda na kiese na sukse ya bantu ya nkaka.

♥ Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.]

👤 Bankunga ya kwenda nzila mosi ti lesa :

[Bana lenda yimba bankunga yai diaka :]

O Keba Maboko (Ntima)

O Keba ntima nki nge zola (Kimpala ve !)

O Keba ntima nki nge zola (Kimpala ve !)

Sambu Tata na zulu

Yandi kele zaba yo

O Keba ntima nki nge zola (Kimpala ve !)

O Luvunu Yambula (O Kimpala)

O Kimpala (O Kimpala)

O Kimpala, Yambula ! (O Kimpala) (repeteer)

Bansiku Kumi ya Kulanda

Ya kumi, yuma ntima ve

Na bima ya mpangi (3x)

Nsiku ya kumi kulanda !

II. Revisio—

↑ Kuyindula diaka baleso me luta:

- Nani vandaka mfumu to ntotila ya ntete ya Israele ? (Saule)
- Mwana na yandi nani ? (Yonatani)
- Nzambi tindaka profete Samuele kusonga Saule nde kimfumu na yandi ta landa ve tii kuna. Sambu na nki ? (Saule me lemfuka na Nzambi ve.)

- Na nima, Samuele tulaka mafuta na zulu ya nani? Kusonga nki ? (Davidi, Kusonga nde yandi ta kuma mfumu to ntotila ya Israele na nima ya Saule.)
- Nani me sala kinduku ya ngolo ti ya mbote ? (Yonatani, mwana ya Saule, ti Davidi)

III. Kulonga Leso Yai—

⇒ Kuyantika :

Keti nge me vanda na nduku ya vandaka mbote ti nge, kansi lumbu mosi, nge monaka nde mambu me change ? Nge zabaka ve sambu na nki, kansi nge bakisaka nde yandi vandaka mbote ti nge diaka ve.

Na lesa me luta, beto monaka nde Davidi vandaka mbote ti Saule. Yandi vandaka kupusa ve kukuma mfumu nswalu, kansi yandi vandaka kusadila Saule na mpila mosi ya kwikama. Yonso vandaka ngemba ti kiese.

Kansi kaka mbala mosi, yo balulaka mutindu ya nkaka.

🌟 Developpement (Malongi ya nene ya lesa yai na banti ya malongi 4) :

18.1 Kimpala kotaka na Saule sambu na bampila bankento kumisaka Davidi na bankunga. Yo yina, mpeve ya mbi kotaka na Saule, kupusa yandi na meka kufwa Davidi mbala zole.

📖 **Tangila bana : 1 Samuele 18 :6-11**

6 Ntangu basoda kwisaka kuvutuka, ...bankento ...ya Israele kwisaka kuyamba ntotila Saule. Bo vandaka kuyimba bankunga ya kiese, bo vandaka kubula bangoma ti bagitare, ti kukina mpi.

7 Bankento vandaka kuyimba na kiese yonso nde : « Saule me fwa bantu mile, kansi Davidi me fwa bantu mile kumi. »

8 Saule waka makasi mingi. Mambu yina pesaka yandi kiese ve. ...

9 Katuka kilumbu yina, Saule vandaka kutala Davidi na disu ya mbi.

10 Kilumbu landaka... mpeve ya mbi, yo simbaka yandi, kuna na nzo na yandi, yandi yantikaka kutuba-tuba bonso muntu ya maladi ya kilau. Ebuna Davidi vandaka kubudila yandi gitare, mutindu yandi vandaka kusala ntete. Saule vandaka na dikonga na maboko.


11 Yandi tubaka yandi mosi na nsi ya ntima nde : « Mono ta bula yandi dikonga ti kibaka. » Yandi losaka yandi dikonga mbala zole, kansi Davidi tinaka yo.

? Yula bana bakestio.

🏠 Bana sala bageste.

👤 Bana yimba ti kina.

18.2 Boma ya Saule kaka yelaka, sambu ata yandi katulaka Davidi na nzo, bantu vandaka kuzola yandi mingi.

 **Tangila bana :** 1 Samuele 18 :12-16

12 Saule vandaka kutina Davidi boma, sambu Mfumu Nzambi vandaka kaka ti Davidi, kansi ti Saule diaka ve.

13 Yo yina, Saule katulaka yandi penepene na yandi...Davidi vandaka kunata bantu na yandi na bitumba

15 Saule, ntangu yandi vandaka kumona nde Davidi ke nunga na bitumba, yandi waka yandi diaka boma mingi.


16 Kansi bantu yonso na Israele ti na Yuda vandaka kuzola Davidi...

? Yula bana bakestio.

🏠 Bana sala bageste.

👤 Bana yimba ti kina.

18.3 Saule yidikaka lukanu ya mbi sambu Davidi kufwa na mvita.

 **Tangila bana :** 1 Samuele 18 :17-25

17 Ntangu yai, Saule tubaka na Davidi nde : « Mwana na mono ...Merabi, yandi yai.

Mono ke pesa nge yandi. Nge kwela yandi. Kansi kima mosi, nge fweti ...nwana bitumba.... » (Saule yindulaka nde : « Mbote Davidi kufwa na maboko ya bantu ya Filistia, kansi na mono ve. »)....

19 Kansi ntangu bo zolaka kupesa Merabi na Davidi, Adriele, muntu ya bwala Mehola kwelaka yandi.

20-21 Kansi Mikale mwana ya nkaka ya Saule kumaka kuzola Davidi, ebuna ntangu Saule waka yo, yandi...tubaka yandi mosi nde : «...Yandi ta vanda bonso mutambu na Davidi, ebuna bo ta fwa yandi na bantu ya Filistia....


25 ebuna Saule songaka (bantu) na kwenda kutuba na Davidi nde : « Ntotila ke lomba mbongo ya makwela ve. Yandi ke zola kaka (kidimbu kusonga nde nge me fwa) basoda ya Filistia... » (Yai mayele ya Saule salaka na mpila nde Davidi kubwa na maboko ya bantu ya Filistia.)

? Yula bana bakestio.

🏠 Bana sala bageste.

👤 Bana yimba ti kina.

18.4 Davidi kufwaka ve na lukanu yina, ebuna kimbeni ya Saule yelaka kaka.

 **Tangila bana :** 1 Samuele 18 :27-29

27 Davidi basikaka ti bantu na yandi. Yandi fwaka basoda nkama zole ya Filistia. Yandi bakaka (kidimbu ya me songa nde yandi me fwa bo). Yandi kwisaka kunata yo na ntotila, ...sambu yandi kuma bukilo na yandi. Ebuna Saule pesaka yandi mwana na yandi Mikale na kukwela.

28 Saule monaka nde ya kieleka, Mfumu Nzambi kele na Davidi,...mpi nde mwana na yandi Mikale ke zola Davidi.

29 Yo yina, yandi vandaka kutina Davidi boma mingi diaka. Luzingu na yandi ya mvimba, yandi vandaka mbeni na yandi.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Beto me mona nde Davidi salaka Saule kaka mbote, kansi Saule me yuma yandi ntima kaka. Yo me nata mpeve ya mbi kuyangisa yandi. Yo me nata boma, makasi, ti masumu. Ntangu yai, Saule me kuma muntu ya zolaka kufwa David. Yandi tulaka ngolo na kufwa yandi, kansi Nzambi kangaka yandi nzila. O, kuyuma ntima kele kima mosi ya mbi !

Bingana 4 :23 ke songa beto nde, “Keba mbote-mbote mambu ya nge ke yindulaka na nsi ya ntima...” Keti nge kele kumona mbote mambu ya kele na ntima na nge ?

♥ Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.]

[Bana yimba verse yai diaka mbala 4. Na nima, bankento tuba yo mbala mosi ti babakala mbala mosi. Na nsuka, yula nani lenda tuba yo, yandi mosi.]

👁 Bankunga ya kwenda nzila mosi ti lesu :

Bana yimba diaka nkunga mosi ya ke kwenda nzila mosi ti lesu yai.

👋 Devoir sambu na bakristo :

Devoir mono ke pesa beno bakristo, yo yai : kukeba mbote-mbote na mposi yai mambu yonso ya nge pesa nzila kukota na ntima na nge. Tala kima mosi ya fioti bonso kuyuma ntima, yo lenda buta bambuma ya ta sadisa nge ve, ya ta pesa Nzambi kiese mpi ve. Keba ntima na mposi yai !

✝ Kubinga bavidu na Yesu :

Keti nge zaba mbote nde Yesu kele Mvulusi na nge ? Keti nge me balula ntima, me yamba Yandi na ntima na nge ?

Beto yonso kele na probleme ya ntima ya mbi. Bible ke songa nde, “...ntima ya muntu, yo me fulukaka na luvunu, yo ke na maladi mingi. Mpila ya kubelula yo kele ve” (Yeremia 17 :9).

Kana Mpeve ya Nzambi me songa nge nde ntima na nge kele na probleme, zaba nde, ata muntu lenda

belula yo ve, kansi Yesu Kristo Mwana ya Nzambi lenda belula yo. Yandi futaka menga ya kitoko, ya ntalu na Yandi sambu na kusumba mpulusu ya nge.

Kana nge ta binga zina na Yandi sesepi yai, ti lomba Yandi kugulusa nge, Yandi ta vanda nswalu kubelula ntima na nge. Nge ta kuma muntu ya mpa mu Yesu. Yandi ta pesa nge ntima ya zola kulanda Yandi. Kana nge ke na mfunu ya lusadisu na mambu yai, kaka bikala na nima ya ecodim. Beto ta kwisa kusadisa nge.

Kana ntangu lunga,**📖 Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 18

Leso 18



**Kuyuma ntima ve na nzo
ya ngani.**

**Kuyuma ntima ve
na...konso kima ya ngani.**

Kubasika 20 : 17

Leso 19 Yonatani sadisaka nduku na yandi Davidi.

1 Samuele 19 :1-24, 20:1-42

I. Preparasio ya Moniteur—

🎯 Kikuma ya lesu :

Bana ta landa kinduku. Bo ta pesa nzila ve na kimpala, sambu bo ta zaba nde kinduku ke tunga luzingu ya mbote, kansi kimpala ke bebisa yo.

♥ Verse ya bubu yai :

*Banduku ke zolanaka/ konso ntangu./
Bampangi ke sadisanaka/ na ntangu ya mpasi.
Bingana 17 :17*

👤 Bankunga ya kwenda nzila mosi ti lesu :

O Keba Maboko (Ntima)

O Keba ntima nki nge zola (Kimpala ve !)
O Keba ntima nki nge zola (Kimpala ve !)

Sambu Tata na zulu
Yandi keke zaba yo

O Keba ntima nki nge zola (Kimpala ve !)

O Luvunu Yambula (O Kimpala)

O Kimpala (O Kimpala)
O Kimpala, Yambula ! (O Kimpala) (repeteer)

Beto Zolana

Na dikanda ya Nzambi mambu me luta nene,
zola ! Zola me luta nene ! (repeteer)

Bana ya Nzambi, beto zolana
Zola me luta nene (Beto zolana)
Bana ya Nzambi, beto zolana
Zola me luta nene !

II. Revisio—

† Kuyindula diaka baleso me luta :

Beto me mona nde Mfumu Saule kebaka ve ntima na yandi. Yandi yumaka ntima sambu lukumu ya bantu pesaka Davidi, Yandi monaka nde lukumu yina fweti kuma na yandi kaka. Yandi bakaka Davidi na kimbeni ti sosaka kufwa yandi mutindu na mutindu.

III. Kulonga Leso Yai—

➡ Kuyantika :

Kansi beno ta bambuka mpi nde mwana ya Saule zina ya Yonatani, yandi salaka kinduku ya ngolo ti Davidi. Nki ta salama ntangu yai, sambu tata zola kufwa Davidi, kansi mwana keke nduku na yandi ?

🏠 **Developpement (Malongi ya nene ya lesu yai na banti)** : [Moniteur, lesu yai keke nda, bakapu 2. Yo yina, beto me tuba bima ya nkaka na somere ti beto me katula bima ya nkaka.]

19.1 Ntete, Yonatani lombaka Saule kusonga Davidi mawa, ti Saule ndimaka. Kansi na nima, yandi balulaka.

📖 **Tangila bana somere yai** : Somere, 1 Samuele 19

Mbala mosi, Davidi vandaka kubudila misiki. Mpeve ya mbi vutukaka kusimba Saule. Yandi monaka nzala na kufwa Davidi, yo yina, yandi losilaka yandi lanse. Kansi Davidi basikaka. Mbala 3 Saule mekaka kufwa David mpidina.

? Yula bana bakestio.

19.2 Davidi kwendaka kubokuta na nduku na yandi Yonatani. Yonatani ndimaka kusonga Davidi kana Saule vandaka na lukanu ya mbi na zulu na yandi. Bo salaka kuwakana ya kinduku ya fami na bo tii kuna.

📖 **Tangila bana** : 1 Samuele 20 :1-17

*16 Ntangu yai, Yonatani wakanaka ti Davidi ti fami na yandi nde bo ta vandaka kaka banduku tii kuna. Yandi tubaka nde :
« Mfumu Nzambi kupesa nge ndola kana nge landa ve kuwakana yai. »*


17 Yandi songaka diaka Davidi na kuzenga Nzambi nde yandi ke zolaka yandi, sambu yandi mosi Yonatani vandaka kuzola Davidi bonso yandi mosi.

? Yula bana bakestio.

🏠 **Bana sala bageste.**

 **Bana yimba ti kina.**

19.3 Davidi ta songa Yonatani kubikala to kukwenda na mpila yandi ta losa batolo-tolo.

 **Tangila bana :** 1 Samuele 20 :18-24

18 Ntangu yai, Yonatani tubilaka Davidi nde : « Mbasi kele Nkinsi ...kana nge vanda ve, bo ta zaba, sambu kisika na nge ta vanda ya mpamba.

19 ...Mpidina kwenda kubumbana na kisika ya nge kubumbanaka ntete, kuna na nima ya matadi.

20 Mono ta losa batolotolo tatu kuna, bonso nde mono ke losa na kima.

21 Ebuna mono ta tinda muntu na mono na kwenda kusosa batolotolo yango. Kana mono songa yandi nde : 'Tala, batolotolo kele na nima na nge, kwisa lokuta yo', yo ke songa nde mambu kele ve, nge lenda kwisa kuvutuka. Mono ke zenga na zina ya Mfumu Nzambi nde mambu ta bwila nge ve.

22 Kansi, kana mono songa muntu na mono nde, « Tala, batolotolo kele kuna na ntuala na nge', pana nge fweti katuka, sambu Mfumu Nzambi ke tinda nge ntama.


23-24 Na kuwakana ya beto wakanaka, nge ti mono, Mfumu Nzambi kele kaka temwe tii kuna. » Yo yina, Davidi kwendaka kubumbana na nseke.

? Yula bana bakestio.

 **Bana sala bageste.**

 **Bana yimba ti kina.**

19.4 Yonatani zikisaka nde kieleka Saule zolaka kufwa Davidi. Yo yina, na mawa, Yonatani songaka Davidi nde yandi fweti basika.

 **Tangila bana :** 1 Samuele 20 :30-31, 41-42

30 Saule wilaka Yonatani makasi mingi. Yandi tubaka nde : « Mwana-makangu !

Mono zaba mbote nde nge kele nduku ya mwana ya Yese. Yo kele nsoni na nge...

31 Zaba mbote nde, kana mwana yina ke zinga, nge ta kuma ntotila ve na ntoto yai ata fioti. Sesepe yai, tinda bantu, bo kwenda kukanga yandi. Bo nata yandi awa, sambu yandi fweti fwa. »

41 Ntangu mwana-bakala me kwenda imene, Davidi telamaka na nima ya matadi ya yandi bumbanaka. Yandi fukamaka mbala tatu ilungi na ntoto na ntuala ya Yonatani, ebuna bo yambanaka ti kupesana beze na kudila. Davidi dilaka mingi.

42 Ntangu yai, Yonatani tubilaka Davidi nde : « Kwenda mbote. Mfumu Nzambi kuvanda temwe na beto na mpila nde, nge ti mono, bana na nge ti bana na mono, beto kuvila ve kuwakana ya beto wakanaka na zina na Yandi. »


? Yula bana bakestio.

 **Bana sala bageste.**

 **Bana yimba ti kina.**

>|< Kumanisa :

Saule bebisaka luzingu na yandi na kimpala ya Davidi. Kansi mwana na yandi Yonatani salaka kinduku ti Davidi. Davidi silaka kusala fami ya Yonatani mbote tii kuna. Kimpala kele kaka kubebisa, kansi kinduku kele mbote.

 **Verse ya bubu yai :**

*Banduku ke zolanaka/ konso ntangu./
Bampangi ke sadisanaka/ na ntangu ya mpasi.
Bingana 17 :17*

[Ndambu ya bana tuba linya ya ntete, ndambu ya nkaka tuba linya ya zole. Na nima, bo balula linya ya bo ke tubaka.]

 **Bankunga ya kwenda nzila mosi ti lesa :**

Bana yimba mosi ya bankunga ya ke kwenda nzila mosi ti lesa yai.

 **Devoir sambu na bakristo :**

Devoir mono ke pesa beno bakristo mposi yai, yo yai: kubika kimpala kana yo kele, kutula

ngolo kusala kinduku ti muntu yina ya nge vandaka kuwila kimpala.

✝ Kubinga bavidi na Yesu :

Nduku ya kuluta nene keke Yesu Kristo. Yandi kwisaka sambu beto bantu me sala masumu. Masumu yina zengaka kinduku na beto ti Tata Nzambi. Yesu fwaka na zulu ya kulunsi sambu na kuvutula beto na kinduku ti Ngangi na beto. Kana nge zola bika nzila ya masumu, balula ntima ti tula kivuvu na Yesu kaka. Yandi mpi ta gulusa nge. Yandi ta kuma Nduku na nge, ti Tata Nzambi mpi ta kuma Nduku na nge. Kana nge me yamba Yandi ntete ve, ntangu ya mbote, bubuyai. Kana nge zola beto kusamba ti nge na mambu yina, bikala na nima ya ecodim ti beto ta sadisa nge.

Kana ntangu lunga,

📖 Longa mikanda ya Bible :

(Bangindu keke na nsuka ya mukanda yai.)

==NSUKA YA LESO 19

Leso 19



***Banduku ke zolanaka
konso ntangu.***

***Bampangi ke sadisanaka
na ntangu ya mpasi.***

Bingana 17 :17

Leso 20 Davidi wilaka Saule mawa.

1 Samuele 21-23 somere, 24

I. Preparasio ya Moniteur—

🎯 Kikuma ya lesu :

Bana ta sala mbote ata na bo ya monisa bo mpasi, sambu bo zaba nde Nzambi na beto sala mpi mbote na bantu yonso.

♥ Verse ya bubu yai :

« ...Mono ke tubila beno nde : /Beno zola bambeni na beno./ Samba Nzambi/ sambu na bantu/ yina ke monisaka beno mpasi./ »
Matayo 5 :44, Malongi ya Yesu Kristo

🗣️ Nkunga ya kwenda nzila mosi ti lesu :

Beto Vutula Mbi Ve, Ve, Ve

Beto vutula mbi—ve, ve, ve ! (3x)

Beto pesa yo na Nzambi.

Kuzuze kele kisalu ya Nzambi (3x)

Kansi ya beto bantu ve.

Beto zola bambeni na beto (3x)

Bo ke na maboko ya Nzambi.

II. Revisio—

↑ Kuyindula diaka baleso me luta :

- Beto me mona muntu mosi ya me wila Davidi kimpala. Yandi nani ? (Saule)
- Kimpala me benda yandi kusala nki mambu ya mbi ? (Meka kufwa yandi)
- Nani wilaka Davidi kimpala ve, kansi salaka kinduku ya ngolo ti yandi ? (Yonatani)

III. Kulonga Leso Yai—

⇒ Kuyantika :

Keti nge me mona muntu ya me baka nge na kimbeni, ata nge salaka yandi mbi ve ? Mono waka nde mwana mosi ya nzo-nkanda bakaka mwana ya nkaka na kimbeni sambu yandi salaka kuluta mbote na examen. Davidi na Bible, yandi mpi me sala kima ve na Mfumu

Saule, kansi Saule bakaka yandi na kimbeni.

🏠 **Developpement (Malongi ya nene ya lesu yai na banti ya malongi 4)** : [Moniteur, histoire yai kele nda (bakapu 4 ya mvimba) yo yina beto ta sala somere ya bitini ya nkaka.]

20.1 Davidi zabaka nde Saule me zenga na kufwa yandi, yo yina yandi tinaka.

📖 **Tangila bana** : Somere yai ya kapu 21-23:

Nganga-Nzambi sadisaka Davidi na madia ti mbele. Davidi kwendaka kuzinga ya dibulu mosi na matadi. Kuna bantu kiteso ya 400 kwendaka na yandi, sambu bo vandaka na kiese ve na bisika ya bo vandaka. Bo kumaka basoda na yandi.

Saule zolaka kufwa konso muntu ya sadisaka Davidi. Yandi songaka basoda na yandi bo kufwa ata nganga-Nzambi. Kansi bo vandaka na boma kusala yo. Yo yina, Saule songaka muntu ya nkaka kusala yo. Yandi fwaka banganga-Nzambi 85, ti yokaka bwala na bo tiya. Kaka mosi basikaka--Abiatar, ti yandi kwendaka kuzinga na Davidi.

Nduku na yandi Yonatani kwisaka kumona yandi. Yonatani pesaka yandi ngolo na zina ya Nzambi. Bo tubaka diaka mpila bo me wakana na kinduku. Ebuna Yonatani vutukaka.

Basoda ya Saule landaka Davidi konso kisika yandi kwendaka, sambu bo kufwa yandi kaka. Davidi vandaka kaka kutina, kutina.

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

20.2 Saule kotaka na cave sika Davidi ti bantu na yandi vandaka kubumbana. Moyo ya Saule vandaka na diboko ya Davidi, kansi na kinsweki Davidi zengaka kaka kitini ya lele ya Saule.

📖 **Tangila bana** : 1 Samuele 24 :1-7

2-3...Saulebakaka basoda 3,000 ...ebuna yandi kwendaka kusosa Davidi ti bantu na yandi ...

4 ...Saule ...monaka dibulu mosi na kati ya matadi, yandi kotaka muna na kwenda na wese. Kisi ve Davidi ti bantu na yandi vandaka me bumbana na kati ya dibulu yina.

5 Bo tubilaka Davidi nde : « Yai kilumbu ya Mfumu Nzambi tubilaka nge nde Yandi ta pesa mbeni na nge na maboko na nge. Nge sala yandi konso kima ya nge zola. » Davidi pusanaka na mayele yonso kukonda makelele, yandi zenga nsongi ya lele ya Saule. ...

7 Yandi tubilaka bantu na yandi nde : « ...Mono lenda sala yandi mbi ve ata fioti, sambu Mfumu Nzambi Yandi mosi solaka yandi na kuvanda ntotila !

? Yula bana bakestio.

🕯️ Bana sala bageste.

🕯️ Bana yimba ti kina.

20.3 Na nima Saule basikaka, Davidi songaka yandi nki yandi me sala, ti sosaka ngemba na kati na bo.

📖 Tangila bana : 1 Samuele 24 :8-16

8 Mutindu yo yina, Davidi buyilaka bantu na yandi na kubwila Saule. Saule basikaka na dibulu yango. Yandi landaka nzila na yandi.

9 Ntangu yai, Davidi mpi basikaka na dibulu, ebuna yandi bingaka Saule nde : « Mfumu ! Mfumu ! » Saule talaka na nima. Davidi fukamaka na kusonga luzitu,

10 ebuna yandi tubaka nde : « Mfumu, sambu na nki nge ke wila bantu yina ke kusa nge nde mono ke sosa kusala nge mbi ?

11 Nge lenda mona nge mosi nde bubu yai, Mfumu Nzambi me pesa nge na maboko na mono kuna na dibulu. Bantu me songa mono na kufwa nge, kansi mono me zola ve.

Mono me tuba nde mono ke sala mfumu na mono mbi ve, sambu yandi kele ntotila ya Mfumu Nzambi me solaka.

12 Tata, tala kitini ya lele na nge na maboko na mono ! Sambu mono me zola ve kufwa nge, yo yina mono me zenga kaka nsoni ya lele ya nge... mono ke na ngindu ve ata fioti na kusala nge mbi to mubulu....

16 Mfumu Nzambi ta vanda zuzi. Yandi ta sambisa beto ti nge....»

? Yula bana bakestio.

🕯️ Bana sala bageste.

🕯️ Bana yimba ti kina.

20.4 Saule salaka ngemba ti Davidi.

📖 Tangila bana : 1 Samuele 24 :17-23

17 Ntangu Davidi me manisa kutuba, Saule tubaka nde : « Keti yina nge Davidi, mwana na mono ? » Yandi yantikaka kudila.

18 Ebuna yandi tubilaka Davidi nde : « Nge ke na raison, kansi mono ve. Nge me sala mono mbote, kansi mono me sala nge mbi.

....21 Mono zaba nde nge ta vanda kaka ntotila ya Isarele, kimfumu ya Israele ta bikalaka na maboko na nge.

22 Kansi zenga na zina ya Mfumu Nzambi nde nge ta bika kufwa bana na mono ve kana mono fwa, nge ta katula mpi ve zina na mono ti ya fami na mono sambu bantu kuvila yo ve kimakulu. »

23 Davidi mpi zengaka mpidina. Ntangu yai, Saule vutukaka na bwala na yandi....

? Yula bana bakestio.

🕯️ Bana sala bageste.

🕯️ Bana yimba ti kina.

>|< Kumanisa :

Davidi wilaka Saule mawa ti fwaka yandi ve. Yandi bakisaka nde Nzambi ke sala beto yonso mbote, yo yina, Yandi zola bantu na Yandi mpi kusala bantu yonso mbote, ata bo ke sala beto mbi.

♥ **Verse ya bubu yai :**

« ...Mono ke tubila beno nde : /Beno zola bambeni na beno,/ samba Nzambi/ sambu na bantu/ yina ke monisaka beno mpasi./ »

Matayo 5 :44, Malongi ya Yesu Kristo

Bana tuba verse na bandinga ya nkaka—na zulu—na nsi, ya nkento—ya bakala, ya ngolo—ya pima, etc.

👤 **Bankunga ya kwenda nzila mosi ti leso :**

Bana yimba mosi ya bankunga ya kwenda nzila mosi ti leso yai.

👐 **Devoir sambu na bakristo :**

Devoir mono ke pesa beno bakristo, yo yai : Sosa kusala mbote na bantu yonso. Ata kana muntu baka nge na kimbeni, nge vutula yandi kinduku. Ata yandi sala nge mbi, nge vutula yandi mbote. Yai ke pesa Nzambi kiese.

✝ **Kubinga bavidi na Yesu :**

Keti nge kele mukristo ? Nki ntangu nge kumaka mukristo ? Muntu ke butuka ve mukristo, ata bibuti na yandi zola Yesu mingi. Konso muntu fweti bakisa nde yandi me sala ve yina ya Nzambi ke zolaka. Nge fweti bakisa nde Nzambi salaka nge sambu na kupesa Yandi lukumu. Kansi nge me sola ve kupesa Yandi lukumu. Nge me sola nzila ya nge mosi. Yina kele masumu. Nzambi kele makasi na bantu ya masumu. Kana yai ke pesa nge mpasi na ntima, kele Mpeve ya Nzambi ya ke songa nge mambu yina. Balula ntima. Bika nzila ya nge mosi. Tula kivuvu na Yesu Kristo, Mwana ya Nzambi. Yandi pesaka moyo na Yandi nkailu sambu na kufuta mfuka ya masumu ya beto bantu. Tata Nzambi songaka nde Yandi me ndima nkailu ya Yesu, na mpila Yandi tedimisaka Yandi na lufwa. Bantu mingi monaka Yesu na moyo diaka. Na nima ya bilumbu 40, Yandi tombukaka na zulu. Kisalu na Yandi me mana, yo yina, Yandi vutukaka na Tata ya tindaka Yandi. Yandi me kangula nzila sambu na nge kukuma mwana ya Nzambi. O, kudilosa na Yesu bubu yai, ebuna, nge ta

guluka.

Konso mposo beto kele awa na nima ya ecodim kusadisa konso muntu ya zola tula ntima na Yesu.

Kana ntangu lunga,

📖 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 20

Leso 20



**« ...Mono ke tubila beno nde :
Benzo zola bambeni na beno,
samba Nzambi sambu na bantu
yina ke monisaka beno mpasi. »**

Matayo 5 :44, Malongi ya Yesu Kristo

Leso 21 Davidi sonikaka bankunga kusonga mpila yandi sosaka Nzambi na ntangu ya mpasi.

Bankunga kapu 18

I. Preparasio ya Moniteur—

🎯 Kikuma ya lesu :

Bana ta binga zina ya Nzambi na ntangu ya mpasi, sambu bo ta zaba nde Yandi kele na kiese kuwa kudila na bo, mpi kusadisa bo.

♥ Verse ya bubu yai :

Mfumu Nzambi,/ ntangu mono ke lomba nge/ na kwisa kusadisa mono/ na maboko ya bambeni,/ Nge ke gulusa mono./ Lukumu na Nge, Mfumu Nzambi ! Bankunga 18 :4

🗣️ Bankunga ya kwenda nzila mosi ti lesu :

Nzambi Ta Kuwa Nge

Nzambi ta kuwa nge (3X)

Na zina ya Yesu !

Yandi ta sadisa (3X)

Na zina ya Yesu !

Zitisa Yandi ! (3X)

Na zina ya Yesu !

Matondo na Nzambi (3X)

Na zina ya Yesu !

Lomba na Nzambi Kaka

Beto fweti lombila

Na Nzambi, Yandi kaka

Ata muntu mosi ve

Ya nkaka lenda sadisa !

Mvutu :

Lomba na Nzambi !

Na Nzambi kaka

Lomba na Nzambi

Na zina ya Yesu !

II. Revisio—

↑ Kuyindula diaka baleso me luta:

- Beto me mona Davidi na nki ntangu ya kiese ?

(Bonso ntangu Samuele songaka nde Nzambi me sola yandi kuvanda ntotila ya mpa ya Israele.)

- Beto me mona Davidi mpi na ntangu ya mpasi. Bonso nki ?
(Bonso mbala mingi Saule zolaka kufwa yandi.)

III. Kulonga Leso Yai—

⇒ Kuyantika :

Beto me mona nde Davidi sonikaka bankunga mingi sambu na kumisa Nzambi. Ndambu bankunga, yandi sonikaka kubinga Nzambi na ntangu ya mpasi, bonso ntangu Mfumu Saule vandaka kuzomba yandi. Beto ta mona mbandu mosi bubuyai—Bankunga 18. Yandi sonikaka yo na nima Nzambi me gulusa yandi na diboko ya Mfumu Saule.

🏠 Developpement (Malongi ya nene ya lesu yai na banti ya malongi 4) :

21.1 Davidi kumisaka Nzambi. Yandi ndimaka nde Nzambi vandaka ngolo na Yandi.

📖 **Tangila bana :** Bankunga 18 :1-3

1 Nkunga yai Davidi yimbilaka Mfumu Nzambi, ntangu Nzambi gulusaka yandi na maboko ya Saule ti bambeni ya nkaka.

*2 Mfumu Nzambi, mono ke zolaka Nge mingi,
Nge kele ngolo na mono.*

*3 Mfumu Nzambi, nge kele dikunzi na mono,
Nge kele kisika ya ngolo ya mono ke tininaka.*

*Nge Muntu ke gulusaka mono na bambeni.
Nge kele dibaya yina ke taninaka mono na batolotolo ya bambeni.*


*Nge kele lupangu ya bibaka ya ngolo,
Kisika ya mono ke gulukaka,
Kisika ya nene ya mono ke pemaka.*

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

21.2 Yandi bingaka Nzambi na ntangu mosi ya mpasi, ti Nzambi waka yandi.

 **Tangila bana :** Bankunga 18 :4-6

4 Mfumu Nzambi, ntangu mono ke lomba nge na kwisa kusadisa mono na maboko ya bambeni,

Nge ke gulusa mono.

Lukumu na nge, Mfumu Nzambi !

5 Lufwa kangaka mono nsinga na nkingu.

Nsudi na yo pesaka mono boma.

6 Nsi ya bafwa vingilaka mono.


Maziamu tudilaka mono mutambu.

? Yula bana bakestio.

🏠 Bana sala bageste.

👤 Bana yimba ti kina.

21.3 Nzambi kulumukaka sambu na kusadisa yandi.

 **Tangila bana :** Bankunga 18 :7-9

7 Na ntangu ya mpasi mono lombaka Mfumu Nzambi, Nzambi na mono Na kwisa kusadisa mono.

Kuna na nzo na Yandi, Yandi waka ndinga na mono.

Yandi waka mutindu mono ke didila Yandi.

8 Ebuna ntoto yonso nikanaka, yo tekitaka. Bangumba mpi nikanaka ngolo sambu Nzambi waka makasi.

9 Midinga vandaka kubasika na mbombo na yandi.

Tiya ya ngolo ti makala ya tiya vandaka kubasika na munoko na Yandi.

? Yula bana bakestio.

🏠 Bana sala bageste.

👤 Bana yimba ti kina.

21.4 Nzambi gulusaka Davidi na diboko ya Saule. Bankunga 18 :17-18

 **Tangila bana :**

17 Mfumu Nzambi kuna na zulu ya Yandi kele,

Yandi kulumusaka diboko na Yandi. Yandi simbaka mono.

Yandi katulaka mono na kigonsa bonso na kati ya masa.

18 Yandi botulaka mono na maboko ya bambeni

Ti bantu yonso yina ke mengaka mono, me lutaka mono na ngolo.

? Yula bana bakestio.

🏠 Bana sala bageste.

👤 Bana yimba ti kina.

21.5 Davidi pesaka Nzambi lukumu sambu Yandi me gulusa yandi na bambeni. Bankunga 18 :47

 **Tangila bana :**

47 Lukumu na Mfumu Nzambi !

Lukumu na Dikunzi na mono !

Lukumu kuvanda na Nzambi yai ke gulusaka mono !

? Yula bana bakestio.

🏠 Bana sala bageste.

👤 Bana yimba ti kina.

➤|◀ Kumanisa :

Na nkunga yai yonso, Davidi ke pesa Nzambi lukumu sambu yandi me binga Yandi na ntangu ya mpasi, ti Nzambi me wa yandi. Yandi me gulusa yandi na diboko ya Saule, ya vandaka kuzomba yandi na nzala kaka na kufwa yandi.

Nzambi ke wa konso ntangu beto binga zina na Yandi !

♥ Verse ya bubu yai :

Mfumu Nzambi, / ntangu mono ke lomba nge / na kwisa kusadisa mono / na maboko ya bambeni, / Nge ke gulusa mono. / Lukumu na Nge, Mfumu Nzambi ! Bankunga 18 :4

[Bana tuba verse mbala 6 ti bageste.]

 **Bankunga ya kwenda nzila mosi ti leso :**

Bana yimba mosi ya bankunga ya kwenda nzila mosi ti leso yai.

 **Devoir sambu na bakristo :**

Bana bakristo, nki beno ke sala na ntangu ya mpasi ? Devoir mono ke pesa beno, kubinga Nzambi na bampasi yonso. Bika Yandi kusadisa nge.

 **Kubinga bavidi na Yesu :**

Kansi yo kele mpasi kubinga Nzambi kana nge me zaba Yandi ntete ve. Ntangu nge balula ntima ti yamba Yesu Kristo, mbala mosi nge zaba mpi Tata Nzambi. Yesu tubaka nde, “Kana beno zaba Mono, beno ta zaba mpi Tata” (Yoane 14:7a). Keti nge zaba mbote nde nge zaba Yandi ? Kana nge mona bubu yai nde nge ke na mfunu kuyamba Yandi, mono ta vanda na kiese kusadisa nge na nima ya ecodim.

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

==NSUKA YA LESO 21

Leso 21



***Mfumu Nzambi, ntangu mono ke
lomba Nge na kwisa kusadisa
mono na maboko ya bambeni,
Nge ke gulusa mono.***

***Lukumu na Nge, Mfumu
Nzambi !*** *Bankunga 18 :4*

Leso 22 Abigail sosaka ngemba ti Davidi.

1 Samuele 25 :3-35

I. Preparasio ya Moniteur—

🕒 Kikuma ya lesa :

Bana ta sosa ngemba na mpila ya bo tuba.

♥ Verse ya bubu yai :

*Mvutu ya malembe/ ke lembikaka makasi/
Kansi mvutu ya makasi/ ke tedimisaka yo./
Bingana 15 :1*

🗣️ Bankunga ya kwenda nzila mosi ti lesa :

Sadila verse ya bubu yai bonso nkunga kukwenda nzila mosi ti lesa.

II. Revisio—

↑ Kuyindula diaka baleso me luta:

Na bamposo me luta, beto me mona mpila Nzambi sadisaka Davidi ntangu Saule vandaka kuzomba yandi. Beto monaka nde na nima Nzambi sadisaka yandi, Davidi sonikaka nkunga sambu na kumisa Nzambi.

III. Kulonga Leso Yai—

⇒ Kuyantika :

Davidi vandaka kuzinga kaka na nseke, ti yandi nwanaka bitumba ya nkaka ti bambeni ya Israele. Na nima ya ntangu, profete Samuele kufwaka. Bo dilaka yandi ti zikaka yandi. Ntangu yai, bantu ya Davidi me kuma 600. Bo kumaka penepene na bwala mosi sika mvwama ya nene zingaka, zina ya Nabale.

🏠 **Developpement (Malongi ya nene ya lesa yai na banti 4) :**

22.1 Abigaile, nkento ya Nabale mayele, kansi Nabale muntu ya mpasi ti makasi. Na luzitu yonso, David tindaka bantu na nzo na bo kusonga mpila yandi me sadisa bamvungi na bo, ti kulomba lusadisus na bo.

📖 **Tangila bana :** 1 Samuele 25 : 3-9

3 Zina ya nkento na yandi Abigaile, nkento mosi ya kitoko ti mayele, kansi bakala na yandi vandaka bakala mosi ya mpasi ti ya makasi.

4-6 ...Davidi... tindilaka yandi bana-bakala kumi nde : « Beno kwenda ...na Nabale, beno pesa yandi mbote na zina na mono nde : 'Mbote na nge, nduku na mono. Mbote na nge, na fami na nge ti na yina yonso kele na nge.

7 ...Bantu na nge yina ke kebaka mameme, ntangu bo vandaka ti beto, beto salaka bo ata kima ve....

8 Yula bo, bo ta songa nge. Mono ke lomba nge, nge baka bantu na mono mbote, sambu bubu yai kele kilembu ya fete. Yo yina, pardo, kana nge zola, pesa bantu na nge ti mwana na nge Davidi konso kima nge ke na yo.' »

9 Bantu ya Davidi kwendaka na Nabale, bo tubilaka yandi mambu yonso ya Davidi tubaka, ebuna bo vingilaka.

? Yula bana bakestio.

🏠 Bana sala bageste.

🗣️ Bana yimba ti kina.

22.2 Nabale vutulaka bo na mpila mosi ya makasi.

📖 **Tangila bana :** 1 Samuele 25 :10-11

10 Kansi Nabale pesaka mvutu yai : « Davidi nani ? Mwana ya Yese nani ? Bilumbu yai bampika mingi ke tina-tina bamfumumu na bo !


11 Ebuna mono baka mampa na mono, ti masa na mono, ti mbisi na mono me fwila bantu na mono ya kisalu, mono pesa na bantu me katuka kana na wapi ? Ikele ve ! »

? Yula bana bakestio.

🏠 Bana sala bageste.

🗣️ Bana yimba ti kina.

22.3 Ntangu Davidi waka yo, yandi yilamaka kunwanisa Nabale. Muntu mosi zabisaka Abigaile, ebuna yandi kwendaka kutuba na malembe na Davidi ti kusadisa yandi na madia.

 **Tangila bana : 1 Samuele 25 :12-31**

12 Bantu ya Davidi vutukaka, bo telaka Davidi mambu ya Nabale tubaka.

13 Davidi tubaka nde : « Beno yonso, mbele na maboko ! » Bo yonso bakaka bambele na bo, Davidi mpi bakaka ya yandi, ebuna yandi kwendaka ti bantu na yandi kiteso ya 400...

18 Nswalu Abigaile bakaka mampa...vinu, mameme ...ya kuyoka...ble ya kukalanga... bambuma ya vinu, ti bagato...ya bafige. Yandi tulaka yo na zulu ya bampunda.

20 Abigaile mataka na zulu ya mpunda na yandi....Yandi ke mona Davidi ti bantu na yandi ke kwisa...

21 Na ntangu yina, Davidi vandaka me bokuta na nsi ya ntima....


23-24 Ntangu Abigaile monaka Davidi, yandi tulukaka nswalu na mpinda. Yandi fukamaka na ntwala ya Davidi, ilungi na ntoto. Ebuna yandi tubilaka yandi nde : « Pardo mingi mfumu, mbi kele ya mono...Bika mono mpika na nge kutuba na nge. Wa ndinga na mono, pardo.

25 Mfumu, kulanda ve mambu ya Nabale. ...Kansi mono, mpika na nge, mono monaka ve bantu yina ya nge tindaka.

...27-28 Pardo mfumu, tala kado yai ya mono me kwisa kunatila nge sambu nge kabila yo bantu na nge. Pardo, lolula mono

? Yula bana bakestio.
🏠 Bana sala bageste.
👤 Bana yimba ti kina.

22.4 Davidi ndimaka kutuba ya malembe ya Abigail, yo yina ngemba kotaka.

 **Tangila bana : 1 Samuele 25 :32-35**

32 Davidi tubilaka Abigaile nde : « Lukumu na Mfumu Nzambi...me tinda nge bubu yai na kwisa kukutana na mono !

33 Mersi sambu na mayele na nge...

35 Davidi ndimaka kado ya Abigaile natilaka yandi, ebuna yandi tubaka na yandi nde : « Vutuka ka nge, kumona boma ve. Mono me wa nge. Mono me ndima nge. »

? Yula bana bakestio.
🏠 Bana sala bageste.
👤 Bana yimba ti kina.

>|< Kumanisa :

Kana makambu ikele na kati ya bantu, mbala mingi beto kuwa nzala kupesa mvutu ya makasi. Mvutu ya mutindu yina ke sadisa ve. Mbote bana ya Nzambi longuka mutindu kupesa mvutu ya malembe, bonso Abigaile salaka.

♥ Verse ya bubu yai :

Mvutu ya malembe/ ke lembikaka makasi/, Kansi mvutu ya makasi/ ke tedimisaka yo./ Bingana 15 :1

Bana yimba yo ti bageste. Bo kina mpi mbala sambanu.

👤 Devoir sambu na bakristo :

Beno bakristo, na mposo ke kwisa mono ke pesa beno devoir kukeba na bamvutu nge ke pesaka na bantu. Tula ngolo nde yo vanda ya makasi ve, kansi ya luzitu ti ya malembe.

✝ Kubinga bavidu na Yesu :

Bubuyai beto ke yindula bamvutu. Lumbu mosi nge ta telama na ntwala ya Nzambi. Nki mvutu Yandi ta pesa nge ? Yesu tubaka nde bantu ya nkaka monikaka bonso balandi na Yandi, kansi na nsuka Nzambi ta songa bo nde, 'Mono me zabaka beno ntete ve. Beno bantu ke salaka makambu ya mbi, beno katuka awa na meso na mono !' (Matayo 7:23). Kana kieleka nge me balula ntima na Yesu, nge ta landa mpi Yandi. Yandi ta pesa nge ntima ya

mpa ya ke zola masumu diaka ve. Keti nge zaba mbote nde nge me balula ntima na nge. Balula ntima zola tuba “changement”. Kana nge zola zikisa mambu yina bubuyai, kwisa solula ti beto na nima ya ecodim.

==NSUKA YA LESO 22

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

Leso 22



***Mvutu ya malembe ke
lembikaka makasi,
Kansi mvutu ya makasi ke
tedimisaka yo.
Bingana 15 :1***

Leso 23 Davidi tinaka makasi ya Saule ti wilaka yandi mawa diaka.

1 Samuele 26 :1-25, 27:1-12

I. Preparasio ya Moniteur—

🎯 Kikuma ya lesa :

Bana ta vutula mbi na mbi ve, kansi bo ta vutula mbote kana muntu me sala bo mbi.

❤️ Verse ya bubu yai :

Reviser diaka bandinga ya Yesu na Matayo 5 :44 :

« ...Mono ke tubila beno nde :/ Beno zola bambeni na beno./ Samba Nzambi sambu na bantu/ yina ke monisaka beno mpasi. »

🗣️ Nkunga ya kwenda nzila mosi ti lesa :

Beto Vutula Mbi Ve, Ve, Ve

Beto vutula mbi—ve, ve, ve ! (3x)
Beto pesa yo na Nzambi.

Kuzuze kele kisalu ya Nzambi (3x)
Kansi ya beto bantu ve.

Beto zola bambeni na beto (3x)
Bo ke na maboko ya Nzambi.

II. Revisio—

👆 Kuyindula diaka baleso me luta :

Beto me mona nde profete Samuele songaka nde Davidi ta kuma ntotila na nima ya Saule. Beto me mona nde Nzambi me zenga nde kimfumu ya Saule ta zinga ve, sambu yandi me lemfuka ve na Nzambi. Saule me meka mbala mingi na kufwa Davidi, kansi yandi lungaka ve. Davidi me mona ntangu ya yandi lendaka kufwa Saule, kansi yandi buyaka, sambu yandi monaka nde, Nzambi me tula Saule mfumu, yo yina, kele kaka Nzambi ya lenda katula yandi. Davidi songaka Saule mpila yandi me wila yandi mawa, yo yina Saule pindulaka mabanza ti monaka nde yandi me sala mbi. Yandi ndimaka nde yandi ta zomba Davidi diaka ve.

III. Kulonga Leso Yai—

➡️ Kuyantika :

Keti yandi ta bambuka promese yina, to yandi ta balula diaka na kusosa Davidi ? Ti nki Davidi ta sala kana Saule yantika kuzomba yandi diaka ?

🏠 Developpement (Malongi ya nene ya lesa yai na banti ya malongi 4) :

23.1 Davidi bikalaka kaka na nseke. Na ntangu fioti, yandi waka nde Saule vandaka kuzomba yandi diaka. Yandi tindaka bantu ya zikisaka nde kieleka yo vandaka mpidina.

📖 Tangila bana : 1 Samuele 26 :1-4

1 Bantu ya nkaka ...kwendaka na Saule ...bo songaka yandi nde Davidi me bumbana ...na ngumba...

2 Saule bakaka basoda 3,000..., ebuna yandi kwendaka na ntoto ya zelo na zelo ...sambu na kusosa Davidi.

3 Yandi tungaka camp na yandi ...Davidi ...waka nde Saule me kwisa kusosa yandi,

4 yandi tindaka bantu na kutala ti kuzaba mpenza kaka Saule me kwisa. Yandi monaka nde yo kele kieleka.

❓ Yula bana bakestio.

🏠 Bana sala bageste.

🗣️ Bana yimba ti kina.

23.2 Davidi monaka Saule ti basoda yonso na yandi kulala mpongi ya ngolo. Nsadisi na yandi Abishai zoaka kufwa Saule, kansi Davidi kangaka yandi nzila. Yandi bakaka kaka dikonga ti dibungu ya masa ya vandaka kulala penepene na ntu ya Saule, yandi kwendaka na yo.

📖 Tangila bana : 1 Samuele 26 :5-12 26

....6 Ntangu yai, Davidi yulaka Ahimeleki..., ti Abishai ... nde : « Nani ke kwenda ti mono na camp ya Saule ? Abishai vutulaka nde : « Mono...ke kwenda ti nge. »

7 Ebuna na kati ya mpimpa, Davidi ti Abishai kwendaka kukota na camp ya Saule. Saule

vandaka ke lala na kati-kati ya camp mpenza... Abnere ti basoda na yandi ...me lala.

8 Abishai tubilaka Davidi nde : « Nzambi me pesa mbeni na nge na maboko na nge bubu yai. Bika mono, mono fwa yandi na dikonga na yandi mosi. Mono bula yandi mbala mosi tii na ntoto. Mono ta bula yandi mbala ya zole ve ! »

9 Kansi Davidi nde : « Kufwa yandi ve ! Nani lenda tula diboko na muntu yina ya Mfumu Nzambi solaka, kukonda ndola ?

10 Na zina ya Mfumu Nzambi ...ya moyo, mono ke zaba nde Mfumu Nzambi Yandi mosi ta fwa Saule kana ntangu na Yandi me lunga, to na bitumba.

11 b Beto baka kaka dikonga na yandi ti dibungu na yandi ya masa. Beto kwenda. »

12 Yo yina, Davidi bakaka dikonga ti dibungu yina vandaka na ntu ya mbeto ya Saule. Bo kwendaka ka bo. Ata muntu mosi ve telamaka na mpongi to kumonaka bo to kuzabaka nki mambu me bwa. Bo yonso vandaka kulala kaka, sambu Mfumu Nzambi tindaka bo mpongi ya ngolo.

? Yula bana bakestio.

🏠 Bana sala bageste.

👤 Bana yimba ti kina.

23.3 Davidi bingaka mfumu ya basoda ya Saule, Abnere, nde, Sambu na nki nge ke kengila mfumu na nge ve ? Bo yonso telamaka na mpongi, ti Saule bakisaka nde Davidi me wila yandi mawa diaka.



Tangila bana : 1 Samuele 26 :13-20

13 Davidi lutaka na simu ya nkaka ya dibulu. Yandi telamaka mwa-ntama ti camp na zulu ya ngumba,

14 ebuna yandi bingaka na ndinga ya ngolo basoda ya Saule ti Abnere nde : « Abnere, keti nge ke wa mono ve ? » ...

15 Davidi nde : « ...sambu na nki nge ke kengila ve mfumu na nge, ntotila ? Muntu

mosi kwisaka kukota na camp na beno na kufwa mfumu na nge.

16Wapi dikonga ya ntotila ? Wapi dibungu ya nasa yina vandaka na ntu ya mbeto na yandi ?

17 Saule zabaka nde yina ndinga ya Davidi, ebuna yandi yulaka yandi nde : « Yina nge, mwana na mono Davidi ? » Davidi nde : « E, mfumu, yai mono.

18 Mfumu, sambu na nki nge ke landa diaka mono, muntu na nge ? Nki mono me sala nge ? Nki mbi mono me sala ?

20 ...Mfumu, sambu na nki nge ke kwisa kusosa kufwa mono yai, niama ya mpamba ? Sambu na nki nge ke kwisa kukula mono bonso muntu me kwenda kuzomba bangwadi na bangumba ?

? Yula bana bakestio.

🏠 Bana sala bageste.

👤 Bana yimba ti kina.

23.4 Saule ndimaka masumu na yandi diaka ti silaka diaka nde yandi ta bika mambu yai ya kuzomba Davidi. Kansi Davidi bakisaka nde Saule lenda balula diaka ti kufwa yandi. Yo yina, yandi kwendaka kuzinga na kati ya bantu ya Filistia.



Tangila bana : 1 Samuele 26 :21-25, 27 :1, 5-7

21 Saule vutulaka nde : « Mono me sala mbi. Kwisa kuvutuka, mwana na mono Davidi. Mono ta sala diaka nge mbi ve, sambu nge me fwa mono ve bubu. Ya kieleka, mono me sala buzoba. Mono me wila mingi mpenza. »

22 Davidi nde : « Mfumu, tala dikonga na nge yo yai. Tinda muntu na nge mosi, yandi kwisa kubaka yo.

23 ...Bubu yai, (Nzambi) me pesa nge na maboko na mono, kansi mono me sala nge kima ve, sambu nge kele ntotila yina ya Yandi mosi Mfumu Nzambi tulaka. » ...

25 Saule tubaka na Davidi nde : « Nzambi

kusakumuna nge, mwana na mono. Konso kima ya nge ta zola kusala, nge ta sala yo mpi. » Ebuna Davidi kwendaka nzila na yandi, Saule mpi vutukaka na bwala.

27 :1 Davidi tubaka na nsi ya ntima nde : « Kilumbu kele mona ta fwa na maboko ya Saule. Mbote mono tina kaka na ntoto ya bantu ya Filistia. Mpidina Saule ta bikisa na kusosa mono na ntoto ya Israele. Mono ta vanda mpi na ngemba kuna. »

5 Davidi tubilaka Akishi (Mfumu ya bwala sika yandi tindaka) nde « Mfumu, kana nge ke mona mono mbote, bika mono, mono tunga na bwaka ya nkaka. Yo kele mfunu ve mono na kubikala ti nge awa na bwala yai ya kimfumu. »

6-7...Akishi pesaka yandi bwala Sikilagi na kutunga...Davidi zingaka na ntoto ya bantu ya Filistia mvula mosi na na bangonda iya.

? Yula bana bakestio.

🏠 Bana sala bageste.

👤 Bana yimba ti kina.

➤|< Kumanisa :

Saule salaka Davidi mbi mbala mingi. Kana Davidi vutulaka yandi mbi, mvita ya ngolo zolaka kuvanda. Kansi Davidi vutulaka mbi ve. Yandi salaka Saule mbote. Yandi wilaka yandi mawa. Mbala zole, yandi monaka mpila na kufwa Saule, kansi yandi salaka Saule kima ve. Na nsuka, Saule basikaka ti bikisaka Davidi diaka na ngemba.

Kuvutula mbi na mbi ke matisaka makambu. Yindula. Kana muntu sala nge mbi, ti nge vutula, nge me sala yandi mbi. Yandi mona nde yandi fweti vutula nge, ebuna yandi sala nge mbi diaka. Ebuna nge fweti vutula yandi mbi. Ebuna yandi fweti vutula nge mbi. Ebuna nge fweti vutula yandi. Yo kwendaaaaa. Nki mutindu yo lenda suka? Verse na beto bubuyai ke songa yo. Beno me longuka yo dezia.

♥ Verse ya bubu yai :

Matayo 5 :44 : Bandinga ya Yesu Kristo : « ...Mono ke tubila beno nde:/ Beno zola bambeni na beno,/ samba Nzambi sambu na bantu/ yina ke monisaka beno mpasi. »

👤 Bankunga ya kwenda nzila mosi ti lesu :

Bana yimba nkunga mosi diaka ya ke kwenda nzila mosi ti lesu yai.

👤 Devoir sambu na bakristo :

Devoir mono ke pesa beno bakristo, yo yai : Na mposo yai, konso ntangu muntu sala nge mbi, to tuba mbi sambu na nge, wila yandi mawa ti vutula yandi mbote. Yo ta sadisa mingi nde makambu yina kumana.

✝ Kubinga bavidu na Yesu :

Beto yonso me sala Nzambi mbi. Yandi me pesa beto moyo ti bima mingi ya mbote, sambu beto lenda pesa Yandi lukumu. Kansi mbala mingi, beto me yindula Yandi ve. Beto me vutula Yandi matondo ve. Beto me sala mambu mingi ya lunga ve na meso na Yandi. Kansi na mawa na Yandi, Yandi me tindila beto Mwana na Yandi, Yesu Kristo. Na mawa na Yandi, Yesu ndimaka kumona mpasi ti kufwa sambu na kufuta mfuka ya mbi na beto. Yandi me telama na lufwa, Yandi me vutuka na zulu, ti Yandi kele na moyo bubuyai. Yandi ta kuwa beto kana beto binga zina na Yandi. Kana nge zola vutuka na Nzambi bubuyai, balula ntima na nge, kutula kivuvu kaka na Yandi, kwisa kumona mono na nima ya ecodim. Mono ta vanda na kiese na kusadisa nge. To, nge lenda binga zina na Yandi ti balula ntima konso ntangu, sambu makutu na Yandi kele kukangula na kubinga na nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 23

Leso 23



Bandinga ya Yesu Kristo :

***« ...Mono ke tubila beno nde :
Benozola bambeni na beno,
samba Nzambi sambu na
bantu yina ke monisaka beno
mpasi. »***

Matayo 5 :44

Leso 24 Nzambi buyaka Saule sambu yandi sosaka nganga-ngombo.

1 Samuele 28

I. Preparasio ya Moniteur—

🎯 Kikuma ya lesa :

Bana ta sosa lusadisya ya Nzambi, ebuna bo ta sosa yo ve na banganga-ngombo, bafetishe, magie, kindoki, etc.

♥ Verse ya bubu yai :

*Kana bantu kusonga beno na kwenda kuyula banganga-ngombo/...kana bo tuba nde :
/« Beno kwenda kaka sambu beto fweti yula badiabulu ti bamvumbi/...beno ta vutula nde,/ « Beno wa malongi ya Mfumu Nzambi ke pesa beno !/ Beno wila banganga ve... »/ Yezaya 8 :19-20*

🗨️ Bankunga ya kwenda nzila mosi ti lesa : Banzambi ya Nkaka

Banzaaa-mpi ya nkaka
Bantu me sala yo
Nge kaka ke Nzambi
Ya salaka beto !

Lomba na Nzambi Kaka

Beto fweti lombila
Na Nzambi, Yandi kaka
Ata muntu mosi ve
Ya nkaka lenda sadisa !

Mvutu :

Lomba na Nzambi !
Na Nzambi kaka
Lomba na Nzambi
Na zina ya Yesu !

Vutuka, Afrika ! Vutuka !

Vutuka, Afrika, vutuka !
Vutuka na Nzambi nge me vila

Beto bika bampeve yonso, biteki yonso,
Beto vutuka n'andi ya salaka beto !
Beto vutuka n'andi ya salaka beto !

II. Revisio—

† Kuyindula diaka baleso me luta:

Na lesa me luta, beto monaka mpila nde Saule landaka diaka kuzomba Davidi. Beto monaka mpila Davidi monaka mpila na kufwa yandi, kansi yandi salaka yo ve. Yandi wilaka Saule mawa diaka. Saule tubaka nde pardo, mono me sala mbi. Kansi Davidi bakisaka nde yandi lenda baluka diaka, nde lumbu mosi Saule lenda kufwa yandi. Yo yina, yandi bikisaka ntoto na yandi Israele. Yandi kwendaka kuzinga na kati ya bantu ya Filistia. Yandi tungaka bwala kuna zina ya Sikilagi.

III. Kulonga Leso Yai—

➡ Kuyantika :

Saule me sala mbi na meso ya Nzambi mbala ikwa ? (Ee, mbala mingi.) Keti yandi ta vutuka na Nzambi, to yandi ta landa kaka na nzila na yandi mosi ? Bubuyai beto ta mona nde yandi salaka mambu mosi ya mbi diaka. O, mawa na Mfumu Saule !

🏠 Developpement (Malongi ya nene ya lesa yai na banti ya malongi 4) :

24.1 Saule yulaka Nzambi nki kusala ntangu bantu ya Filistia kwisaka kunwanisa Israele, kansi Nzambi pesaka mvutu ve. Yo yina, Saule kwendaka na kinsweki kusosa nganga-ngombo.

📖 Tangila bana : 1 Samuele 28 :1-10

1 Na ntangu yango yina, bantu ya Filistia bingaka basoda na bo sambu na kwenda kunwana bitumba na bantu ya Israele....

3 Na ntangu (ya lufwa ya Samuele), Saule basisaka nsiku nde bantu kwenda diaka ve kuyula banganga-nkisi to banganga-ngombo.

(NB sambu na bana ya me yela : *Na français yo ke tuba nde yandi basisaka bo na ntoto ya Israele. Nzambi me pesa Moize nsiku nde bandoki lenda kuzinga ve (Kubasika 22 :17).*

5 Ntangu Saule monaka camp ya basoda ya Filistia, boma simbaka yandi mingi ti kutekita.

6 Yandi yulaka Mfumu Nzambi, kansi Yandi pesaka yandi mvutu ve...

7 Ntangu yai, Saule tubaka na bantu na yandi nde : « Beno sosila mono nkento mosi kele nganga-ngombo. Mono kwenda kuyula yandi. » Bo tubaka nde : « Ke na nkento mosi na bwala Ene-Dore kele nganga-ngombo. »

8 Saule ...Iwataka bilele ya nkaka, na mpila nde bantu kuzaba ve nde yai ntotila Saule, ebuna na mpimpa yandi kwendaka...Yandi tubilaka nkento nde, « Pardo, yula bankaka na mono me fwaka, nge zabisa mono mambu ke kwisa. Bingila mono muntu ya mono ke songa nge. »

9 Nkento yina tubaka nde : « Nge zaba mbote-mbote mambu ya Ntotila Saule me sala, mutindu yandi me kula-kula banganga-nkisi ti banganga-ngombo na Israele. Ebuna sambu na nki nge ke sosila mono lufwa ? »


10 Saule nde : « Mono ke zenga na zina ya Mfumu Nzambi, Nzambi ya moyo, nde mpasi ta bwila nge ve ata fioti kana nge sala yo. »

? Yula bana bakestio.

🏠 Bana sala bageste.

👂 Bana yimba ti kina.

24.2 Yandi lombaka nganga-ngombo yina kutedimisa Samuele, ye yandi salaka yo.

 **Tangila bana :** 1 Samuele 28 :11-14

11 Nkento nde : « Nge zola mono bingila nge nani ? » Saule nde : « Samuele. »

12 Ntangu nkento monaka Samuele, yandi tulaka ndinga ya ngolo, ebuna yandi tubilaka Saule nde : « Si, nge mfumu Saule ! Sambu na nki nge me kusa mono ? »


13 Yandi nde : « Kumona boma ve. Nki nge ke mona ? » Nkento nde : « <Mono ke mona

bonso muntu mosi na nsi ya ntoto ke kwisa kutombuka. »

14 Saule yulaka yandi nde : « Yandi kele nki mutindu ? »

Yandi nde : « Yandi kele mbuta-muntu, me kudifika mvwela. » Saule zabaka nde yina Samuele. Yandi fukamaka ilungi na ntoto sambu na kusonga luzitu.

24.3 Samuele vutulaka nsangu mosi ya mawa. Nzambi me bika Saule, me kuma mbeni na yandi. Yandi ta katula yandi kimfumu, ti mbasi yandi ti bana na yandi yonso, bo ta fwa na mvita. Israele mpi na nunga ve.

 **Tangila bana :** 1 Samuele 28 :15-19

15 Samuele yulaka Saule nde : « Sambu na nki nge me kwisa kuyangisa mono na kubinga mono awa ? » Saule nde : « Mono ke na mpasi mingi. Bantu ya Filistia me kwisa kunwanisa mono, ebuna Nzambi me bikisa mono. Yandi me pesa mvutu ve, ata na munoko ya bapofete, ata na bandosi. Yo yina, mono me binga nge, nge songa mono, mono sala nki. »


16 Samuele nde : « Sambu na nki nge fweti binga mono, kana Mfumu Nzambi Yandi mosi me bikisa nge, Yandi me kuma mbeni na nge ?

17 Mfumu Nzambi me sala nge mutindu Yandi tubaka na munoko na mono. Yandi me botula kimfumu na maboko na nge. Yandi me pesa yo na muntu ya nkaka, Davidi.

18 Nge landaka ve nsiku ya Mfumu Nzambi. Nge fwaka ve kimakulu bantu ya dikanda ya Amaleki ti bima na bo yonso. Yo yina, Mfumu Nzambi ke sala nge mambu ya mutindu yai bubu.

19 Yandi ke pesa nge ti bantu na nge, bantu ya Israele, na maboko ya bantu ya Filistia. Mbasi nge ti bana na nge, beno ta kwisa kukuta mono na nsi ya bafwa, ebuna basoda na nge, Mfumu Nzambi ta pesa bo na maboko ya bantu ya Filistia. »

24.4 Ntangu Saule waka nsangu yina, yandi bwaka na ntoto, ti ngolo na yandi kumanaka.

 **Tangila bana :** 1 Samuele 28 :20

20 Na mbala mosi, Saule bwaka na ntoto, yandi lala yandi ya mvimba na ntoto, sambu mambu ya Samuele tubilaka yandi, yo pesaka yandi boma mingi. Yandi vandaka petepete na nitu...

>|< Kumanisa :

Bana, Nzambi zola sadisa bantu na Yandi. Kana Yandi kuwa ve, mbote beto kudyula keti beto kele kulanda Yandi mbote. Kana Yandi pesa mvutu ve, yai ke songa ve nde beto kwenda kusosa lusadisu na bandoki, na banganga-ngombo, na magie, na bafetishe. Bima yai kele ya Nzambi ve. Yo kele ya Satana, ya bampeve ya mbi. Yo yina, nsiku ya Nzambi kele kubuya yo. Saule me sala mambu mingi ya mbi, kansi kusosa nganga-ngombo, yina mambu ya nsuka. Nzambi tangaka zuzema ya ngolo na zulu na yandi.

♥ Verse ya bubu yai :

*Kana bantu kusonga beno na kwenda kuyula banganga-ngombo/...kana bo tuba nde :
/« Beno kwenda kaka sambu beto fweti yula badiabulu ti bamvumbi/...beno ta vutula nde,/ « Beno wa malongi ya Mfumu Nzambi ke pesa beno !/ Beno wila banganga ve... »/ Yezaya 8 :19-20*

👁 Bankunga ya kwenda nzila mosi ti lesu :

Bana yimba mosi ya bankunga ya kwenda nzila mosi ti lesu yai.

👏 Devoir sambu na bakristo :

Mambu mono ke pesa beno bakristo, yo yai, yantika bubu ti kuna, kwenda diaka ve kusosa bafetishe, bamagie, etc. Kwenda kaka kusosa Nzambi na beto. Kana Yandi kuwa ve, yindula kana nge kele kulanda nzila na Yandi mbote-mbote. Ebuna landa kaka kusamba ti kutula Yandi ntima. Kana nge kele na fetishe, nata yo na pasteur sambu yandi sadisa nge kuyoka yo.

Bavidi ke sosa lusadisu ya bampeve ya mbi, kansi bakristo ke sosa Nzambi na bo kaka.

✝ Kubinga bavidi na Yesu :

Kana nge zaba ntete ve kana nge me balula ntima na Yesu Kristo, mono zola nge kuyindula mambu yai : Nzambi kumaka MBENI ya Saule. Samuele songaka Saule nde mbasi yandi ta fwa, ti Nzambi kele mbeni na yandi. O, mawa mingi na kufwa kana Nzambi kele mbeni na nge !

Mambu ya kieleka kele nde Nzambi kele mbeni ya konso muntu tii ntangu yandi balula ntima ti kota na nzila ya Yesu Kristo, Mwana ya Nzambi. Beto kele bambeni ya Nzambi sambu beto kele bantu ya mbi ya pesa Yandi lukumu ve. Kansi Nzambi zola vanda nduku na nge. Yandi tindaka Mwana na Yandi ya kitoko sambu Yandi katula kimbeni na kati na beto ti Nzambi. Yai kele raiso Yesu fwaka na zulu ya kulunsi.

Kansi Yandi bikalaka na lufwa ve. Yandi telamaka, Yandi vutukaka na Tata na Yandi na zulu. Yandi kele na moyo bubuyai. Yandi lenda kuwa nge kana nge binga zina na Yandi bubuyai. Yandi ke kinga nge kubalula ntima, kukota na nzila na Yandi.

Kana bubu yai nge mona nde nge kele na mfunu na Yandi, nge lenda binga zina na Yandi. Ndima masumu na nge. Lomba Yandi mawa ti ndolula. Kana nge zola kusamba ti muntu ya nkaka, beto kele awa konso mposo na nima ya ecodim, kana sambu na kusadisa nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 24

Leso 24



***Kana
bantu
kusonga
beno na
kwenda
kuyula***

banganga-ngombo

***...kana bo tuba nde : « Beno
kwenda kaka sambu beto fweti
yula badiabulu ti bamvumbi...***

beno ta vutula nde,

***« Beno wa malongi ya Mfumu
Nzambi ke pesa beno ! Beno wila
banganga ve... »***

Yezaya 8 :19-20

Leso 25 Saule fwaka na mvita.

1 Samuele 31

I. Preparasio ya Moniteur—

🎯 Kikuma ya lesa :

Bana ta tula ntu-ngolo ve, kansi bo ta vanda nswalu na kuwa ndongisila ya ndinga ya Nzambi. Kana bo kubwa na masumu, bo vanda nswalu kuvutuka na nzila.

♥ Verse ya bubu yai :

Kana nge ke tula ntu-ngolo/konso ntanqu bo ke pesa nge ndongisila,/ Kilumbu kele/ ntu na nge ta pasuka,/ yo ta yilama diaka ve./ Bingana 29 :!

👤 Bankunga ya kwenda nzila mosi ti lesa :

Kuwa Bible

Kuwa Bible, Tanga Bible
‘Buna nge ta mona
Nzila mbote mingi
Nzila mbote mingi
Ye ngangu ! Ye ngangu !

Kuwa Bible, Tanga Bible
‘Buna nge ta zaba
Mabanza ya Nzambi
Mabanza ya Nzambi
Na beto ! Na beto !

II. Revisio—

† Kuyindula diaka baleso me luta :

Na lesa me luta, beto monaka nde Saule salaka masumu diaka. Yandi zabaka nde ndinga ya Nzambi buyaka bantu na Yandi kukwenda na bantu ya magie. Yo yina, na bilumbu ya ntama, yandi basisaka bo na ntoto. Kansi mbala yai, Nzambi zola kuwa yandi diaka ve sambu na mbi yandi me sala. Yo yina, yandi vutuka na nzila ya mbi. Yandi sosa lusadisya ya nganga-ngombo.

Nganga bingaka Samuele, ti Samuele tubaka nde mbasi Saule ta fwa ti bana-bakala na yandi yonso. O, mawa na Saule !

III. Kulonga Lesa Yai—

➡ Kuyantika :

Keti lufwa ya Saule ta salama mutindu Samuele me tuba ? Beto ta mona bubuyai.

🌟 Developpement (Malongi ya nene ya lesa yai na banti ya malongi 3) :

25.1 Na nima Saule me basika na nganga-ngombo, bo kwendaka kunwana na bantu ya Filistia. Saule yandi mosi ti bana ya babakala yonso na yandi, bo fwaka na mvita, sambu Saule waka ve ndongisila ya Nzambi.

📖 Tangila bana : 1 Samuele 31 :1-6

1 ...bantu ya nsi ya Filistia nwanaka bitumba na bantu ya Israele... Bantu mingi ya Israele kufwaka, bantu ya nkaka tinaka.

2 Bantu ya Filistia landaka Saule ti bana na yandi. Bo kangaka bo, ebuna bana na yandi yai Yonatan, Abinadabi, ti Malkishua, bo fwaka bo.

3 Ntangu yai, bitumba yonso me bika kaka na maboko ya Saule mpamba. Bambeni yina vandaka na babunduki ya tolotolo, bo monaka yandi. Ebuna Saule, boma simbaka yandi mingi.

4 Yandi tubaka na muntu yina vandaka kunatila yandi bima ya bitumba nde :
« Baka mbele na nge, fwa mono. Mono ke zola ve nde bamimpani yai kwisa kufwa mono ti kufinga mono. » Kansi yandi buyaka, sambu yandi waka boma. Yo yina, Saule bakaka mbele na yandi mosi, yandi tumikaka no na ntoto, yandi bwaka na zulu na yo....

6 Mutindu yo yina Saule, bana na yandi tatu...bo fwaka kilumbu yo yina mosi.

25.2 Bantu ya Filistia vandaka kukumisa banzambi na bo na mambu yina—yonso sambu Saule waka ve ndongisila ya Nzambi.

📖 Tangila bana : 1 Samuele 31 :7-10


8 ...bantu ya Filistia kwisaka sambu na kuyiba bima ya bamvumbi bikaka. Bo

monaka mvumbi ya Saule ti bana na yandi tatu...

9 Bo zengaka Saule ntu, bo bakaka bima na yandi ya bitumba, ebuna bo tindaka bantu na kwenda kuzabisa nsangu yai ya mbote na ntoto yonso ya Filistia na banzambi na bo ti na bantu na bo.

10 Na nima, bo tulaka bima ya Saule ya bitumba na nzo ya...nzambi na bo ya nkento. Nitu na yandi, bo kangaka yo na kibaka ya bwala...

25.3 Bantu ya Yabesi-Gileadi zikaka bamvumbi na bo—yonso sambu Saule waka ve ndongisila ya Nzambi.

 **Tangila bana : 1 Samuele 31 :11-13**

11 Ntangu bantu ya bwala Yabeshi ...waka mambu ya bantu ya Filistia salaka Saule,

12 bantu na bo ya kuluta kikesa kwendaka mpimpa-mpimpa.... Bo katulaka bamvumbi ya Saule ti bana na yandi na kibaka, bo kwisaka ti bo na Yebeshi, ebuna bo yokaka bo kuna.

13 Ntangu yai, bo bakaka mikwa na bo, bo zikaka yo na nsi ya nti yina tamarisi na bwala na bo Yabeshi. Na nima, bo buyaka kudia bilumbu nsambwadi.

>|< Kumanisa :

Mbala mingi profete Samuele me songa Saule nzila ya kieleka. Mbala mingi yandi me pesa yandi ndongisila ya mbote, ya Nzambi. Mbala mingi Saule me tula ntu-ngolo. Nsuka, kukwenda na yandi na banzambi ya nkaka ya nganga-ngombo kusosa konseye, na nima yandi me buya conseye ya Nzambi. Nsuka na yandi mawa mingi.

O bana ! Mbote beto vanda ve bonso yandi. Beto vanda nswalu na kuwa ndongisila ya Nzambi.

 **Verse ya bubu yai :**

Kana nge ke tula ntu-ngolo/ konso ntangu bo ke pesa nge ndongisila,/

Kilumbu kele/ ntu na nge ta pasuka,/ yo ta yilama diaka ve./ Bingana 29 :!

Bana sala competisio bana ya bakala, bana ya bankento. Bo tuba yo mbala 6.

 **Bankunga ya kwenda nzila mosi ti lesu :**

Bana yimba ‘Kuwa Bible’ to nkunga ya nkaka ya kwenda nzila mosi ti lesu yai.

 **Devoir sambu na bakristo :**

Beno bana bakristo, devoir mono ke pesa beno, kuvanda nswalu kulanda ndongisila ya Nzambi. Yo lenda kuma na nge na malongi ya ecodim, na malongi ya pasteur, na malongi ya mama ti papa, na malongi ya balongi ya nzo-nkanda, na malongi ya ndinga ya Nzambi na radio, bonso program “Bible Kitoko” na 89.0 FM. Yo lenda vanda malongi nge ke tanga na Bible, to muntu ya nkaka ke tangila nge. Kuwa yo ti landa yo mbote. Ndinga ya Nzambi, O yea !

 **Kubinga bavidi na Yesu :**

Saule fwaka na nsoni ti na mpasi. Kansi mambu kuluta ngolo, yandi fwaka bonso mbeni ya Nzambi. O bana, mono ke bondila beno, kubikala ve bambeni ya Nzambi.

Nge lenda kuma nduku na Yandi na nzila ya Yesu Kristo. Menga ya Yesu futaka na zulu ya kulunsi, yo me lunga kukatula mbi yonso ya nge me sala. Yo me lunga kukatula kimbeni ti kuvutula kinduku na kati ya nge ti Nzambi. Yandi salaka yo sambu na nge, ti Nzambi tedimisaka Yandi na lufwa sambu na kusonga nde kieleka, Yandi me ndima lufwa na Yandi na sika na beto.

Kana ntangu lunga,

 **Longa mikanda ya Bible :**

(Bangindu kele na nsuka ya mukanda yai.)

O, kwenda nswalu kudilosa na Yandi. Kulomba Yandi mawa. Yandi zola kugulusa nge.

==NSUKA YA LESO 25

Leso 25



***Kana nge ke tula ntu-ngolo
konso ntangu bo ke pesa nge
ndongisila,
Kilumbu kele ntu na nge ta
pasuka. Yo ta yilama diaka ve.
Bingana 29 :l***

Leso 26 Revisio ya 1 Samuele ti Bankunga


K25A

Mikanda ya 1 Samuele ti Bankunga. . . .


Kapu 1-3
Ana ti Mwana Samuele



Kapu 8-9
Saule ntotila ya ntete ya Israele



Kapu 16



Samuele tulaka Davidi Mfumu

Kapu 17

Davidi nungaka Goliati



Kapu 21-24



Davidi wilaka Saule mawa

Kapu 31


Saule fwaka na mvita



Saule ti Davidi

Kapu 5


Kiteki Dagoni Kubwaka



Kapu 15



Nzambi buyaka Saule



Kapu 16
Bankunga

Kapu 19

Kinduku ya Davidi ti Yonatanani



Kapu 28

Saule sosaka ndoki. Ndola-Lufwa



Bamvula 1040-1010 na ntwala ya Yesu

Merci na freebibleimages.org/
Sweet Publishing sambu na Bafoto.

Sadila linya ya ntangu yai kureviser mambu ya nene ya salamaka na mukanda ya 1 Samuele.

Nki kwisaka ntete ? Yula bana, Nki salamaka ntete...(yai) to (yai)?

Nani nene na 1 Samuele ? Bana tuba bazina ya bantu ya nene na 1 Samuele. Na nima, bo mona mambu ikwa ya kieleka bo lenda tuba sambu na konso muntu.

Nsuka ya mbi Bana tuba bantu ya yantikaka mbote kansi sukaka na mpila ya mbi. (Eli, Saule) Bo songa sambu na nki luzingu na bo sukaka na nzila ya mbi.

Bamfumu zole Na 1 Samuele, Samuele tulaka bantu zole mafuta sambu bo kuma mfumu. Bo nani ? (Ntete Saule, na nima, Davidi)

Mukanda ya transitio Nani ke yala Israele na luyantiku ya 1 Samuele ? (Samuele, zuzi ya nsuka.) Nani ke yala bo na nsuka ? (Mfumu to Ntotila Saule, kansi dezia Samuel me tula Davidi mafuta sambu yandi kuma mfumu na nima ya Saule ?

Nani ?

Nani bwaka na luse na ntwala ya Sanduku ya Nzambi ? (Kiteki Dagoni)

Nani lombaka Nzambi mwana ya bakala ? (Mama Ana)

Nani ntotila ya ntete ya Israele ? (Saule)

Nani fwaka muntu ya nene Goliati ? (Davidi)

Nani vandaka nduku ya ngolo ya Davidi ? (Yonatani, mwana ya Saule)

Nani salaka masumu kukwenda na ndoki ? (Saule)

Nani kudifwaka na mvita ? (Saule)

Nani sonikaka bankunga mingi ? (Davidi)

Nani buyaka Saule kulanda kuvanda mfumu ? (Nzambi)

KUTWADISA MWANA NA YESU

Moniteur, landa bansiku yai :

- Kubenda mwana ve na kingolo-ngolo kundima Yesu. Mpeve ya Nzambi fweti benda yandi.
- Kupesa mwana nsoni ve kubenda mwana na Yesu. Mpeve ya Nzambi fweti benda yandi.
- Kubuya ve mwana kundima Yesu, ata ya konso age, kana Mpeve kele kubenda yandi.
- Tendula mbote-mbote lukanu ya mpulusu. Mwana fweti bakisa Nzambi kele nani, probleme na kati ya Nzambi ti yandi sambu na masumu, Yesu kele nani, Yesu salaka nki sambu na beto.
- Mwana fweti bakisa nde yandi kele ve kaka kutuba kisambu mosi, kansi yandi kele kubalula ntima sambu yandi bika masumu, yandi yantika kulanda Yesu tii kuna.
- Tula ngolo kuzikisa nde mwana me bakisa, mpi nde yo ke monika nde Mpeve kele kubenda yandi.
- Mwana fweti samba yandi mosi. Kana yai kele mpasi, yula yandi nki yandi zola Yesu kusala sambu na yandi. Kana yandi tuba nde 'kugulusa mono' to ngindu bonso yo, songa yandi nde, "Kaka lomba Yandi kusala yo."
- Nge songa mwana ve nde yandi me guluka, kansi yula yandi bakestio sambu yandi kusonga nge.

NZAMBI SADISA NGE KUTENDULA NZILA YA KUGULUKA MBOTE-MBOTE, TI KUTWADISA NA YESU KONSO MWANA YA MPEVE YA NZAMBI KE BENDA !

KULONGA MIKANDA YA BIBLE

- Mukanda ya 1 Samuele kele na kati ya 2eme ndambu ya mikanda ya Bible. Ndambu ya ntete kele Mikanda 5 ya Moise. Ndambu ya zole kele mikanda 12 ya Histoire ya Israele na ntoto na bo.
- Mikanda ya Histoire ya Israel yo yai :

Yozue

Bazuzi

Ruti

1 Samuele

2 Samuele

1 Bantotila

2 Bantotila

1 Bansangu

2 Bansangu

Esdrasi

Nehemia

Estere

Bana tanga yo na liste, na nima bo tuba yo bo mosi, na nima nge songa mukanda mosi ti bo songa nki ke kwisa na nima na yo, na ntwala na yo.

- Bana yimba nkunga ke songa mikanda ya Moize ya bo me longuka dezia, ti mikanda yai ya histoire ya Israele :

MIKANDA YA KUWAKANA YA NTAMA

Mikanda ya Moize, Moize, Moize,
Mikanda ya Moize—Bansiku-Nzambi !
Kuyantika, Kubasika, e Levi, Kutanga
Ye nsuka ke Kulonga, Mikanda ya Moize !

Mikanda ya histoire, histoire, histoire,
Mikanda ya histoire—Histoire ya Bayuda !
Yozue, Bazuzi, ye Ruti, ti BaSamuele,
Ye Bantotila, Basangu, ye Esdrasi
Nehemia, ye Estere, Mfumu-Nkento
Yai yonso kumi na zole mikanda ya histoire.

- 1 ti 2 Samuele ke songa mingi histoire ya Davidi. 1 Samuele ke songa na ntwala yandi kumaka ntotila, ti 2 Samuele ke songa kimfumu na yandi.
- Bantu ya nene beto mona na 1 Samuele kele Samuele (mutubi ya Nzambi), Saule (Ntotila ya ntete ya Israele) ti Davidi.
- Samuele vandaka zuzi ya nsuka ya Israele, Saule ntotila ya ntete. Yo yina, mukanda yai kele bonso pont ya ke manisa ntangu ya bazuze, ke yantika ntangu ya bantotila ya Israele.



MBOTE BAMPANGI BAMONITEUR !

Nge to dibundu na nge me defa mukanda yai na Centre des Matériels ya Ministère pour Chaque Enfant. MCE kele nduku ya dibundu ya ke sadisa malongi ya bana na nzila ya formation ya bamoniteur ti kudefa ya matériels. Beto lomba nge, na zina ya Nzambi, kuvutula mukanda yai na Centre de Matériels na nima nge me manisa kusadila yo. Mpidina, beto ta vanda na mpila kusadisa bampangi ya nkaka ti mabundu ya nkaka na malongi ya Ndinga ya Nzambi.

Nge mpi ta zwa kiyeka kudefa matériels ya mpa. Yo lomba kaka nde nge ntete vutula mukanda yai ti bima yonso ya nge bakaka nzila mosi ti yo.

**BONNE COMPREHENSION ti NZAMBI SAKUMUNA NGE
TI MALONGI NA NGE YONSO !**